


GIJIG-ANANG MEKATEOKONAIE S. J.

o

GAGIKWEWINAN







G. T. E. Dovx

Jesus Ode , jawenimishinam.



A. M. D. G.

GIJIG-ANANG MEKATEOKONAIE S. J.

O

GAGIKWEWINAN

1° : TA-MINO-NITAWIGIAWAG ABINODJIAG. P. 11.

2° : KEGO MATCHI-MINIKWEKEGON ! P. 63.

3° : KEGO GIWANIMOKEGON ! P. 117.

4° : KEGO KITIMIKEGON ! P. 161.

5° : KEGO GAGAWENDJIGEKEGON. P. 193.

Cum permissu superiorum.

TOURS

IMPRIMERIE A. MAME ET FILS

—
1898

PM 854

A7

C.2

Mekateokonae naganisikandawad Jesuitan Canada-waking o gi-ojibiamawan Gijig-anangon iw, ondji manda masinaigan :

Apegish Kije-Manito anamietang iw ki gagikwe-wini - masinaigan ga - ojitoian, tchi minokagowad anishinabeg eji - otchitchagowad gaie eji owiiawiwad

Ta-pindigemagad endawad enamiadjig, tchi kiki-noamawindwa ged - iji - mino - nitawigiauwad onidjanis-siwan.

O ga - wasseiendamiigonawa anishinabeg tchi wa-bandamowad matchi - minikweshkiwin eji - banadjii-wemagak ondji iw aki daji - bimadisiwin, gaie dash ondji bekanak, ajida sa aiawin.

O ga - gagikimigonawa tchi kitchi sagitowad deb-wewin, ginawishkiwin dash tchi gagwanissagendamowad.

Ishkwatch gaie o ga - gagansomigonawa tchi apitchi bakewinamowad kitimiwin, mi dash tchi iji mino bimadisiwad, tchi gashkitamasowad gaie bekish iw ga - wawindamawad Debendjiged meno - anokitagodjin, kagine sa minawanigosiwin.

Nin sa

T. FILIATRAULT, S. J.
SUPERIOR MISSIONIS CANADIENSIS.

Wikwemikong, 1. Oct. 1897.

WA-GISHPINADODJIG GIJIG-ANANG O GAGIKWEWINAN,
O GA-MADJIBIAMAWAWAN " Rev. Father ARTUS S. J.;
Wikwemikong. P. O. Manitoulin island. Ont. Ca-
-nada ".

MI MINIK GED-INAGINDEG :

1° Kakina gagikwewinan mamawi baiejigwang masinaiganing.

Bejig : \$ 0,25. Midasswi-ashi-nij : \$ 2,50.

2° Mamawi " TA-MINO-NITAWIGIAWAG ABINODJIAG " gaie
" KEGO GIWANIMOKEGON ! ".

Bejig : \$ 0,10. Midasswi-ashi-nij : \$ 1,00.

3° Mamawi " KEGO KITIMIKEGON ! " gaie " KEGO GAGAWEND-
-JIGEKEGON ! ".


Bejig : \$ 0,08. Midaswi-ashi-nij : \$ 0,80.

4° " KEGO MATCHI-MINIKWEKEGON ! ".

Bejig : \$ 0,05. Midasswi-ashi-nij : \$ 0,50.

TA-MINO-NITAWIGIAWAG

ABINODJIIAG!



TA-MINO-NITAWIGIAWAG

ABINODJIIAG!



Gego, wendji-manjissewad kitchi nibiwa bemadisidjig, memindage dash megwe anishi-nabeg, gaie wendji kashkendamowad kakina nebwakadjig enamiadjig, mi sa iw eji-nita-ma-tchi-nitawigiindwa abinodjiiag.

Kawin gaie mamakadendagwassinton tchi iji-webak : kawin sa gwetch wika awiia o nana-gatawendansin manda kikendassowin ketchisanagak gaie ketchi-apitendagwak. Kakina gega wenidjanissidjig inendamog tchi de - gashkitowad nitawigiawad onidjanissiwan weweni bwindamawindwa ; wawika gaie bejig ta-min-wendam tchi kikinoamawind iw.

Anotch sa inendam wenidjanissid, waiejindiso dash : “ kawin awiia o sagiassin ninidjanissan nin eji - sagiag ; kawin awiia o kikenimasssin nin eji - kikenimag ; kawin awiia inendagosissi tchi ijid ged - iji - dodawagiban : potch nin nin dibenima ; enendaman ta - ijitchige ; mi iw ! ”

Mi na , Ninidjanissidog , enendameg gaie ki - nawa ? Gonima sa ! ki kitimagenimininim dash , mekwendamanin ga - ijiieg naningim gi - wi - abi - siwimigoieg gi - kashkendamideeinegwa kinidja - nissiwag ! “ Kawin nin pisindagossi ningwiss , kawin gaie win nindaniss nin pisindagossi ; mojag nin nishkiigog , kawin nin gashkiassig gego wi - anonagwa wenijishing ; geget , Nosse , mojag nin kashkendamiigog . ” — Ki da - nawke - toninim : “ Awenen weindowinid ? kinawa sa tibinawe ; kawin sa ki gi - nandawendansim tchi windamagoieg ged - ijitchigeiegoban tchi mino - nitawigiegwaban ; kid inendamwaban : “ nin eta , nin kikenimag ninidjanissag , nin eta nin sagiag , nin gaie nin dibenimag..... ” Pisindawishig dash nongom : ki gi - sagiawag geget , kawin dash weweni ki gi - sagiassiwawag ; ki gi - kikenimawag ... pangi eta dash ; kitchi nibiwa

kawin ki gi-kikendamawassiawag, memindage dash kawin ki gi-dibenimassiwag, winawa sa go ki gi-dibenimigowag."

Geget, Ninidjanissidog, nibiwa anishinabeg nin da-gashkiton tchi iji-ganonagwa. Bekish gaie nind apitchi nandawendam tchi gwaia-kosseieg, mi dash tchi mino aiaieg eshkam ogi-dakamig, ishpiming gijigong gaie tchi kagine widjiminawanigōsimegwa kinidjanissiwag. Mi wendji anokiian nongom tchi nissitotamo inagog weweni iw enendagwak tchi ijigiindwa abinodjiiag tchi mino ijiwebisiwad, iw gaie enendagosiegenassamid Debendjigedondji kini-djaninissiwag.

Nitam ki ga-nanagatawendamin mamawi anind naganendagwakin debwewinan; nagatch ki ga-windamoninim eji-nita-manjisewad wenidjanissidjig eji-nitawigiawad onidjanissiwan; ishkwatch dash ta-masinitchigaso awga-matchi-nitawigiind abinodji, gaie win minawa meno-netawigiind.

I

ANIND NAGANENDAGWAKIN DEBWEWINAN

1° Debendjiged o gi-minan anishinaben gash-kiewisiwin tchi onidjanissinid ; ... wegonen ga-ondji-minad ? Weweni babamendamog eji-na-kwetaman ; nin debwe sa go. — O gi minan sa Kige-Manito anishinaben gashkiewisiwin tchi onidjanissinid , tchi batinowad eshkam eshkam enamiadjig meno-ijiwebisidjig aking , gjigong dash ketchitwawendagosidjig .

Abinodji , kekinoamagosidjin Catechim , gag-wedjima : Wagonen ga-ondji-pagidinik De-bendjiged oma aking ? — Nakwetamowin dash ijissin : Tchi kikenimag , tchi sagiag , gaie tchi mino-anokitawag oma aking , iw dash ningo-ting tchi ondji - minawanigosiiian gjigong

kaginig. — Kinawa dash , Ninidjanissideg , ga-wawenabamineg Kije-Manito tchi onidjanissiieg , kinawa ga-awiineg o gashkiewisiwin ketchitwawendagwak tchi owiiawiegwa weshkibimadisidjig , wegonen ga-ondji-iji-minigoieg ? Mi sa gaie tchi kikenimigod Kije-Manito kinidjanissiwan , tchi sagiigod , tchi mino-anokitago god gaie ; mi dash iw tchi ondji-jawendagosiwad ningoting ishpiming gjigong kaginig igiw abi-nodjiiag .

Gwaiak nissitotawishig nongom . Tchi mino-ijiwebak , anin ge-dodangiban awiia debenda-gosid ? Eji-nandawenimigod debenimigodjin sa go ; agonwetaged , kema o ga-kotagiigon , kema ganage kawin gego o ga-dibaamagossin . Ki dibenimigowa Eshpendagosid Manito ga-ojiinang kakina minik endashiiang ; mi dash enendagosiiieg Win eji-minwendang tchi iji-webisiieg .

Tchi mino-ijiwebak , anin ged-inabadjitchi-gadegiban gego ? Eji-minwendang sa win debendang iw . Kishpin awiia gego awiineg , ki gad-aionawa iw win ged-iji-minwendang . Ki dibendagosim , Ninidjanissidog ; Kije-Manito

ki dibenimigowa ;.... Win eji - minwendang tchi ijiwebisiieg, mi enendagwak. Ki gi - awiigo - wa gashkiewisiwinan anind :.... Win eji - minwendang kid inendagosim tchi inabadji - toieg ; ki gi - awiigowa gashkiewisiwin tchi onidjanissiieg ; Win eji nandawenimineg ki gad - aionawa.

Anin dash enendang ? Mi sa tchi ijiegwa kinidjanissiwag tchi babamitagod , tchi sagiigod aking , gegapi iw tchi ondji kagine - jawendago - siwad od ogimawiwining gjigong .

Tchi iji - nitawigiewa , ki gi - minigom gega Kije - Manitong tchi apitendagosiiieg enassami - wad igiw abinodjiiag ; kishpin dash inenda - meg gego bakan tchi ondji nitawigiegwa , kawin keiabi gego enassamiwad kid apitenda - gosissim .

Awetchigewin nin gad - aion : Ketch - danid inini o gi - anonan o bamitaganan ondji anoki - win . Od inan dash ! “ Anind oshkinaweg ki minin ge - widokokwa , kin dash ki - gashkiewi - siin tchi anokiadwa ; mi dash nin tchi di - baamonagog , kakina mamawi Gi - mina na gashkiewisiwin aw bamitagan tchi anokiad

oshkinawen wegotogwen anokiwin ondji win ged-iji-minwendamogwen? ta-inendagosiwag na gaie oshkinaweg tchi babamitawawad kish-pin win tibinawe wi-anokitagod, kishpin gaie ojitosig Debenimigodjin od anokiwini? — kawin sa geget. Win matchi ijiwebisi, baba-mendamawassig debendjigenidjin od ikkito-wini; winawa gaie da-manjissegwag kishpin wi-pisindawapan. O kikendanawa iw weweni; mi dash eji pisindagod minik enokitawad debendjigenidjin, tchi dibaamagowad; kawin dash o ga-babamenimigossin kishpin win tibinawe wi-anokitasod.

Mi tanassag : Enassamiwad kinidjanissiwag ki nabishkawawa Kije-Manito, ki minigowa gaie tchi apitchi niganisikandawegwa, gaie winawa od inenimigowan tchi babamitonegwa, tchi ijiwebisiwad, tchi anokiwad, Win eji min-wendang, kawin kinawa ged-iji-minwenda-mowegwen. Kishpin ondji Kije-Manito, ondji kagige-bimadisiwin mino nitawigiegwa, o ganishkiawan Debendjigenidjin dassing ge-pisin-dossinowegwanin, o ga-babamitawawan dassing ge-babamitonegwanin.

Kinawa dash api ge-babamenimassiweg Kije-Manito eji-gijigiegwa kinidjanissiwag, kawin keiabi ta-inendagwassinton tchi babamenimi-negwa; potch gaie kawin ki ga-babameni-migossiwag! Mi dash geget ejiwebak mojag: Wenidjanissid netawigiad onidjanissan, tchi mino-ijiwebisinid, tchi mino anamianid, gaie dash tchi kagige bimadisinid, eji nandaweni-migod Debendjigenidjin sa, o sagiigon, o pisindagon, mojag gaie o babamenimigon gaie win onidjanissan. Abidekamig sa debwe Jesus Eg-washinged, ekkitod: “Nandawabandamog ni-tam Kije-Manito od ogimawiwin: mi dash ka-kina gego agwito tchi minigoieg.”—Wenidjanissid dash ge-kikinoamawassig onidjanissan tchi kikenimanid, tchi sagianid, tchi babamitawanid Kije-Maniton, kawin gaie win o ga-babameni-migossin, kawin o ga-sagiigossin: o ga-pisindagon eta pang i minik ged-ashamad, kema minik ge - gossigod; o ga - kashkendamiigon apine.

2. Minawa bejig naganendagwak debwewin nanagatawendamog. Kawin wenidjanissid od

iji - dibenimassín onidjaníssan , tchi bejigo - dibenimad , tchi mamawi - dibenimad . Abinod - -jiag sa o dibenimigówan nitam Kije-Maniton . Mi dash minawa tchi inendang kitchi-anishi - -nabe : kawin nind aiaming nin da-apiteni - -massig ninidjanissag ; Maiamawi-ishpendagosid mi Win wedaiamid , mi Win ged-inakoniged ged - ijiwebisiwad ; kawin nin ged - iji - minwen - -daman ta-bimadisissiwag , Win dash ged - iji - nandawendang nin gad iji-dodawag , nin gad - iji - dodamoag gaie .

Geget sa go debwewinagad iw . Kawin sa awiia ganage gego oma aking od apitchi diben - -dansin . Od iji-aian gego anawi bemadisid , win eta tchi inendagosid tchi aiod , kawin dash tchi iji - aiod win eji - minwendang . O gad - aion gego anishinabe eji-nandawenimigod Debeni - -migodjin Kije-Maniton . Wegonen dash wendji ijiwebak iw ? Ondji gi - ojiidisossig anishinabe ; ondji gi - ojiigod Kije-Maniton ; ondji gaie gi - ojitetod kakina gego Kije - Mañito waieshkat minik enabadjitowad bemadisidjig . Kawin gaie win tibinawe anishinabe apitchi dibenindisossi ; anin ged - iji - bejigo - dibenimapán onidjaníssan ?

Kawin kin, wenidjanissiian, ki gi-ojiassi kinidjaniss : kawin ganage pangi eji-otchitcha-god ; ki gi-anonigo eta, ki gi-awiigo gashki-ewisiwin iw tchi dodaman enendagwakiban tchi ojiind eji-owiiawid. Win dash ga-ojiad kinidjanissan eji-otchitchagonid, gaie dash ga-abadjik eta tchi ojiimind eji-owiiawinid, mi Win debenimad, mi Win wedaiamid.

Mikwendamowapan iw wenidjanissidjig, o da-kitchitwawenimawan onidjanissiwan, o da-apitchi ganawenimawan tchi banadjiasiwiimin-dwa. Banadjia dash abinodji kishpin kikino-amawind gego tchi kikendang gaie tchi sagitod, bwa kikinoamawind tchi kikenimad gaie tchi sagiad Kije-Maniton. Inendagos i sa tchi kikenimad, tchi sagiad gaie nitam Debenimigodjin.

— Banadjia abinodji kishpin pagidinind gego tchi minwendang, gego tchi ijitchiged aiagon-wetamomagak Debenimigodjin od inendamo-wini. — Banadjia abinodji kishpin windama-wassiwind iw enendagosid tchi mino anokitawad Debenimigodjin. — Banadjia abinodji, kitchi matchi ijiwebisiwan gaie o kitisman, kishpin,

waiba api nessitotang gego, nagadjiasiwind tchi anamiad.

Angwamisiio, kinawa wenidjanissiieg. Kish-pin kinawa odindowiniieg tchi banadjiiindwa kinidjanissiwag, mi memindage iw kinawa gedondji-banadisiieg kagigekamig.

Minik ga-awiineg Debendjiged, kawin gego od apitendansin epitenumad kinidjanissiwan. Od ineniman kitchitwawisiwining ishpiming tchi kagine-minonaweigod, tchi jawendagosiad gaie. Anin dash minik, kid inendam, ge-bana-somigoieg, kishpin, ondji kitimiieg, ondji babamendansiweg gego, inendagosiwad nинг-goting matchi-maniton tchi nopinanawad anamakamig !

Mojag mikwendamog iw : kinidjanissiwan dibeniman Maiamawi-ishpendagosid, Win od aiaman awiwag. Kinawa dash kid anonigom tchi ijigiegwa, tchi iji-dodawegwa, tchi iji-dodamoegwa, eji-nandawendang Debend-jiged. Kego wika inendankegon : “Potch nin, nin dibenima ninidjaniss. Enendaman nin gad-iji-nitawigia ”. Kego wika iw inendankegon !

3. Minawa bejig nanagatawendañ, kin egin-daman iw masinaigan. Pabige eko aiad abin-odji, otchitchago ; gaie dash eji-otchitchagod apitendagosi wassa awashime iw dash eji-owi-iawid. Kin dash, wenidjanissiian, ki minigo tchi nitawigiad bekish eji-owiawid bekish gaie eji-otchitchagod : ki gad-ashama tchi mashka-wisid, ki gad-agwia tchi gikadjissig, aiako-sidjin ki ga-minaa mashkiki ; bekish dash ki ga-windamawa wenijishing tchi kikendang, naningim gego ki ga-kikinoamawa ge-mikwen-dang, ki ga-nagadjia mojag menodeengin tchi ijiwebisid, ketimishkidjin gaie ki ga-nanaina.

Debendjiged dash o nandaweniman kinid-janissan tchi anamianid ; mi dash tchi siga-andasonid wewib. Nissitonan dash nongom endodawind otchitchagong iwapi. Ajegwa bima-disiban geget, eji-bimadising ogidakamig, kawin dash anawi eji-bimadising ishpiming gjigong. Nongom dash ketchitwawendagwak aiawin mina : bimadisi nongom otchitchagong Win tibinawe Kije-Manito Debenimigodjin eji-bimadisid, nongom od onidjanissimigon Maiamawi-ishpendagosinidjin. Kin dash kid

anonigo tchi ganawendamawad iw bimadisiwin tchi ondji kagige-minawanigosid, kakina gego ki ga-wikwatchitamawa tchi songitoian odeing. Tchi ashandamawad dash iw bimadisiwin ket-chitwawendagwak, ki ga-kikendamo a wewib gaie weweni baiejigwang gweiakossing ijitwa-win, Katolik anamiewin; mino-ijiwebisiwin ki ga-wabandaa; batadowin ki gad-ikonam-awa.

Eji-nissitotagwak, nandawendagwad awashime tchi bimadisid kagigekamig jawendago-siwin ing ishpiming, epitch dash atchina tchi baba-aiad sanagisiwin ing ogidakamig. Mi ged-ondji-iji-nitawigiad tchi apitendang tchi sagitod gaie nitam anamiewin, panima dash eta gego bekanak ged-inabadadinig oma aking minik ge-bimadisid.

4. Keiabi bejig ki ga-windamoninim, Ninid-janissidog, tchi iji-wanishinsiweg eji-wa-nishinowad kitchi nibiwa bemadisidjig.

Inendamog sa winawa: Nijwaiagad iw gekikinoamawind abinodji: anamiewin, gaie dash bekanak kikendassowin; nijwaiagad gaie ged-

ijiind awiia : eji anamiad sa , gaie go eji - wi - kikendassod. Ged - apitch - kikinoamawind ki - kendassowin kawin gego ta - kikinoamawassi anamiewin ; ged - apitchi - ijiind eji - kikendas - song , kawin ta - ijiassi eji - anamiang. Endad gaie anamiewigamigong ta - windamawa anami - ewin , kikinoamadiwigamigong dash kiken - dassowin eta.

Kitchi wanishinog enendangig iw. Kawin sa nijissi abinodji : bejig ge - babamitawad Kije - Maniton , gaie bejig ge - babamenimassig ; kawin nijissiwag Debenimadjig abinodjiian , bejigo eta aw Debenimad ; Kije - Manito o gi - ojian , o gi - awian gaie kakina eji gashkiewisinid , ged - aionid dash Win eji - nandawenimad. Kawin od inenimigossin Kije - Maniton tchi anokitawad nano dibaigans kagijebawagakin , nano dibai - gans gaie wenagoshingin , ginwenj awashine enamiegijigakin , potch dash kabe - gjig , anoki - gjigak gaie tchi babamenimassig. Endasso giji - gak , kabe - gjig gaie ta - ijiwebisi anishinabe enenimigod Ga - ojiigodjin.

Ta - kikinoamawa dash abinodji kikendasso - win ged - aiod tchi anokitawad Kije - Maniton ;

ta - windamawa anin ged - inabadjitod kiken -
- dassowin tchi sagiad Kije - Maniton awashime,
tchi debwetawad awashime, awashime gaie
weweni tchi gashkitod tchi anckitawad : Mi
dash anamiewining tchi apitendagwadinig ka-
kina gego wawinge ge - dodang, ge - kikinoama-
wind, kema anamiewigamigong, kema kiki-
-noamagdiwigamigong.

Kego inendankegon : kishpin mojag kikino-
- amawind anamiewin, kawin gego bakan o
ga - kikendansin. Ki da - nakwetoninim pabige :
kawin mojag anamiewin ta - kikinoamawassi ,
mojag dash enamiangin geget kakina gego beka-
-nak ta - kikendamo. Anotch sa gego weniji-
-shing enabadak gaie tchi mino bimadising ,
gaie bekish tchi mino - ijiwebising dagomagad
ge - nissitotamoind ge - takwendamoind gaie ; o
ga - wabandan masinaigan , anamiewining dash
ta - apitendagwadini ged - agindamoind ; ta - oji -
- biige gaie, anamiewining dash ta - apitenda -
- gwadini iw ged - ojibiamoind. Anamiewining
sa apitendagwad kakina gego endodaming ej -
minwendang Debendjiged, kema gaie tchi min-
-wendang. Kije - Manito dash o dibendanan

kakina kikendassowinan, o minan gaie anishinaben tchi mino-inabadjitonid. Gaie winawa anishinabeg ga-mamawi-kikendassodjig gega kakina gi-songanamiawag bekish.

Geget, Ninidjanissidog, gwaiak kikendasso-win, debwewin sa go, kawin wika agonwe-tamomagassinon anamiewin, kawin gaie win anamiewin agonwetamomagassinon ondjita-ki-kendassowin. Baiejigod Kije-Manito neienj o gi-ojitonan, neienj Debendjiged o windamawan anishinaben. Bejig dash kid apitchi-kitchi-inendagosimin tchi babamendamang tchi ka-gige-banadisissiwang. mi sa anamiewin; be-kanak dash aiano-onijishing kishpin weweni inabadjitchigadeg, anawi kawin iji-inendag-wassinton tchi gashkitamasoiang. Batinowag gjigong eiadjig ga-kikendassodjig, geget; batinowag dash gaie anamakamig eiadjig ga-kit-chi-kikendassodjig, ga-matchi-inabadjitodjig dash minik ga-kikendamowad, gi-anamiassig-wa weweni.

Tchi nanisanendagwassinoog kikendassowin, tchi onijishing, abidekamig ta-niganimagad anamiewin, mojag gaie ta-widjiwiwemagad. Ke-

- kendassod, kishpin anamiassig, waiba mami-
- nadisi; kawin gego keiabi o pisindansin,
enendang eta wi-dodam; mi dash tchi matchi-
ijiwehisid.

Kego nongom mamakadendankegon iw weji-
- biamowad anind naganisidjig ininiwag Jag-
- anashi - aking : “ Weshkinigidjig ga - kiki-
- noamawindjig kikinoamadiwigamigong ga -
daji - windamawassiwindwa bekish anamiewin
weweni, moshkinewag gibakwaodiwigami-
- gong.” Geget go, Ninidjanissidog, ta - mosh-
- kinewag gaie anamakamig !

Ta - iji - nitawigia abinodji mojag tchi wi - do-
- dang kakina endodang ondji Kije-Maniton, mi
dash tchi apitendagwak anamiewining iw minik
ge - bimadisid aking; mi tchi kagine minawan-
- igosid.

5. Ishkwatch dash, Ninidjanissidog, keiabi
bejig niganendagwad debwewin ge - windamo-
- nagog. Eji - nitawigieg abinodjins, mi ged -
iji - aiad.

Eji - kitigeieg mi ged - iji - mamaieg. Mino mi-
- nikan ta - mino - miniwan; kishpin gaie na-

-ningotinong ijiwebak tchi mino-miniwansingog mino minikan, kawin wika anawi matchi minikan ta-mino-miniwansinon. Abinodji ode ijinagwadini tibishko kitigan; kitigessiweg we-weni, weweni babamendansiweg kid inen-dagosiwiniwa eji-onidjanissiieg, ta-nitawiginon anotch wiiagashkon, anotch matchi-ijiwebi-siwinan sa; kitigeieg eta weweni, kitchi-anoki-ieг tchi pakwakobidoieg matchi mashkossiwan, (mi sa maianadak enagodenig abinodji ode,) angwamisiieg tchi atoieg mino-minikan, mi sa tchi nagadjieg abinodji tchi mino-ijit-chiged, geget iwapi ta-minogiwemagadini ode.

Inendameg tchi minodeewad kinidjanassi-wag,..... wabandaig nongom eji-onijishing minodeewin, aiog dash ikkitowinan, gagikimig; aiog memindage dodamowinan ge-wi-kiki-nowabandamowad; wegotogwen gaie ged-iji-tchigewagwen matchideewad, nissitotamoig eji-manadadinig, nanibikimig, gawaiakoshimig.

Inendameg tchi pisindonegwa, gaie mojag tchi babamitagewad enendagosiwad,..... nongom windamawig, gagikimig, nagadendamoig tchi

nissitawinamonegwa iw gashkiewisiwin Maia -
- mawi - ishpendedagosid ga-minineg.

Inendameg tchi matchí - ijiwebisissigwa ,
nongom jingendamoig batadowin. — Nongom
ki' ga - gashkiawag ; panima nagatch , osam
wika !

Kitchi nibiwa wenidjanissidjig anisha kash-
kendamog waiabamadjig onidjanissiwan ej-
matchi - ijiwebisinid ; potch winawa da - batan-
- disowag enassaminid Kije - Manitou ; winawa
od oindowiniwag geget kishpin iji - kashkend-
- amideindwa.

II

EJI - NITA - MANJISSEWAD NIBIWA WENIDJANISSIDJIG

Ki gi - windamoninim jaigwa , Ninidjanis-sidog , anind naganendagwakin debwewinan ged - inabadjitoieg weweni , tchi nitawigiegwa kinidjanissiwag ; nongom pisindamog eji - nita - manjissewad kitchi nibiwa anishinabeg . Nis-swaiagad iw memindage . Nibiwa kawin gwetch o babamendansinawa , anin ged - ijigiawad abinodjiian ga - minigowad Debendjigenidjin ; minawa dash anind osam nokadisiwag , kema matchi - nokadisiwag , kawin weweni o sagias-siawan onidjanissiwan ; keiabi anind osam sanagisiwag kema matchi - sanagisiwag endo-dawawad abinodjiian . Nanagatawenindisoilog ged - apitch - wabandameg wa - ikkitoian oma .

Kema wenidjanissid kawin bapish o babam-endansin tchi mino-nitawigiimindwa onidjan-issan.

“ Mano winawa ta-nitawigiidisowag, inendam, osam nind ondamita, mojag tchi wi-aka-wabamagwa ejitchigewad. Api ge-bakadewad ta-bi-wissiniwag; kishpin gikadjiwad, ta-bi-giwewag; onagoshig ta-bi-nibawag.” — Geget, anawi dash nissitotagwad ged-iji-matchiaiawad, waiba, kitchi waiba gaie ged-iji-manjininiwagisiwad; ta-ombigisiwag, ki ga-mingoshkadjiigog.” — “ Kama win! Mitigons sa oma aia. Potch bisan ta-abiwag.” — “ Anawi kawin mojag ki ga-gashkitossi tchi bashanje-wadwa; ningoting osam ta-kitchi-mindidowag.” — “ Nin ga-sagidjiwebinag; ta-baba-anokiwag, kawin nin ga-babamenimassig.” — “ Geget gaie winawa kawin ki ga-babamenimigossig. Ki gad-akos, potch gaie kin; ki ga-gika, potch gaie kin; ki ga-kitchi-kitimagis, potch gaie kin! Winawa kinidjanissag kawin ki ga-baba-menimigossig.”

Mi na enenimigowad Kije-Maniton wenidjanissidjig, gaie go winawa wenidjanissimin-

-djig? Kid inendam na, Ninidjanissidog? kawin geget kid inendansinawa iw, kawin gaie kin-awa kid-apitchi-ijiwebisissim. Gonima dash anawi pangī ganage kid ijiwebisim.

Kawin gonima ki de - babamendansinawa ejitchigewad kinidjanissiwag. Nissitotawishig : Nijwasso - dibaiganeg onagoshig, kema wika nawatch, nind pindige endaieg : Anindi kig-wiss, kidaniss?" — "Tibi-idog!" — "Anawi ki da-kikendan iw; kawin gaie ningotchi da-ijassiwag kinidjanissag bwa pagidinadwa tchi ijawad; anin gaie dasso - dibaiganeg ge-bi-giwewad ki da-gi-inag." Minawa ki gagwed-jimininim : "Awenenan wadjiwawadjin?" — "Kawin nin kikenimassig." — "Anawi dash kawin ki da - pagidinassig awegwenan tchi widjiwawad." Angwamisiilog nongom; kego wika bonitokegon tchi babamendamawegwa kinidjanissiwag kakina gego ejiwebisiwad?

Minawa anind wenidjanissidjig geget o ba-bamenimawan onidjanissiwan tchi mino-bima-disinid : weweni od ashamawan sa, weweni o kijanawan tchi akosissinid, eji-owiiawinid

sa go o ganawenimawan weweni eniwek ; o gakikinoamawawan gaie gego ged-inabadjitonid tchi bamiidisonid ogidakamig ; kawin dash o babamenimassiwawan eji otchitchagonid. — “ Mano win mekateokoanaie o ga-gijitaan tchi anamianid, mi sa win od anokiwin, inen-damog.” Mi dash eji-kikinoamawassiwindwa anamiewin ketimagendagosidjig abinodjiiag tchi bwa jangassobibonagisiwad, kema gaie awashime wika. Osam wika dash ! Jaigwa o danagadandanawan anamiewini-debwewinan ; jaigwa mewija o da-kikenimawan Kije-Maniton, Jesusan, Kitchitwa-Manian, Anjeniwan; ana-makamig, gjig, mino-ijiwebisiwin, batadowin jaigwa mewija wawinge o da-kikendanawa ejiwebak ; tchi inabadjitowad ketchitwaben-dagwakin debwewinan mojag ged-apitch-bimadisiwad. — Apegish gaie ganage epitch jangassobibonagisiwad, ijawad mekateoko-naien. Kitimiwag dash anind wenidjanissidjig tchi madjinajawawad.

Keiabi dash gego : “ Naningim na o mikweni-man kinidjaniss Debenimigodjin, saiagiigodjin Kije-Maniton ? ” — “ Namandjidog.” — “ Ki

da - mikwendamoa ” — “ Gi - anamia na jeba ? — Gi - ija na anamiang gi - anamiegijak ? Anin - iwapi ishkhwath ga - webiniged ? Kema , gi - ish - kwa - kitchi - matchi - dodang , ki gi - anwenin - disoa na ? Ki gi - gijitaa na tchi awi nansikang webinigewin ? ” — “ Kawin kakina iw nin babamerdansin . ” — “ Anawi dash mi eji - manawi - kitchi - inendagosiian eji - onidjanis - sian . Ondji kakina iw ki ga - dibakonigo , ki ga - kitchi - dibakonigo gaie . ”

Anind dash weossimindjig nakwetamog : “ Ogiwan o babamendamagowan kakina iw : mi win od anokiwin . ” — “ Geget , mi win od anokiwin ; mi dash awashime kin kid anokiwin ; kishpin eta gashkitossiwan kin , mano , abinod - jiiag o ga - babamendamagowan iw ogiwan : kin dash anawi kid apitchi - kitchi - inendagos tchi anokian tchi wi - pisindawawad ogiwan , tchi debwetawawad , tchi babamitawawad . Kishpin gaie ijideeiamban eji - nandawenimik Debendjiged , aiano kitchi - ondamitaian , geget go anawi ki da - de - gashkiton tchi debissatoian manda ketchi - ishpengdagwak kid inendagosiwinkin tibinawe . — “ Sanagad ! ” kid ikkit . —

“ Kawin ki debwessi ; kawin sanagassinnon.”

Wenidjanissiieg ! kishpin osam wika madjittassiweg tchi ijiegwa kinidjanissiwag , kawin ki ga - sanagisissim . Wenipanisiwig abinodjiag apitch agashiiwad ; kakina o debwetanawa , kakina o nagadendanawa wenijishing , waiba o ga - kikenimawan Kije - Maniton , Jesusan , Ki - tchitwa Manian , Anjeniwan ; waiba ta - kitchinandawendamog gijigong tchi ijawad , waiba anamakamig o ga - gotanawa , waiba ta - wi - mino - ijitchitchigewag , kishpin weweni kakina iw windamawegwa tchi bwa dibenimigowad Matchi - maniton jangenimigowadjin .

Wika dash kikinoamawind abinodji , agawa debwetam ; daiebwetang dash anawi , mojag o gagwedibenimigon giwadendamowin ; kawin o nita - aiossin iw eshpendagwak kikendassowin , iw sa anamiewini - kikendassowin ; kavin o ba - bamendansin , mi dash wendji gotansig ana - makamig eteg kotagitowin ; mi wendji - gossassig Kije - Maniton ; mi wendji - matchi - ijitchiged ; mi wendji - kashkendamiineg ; kinawa dash kid indowiniwa . Angwamisiilog minavia , ba - bamenimig kinidjanissiwag ej - anamiawad .

Minawa anind iw ondji manjissewag ejinawigiaiwad onidjanissiwan, matchi-nokadi-siwad.

Onijishin nokadisiwin; osam nibiwa dash, kawin keiabi onijishinsinon. “Too much of a good thing is good for nothing”, ikkitowag Jaganashag.

Geget go, Ninidjanissidog, sagiig kinidjanissiwag, kitchi sagiig, enigokodeeieg; kishpin gaie weweni sagiegwa ondji Kije-Manito, ondji kagine-bimadisiwin, kawin wika osam ki gasagiassiwawag. Nokadisig gaie, Jesus, ga-kit-chi-sagiad abinodjiian, ga-iji-nokadisid; kego dash osam nokadisikegon.

Inendagwad geget tchi sagiegwa kinidjanissiwag, sagitamawig dash o mino-ijitchigewiniwan, otchitchagowan, tchi kagine-bimadisiwad; jingendamawig, ikonamawigo matchi-ijitchigewiniwan, o batadodamowiniwan wendji nanisanisiidisowad tchi webinigowad Debend-jigenidjin, tchi kagine-banadisiwad dash.

Weweni nanagatawendamog iw gaie : Saigiegwa kinidjanissiwag kitchi gagawenimawag, kitchi jingenimawag : aw dash, jangenimad

kinidjanissiwan, mashkawisi, wawingesi wi-waiejinged, wi-banadjiad jangenimadjin : mi aw matchi-manito : dadibabamig weveni. Eko-bimadisid dash maba kinidjaniss, od inemigon matchi-aiaawishan tchi matchi dodang, tchi kikenimassig, tchi sagiassig Debendjigenidjin, tchi anokitawassig, mi dash tchi kagige kota-gitod. Wenibik nanagatawenim kinidjanissens kitchi-ishkoteng : mi eji-nandawenimigod jan-gendjigenidjin maniton tchi kaginig aiad. Kin dash nadamaw !

Mi sa dash ged-iji-nadamawad : pabige waiabandamanin eji-odissigod gego matchi nandawendamowinens, maianadak inakakeia enagodeg odeens, migadan iw; kego pisindan-gen, kego widokangen. Ta-mawi abinodji ! Mano ta-mawi nongom atchina, tchi kagige mawissig nagatch. Abiding nengom gagwedi-benima ; kishpin beka anwenimad, ki ga-mi-dagwenamawa nibiwa gagwedibendjigewinan, ki ga-jingendamoa ; kawin o ga-nagaden-dansinan. Minawa jangendjigenidjin o gagwedibenimigon, naningim o ga-wikwatchi-igon : kin dash dadibabam mojag, nadamaw

mojag, anwenim; kishpin gaie debissessinog, pangi ki ga-kotagia, Win Debendjiged ej i kotagiad baiatadinidjin oma aking tchi anwe-nindisonid.— Kego wika nishkadisiken, mojag gagikim, mino ganoj kinidjaniss, gaie dassing metchi - ijitchigedjin ondjita, pangi ki gad animia, ki ga-kotagia : mi sa dash win ged-inendang : “ Kawin wika keiabi nin ga-dodansin ga-iji-gagwedibenimigoiamban, osam mana-dad; kawin gaie inabadassinon, mi eta tchi anwenimiwad saiagiidjig nin baba gaie nin mama, kawin nindawatch nin wi-aiansin.”

Kego inendankegon gaie : kawin wika maia-nadak ninidjaniss o wi-ai nsin ; kawin mana-dadong inagodessinini ode. — Geget go abide-kamig o miganigon gaie win ketchi-waiejin-ge shkinidjin maniton. Ki da-waiejimigom gaie kinawa, enendamegobanen iw. Mi dash geget gego ketchi-nanisanendagwak : iw sa tchi iji-waiejimigoieg : ki da - banadjidisom, ki da-banadjia wawag gaie bekish kinidjanissiwag.

Kego nokadisikegon osam, epitch abinod-jinsiwiwad; weweni anwenimig, agonweta-mawig kakina gego wenijishinsinog; mano

ta-mawiwag, waiba kawin keiabi ta-mawissi-wag. Ijitchigeieg iw, ta-kitchi-wenipanisiwag eshkam, gi-madjigiwad. Ijitchigessiweg dash epitch agashiiwad, awashime ta-sanagad na-gatch; ta-inendagwad gaie iwapi enigok awashime tchi anwenimegwa tchi animiegwa gaie; kawin keiabi gonima ki ga-gashkiassiwag.

Kinawa dash, wenidjanissiieg ga-ijitchiges-siweg iw weweni mashi, waibamegwa dash abinodjiag eniwek mendidodjig jaigwa, manadadong dash enagodenig odeiwan; kego ningot apenimokegon kishpin inendansiweg apitchi besho tchi ashownegwa, kishpin weweni an-wenimassiwegwa; pisindansigwa dash, kishpin de-kotagiassiwegwa. Kego kitimikegon! Kego jagodeekegon!

Oma dash aw weossimind inendagosi, me-mindage win, tchi anokid, tchi widkawad gaie mojag, apitchi mojag, wegimin indjin. Aw wegimind, mojag gega nita-iji-nokidee, iji-jagwiwi gaie naningotinong, tch gashkitossig weweni tchi nanainad matchi abinodjiian. Win dash inini inendagosi tchi de-songideed.

Keiabi bejig oma pisindamog. Meno-ijitchi-gewadjin kinidjanissiwag, onijishin na pabige tchi ajenainawegwa gego eji-minwendamowad, tanassag wi-dibaamawegwa ? — Kawin ! Dod-ameg iw, mi tchi nagadisid abinodji tchi mino-ijiwebisid eta ondji mino-dibaamagowin : apen-imossig dash dibaamagowin, kawin ta-minododansi ; mi dash tchi agassideed, mi gaie tchi matchi-sagiidisod.

Da-kikinoamawa abinodji tchi sagitod mino-ijiwebisiwin ondji tibinawe mino-ijiwebisiwin eji-onijishing, eji-nandawendagwak, gaie tchi minonawead Debendjigenidjin, tchi gashkita-masod gaie kagine-minawanigosiwina.

Mino-ijitchigewad kinidjanissiwag, geget onijishin tchi kikendamowad iw eji-ondji-minwenimegwa, eji-sagiegwa gaie awashime ; mi geget mino abinodji o kitchi dibaamagowin tchi kikendang sa gi-minonawead ogin ossan gaie, gaie Kije-Maniton memindage.

Geget anawi, memindage kishpin eniwek senagak gego gi-mino-ijitchiged, gi-jagodjiidisod, gi-mindjiminidisod weweni, iwapi minig gego gashkitoieg, ganage apitchi-mino-

ganonig tchi kikendang eji - minwendameg.

Win dash ketchi-onijishing gego endodang, iw tchi ondji-dibaamawind, kawin keiabi iji-onijishinsinini. Pijishig gonima sagiidiso, matchi sagiidiso dash.

Nongom dash, ishkwatch gaie, mi eji-man-jissewad anind eji-nitawigiawad onidjanissi-wan. Osam sa sanagisiwag, kema gaie matchi-sanagisiwag.

Geget sa go kawin osam ta-nokadisissi we-nidjanissid; ta-de-sanagisi tchi gashkiad onid-janissan mojag, wewib tchi pisindagod, tchi babamitagod gaie. Mi dash iw minik. Awashime, kavin keiabi onijishinsinon.

Mi-ejiwebisiwagwen anind, tibishko sa kikkendansigwa gego bakan tchi ondji gwaiako-shimawad abinodjiian, mi eta mitigons, kema anotch kotagiigowin. Kawin awessiiwissi abinodji. O gi-minigon Kije-Maniton tchi gash-kitod tchi nissitawinang wenijishing gaie mai-anadak, tchi apitendang gaie epitendagwak, kishpin eta windamawind weweni. Pijishig

mitigons kema bakan kotagiigowin kawin o gakikinoamagossin gego, mi eta tchi jingendang endad, eshkam pangigaie tchi sagiad o kitisman, gaie dash tchi gimid, tchi ojimod, pabige de-apitisid nijike tchi baba-gagibadisid.

Geget onijishin bashanjeogowin; gaie, ikkito Kije-Manito o masinaiganing, “ awiia ge-wi-bashanjewassig onidjanissan ga-wikwatchit-amadisonidjin, kawin weweni o sagiassin.” — Anawi aw abinodji kawin wikwatchitamadisossi mashi tchi bashanjeond, ga-windamawassiwind weweni anin gwaiak ged-ijitchiged; kawin gaie mashi ta-bashanjewassi binish tchi wikwatchiind wawinge tchi mino-domamoind ondji Kije-Manito, ondji gjig, ondji anamak-amig, ondji gwaiakossewin tibinawe. Geget, gi-ishkwa-inabadjitchigadeg iw kakina, anisha dash, mi tchi bashanjeond, nitam pang, na-gatch awashime, kawin dash wika epitch nish-kadising.

Kishpin nishkadisiieg, kawin keiabi ki denibwakassim, naita iwapi tchi nanagatawen-dameg iw minik eji-kotagiindiban abinodji, anin gaie ge-nissitamoeg gego. — Gawashkweb-

ingin gega ijiwebisi awiia neshkadisid; kawin keiabi dibenindisossi; kawin iwapi gego da-inakonigessi. — Gaie dash aw neshkadisid kawin keiabi o widokagossin Kije-Maniton, kawin ta-minosseSSI. — O ga-segisian abinod-jian, kawin dash o ga nanainassassin. Abidek-amig ta-gagwedibenima aw abinodji tchi demanadjiaSSig o kitisman neshkadisinid, tchi de-sagiassig : o matchi-kikinoamagon gaie.

Metchi-ijiwebisiwadjin kinidjanissiwag, kego nishkadisikegon; wabandaig eji-manadak ejit-chigewad; ginaamawig, enigok kishpin kitchi gego, tebibishko tchi dodansigwa. Neiab dash ijitchigewad, keiabi abiding, weweni, beka, nissitamoig eji manadadong ijawad, inig gaie tchi angwamisiwad, bwa kotagiindwa. Eko nissing dash manjissegewad, kawin keiabi gigi-towin inabadassinon, mitigons aiog, kema ta gibakwaigasowag, kema gaie kawin ta-wissini-siwag abiding; kego iwapi babamenimakegon mawiwad, kego gaie ganonakegon; nakawa ta-anwenindisowag, ki ga-bi-nansikagowag, ki ga-pagossenimigowag tchi bonigidetawegwa, ta-wawindamagewag dash tchi matchi-dodan-

-sigwa minawa. Mi nongom wawinge tchi odapi-negwa, gaie tchi nissitamoegwa ga-iji-kitchikashkendamiinegwa. Binish dash neiab matchi-ijiwebisiwad, kego minawa sanagisikegon. Mojag dash anawi dadibabamig binish apitchi bonitowad maianadak, binish gaie weweni anamiawad.

Mi sa minik ged-ikkitoian nongom tchi mik-wendamiiagog ged - iji - nitawigiegwa kinid-janissiwag, tchi debissatoieg kid espenda-gwak kid inendagosiwiniwan enassamid De-beniminang.

Ki ga-windamoninim anawi keiabi bejig ged-aioieg tchi kikenimegwa kinidjanissiwag ejiwebisiwad gaie gimodj ejideewad.

Anamiawag na? Weweni gaie na anamiawag kigijeb, onagoshig? Naningim na o nansikanawa webinigewin, iwapi gaie mino-gijitaidisowag na? Minwendamog na anamiang tchi ijawad gaie tchi pisindawawad mekateokonaien? — Bekish minwendamog na tchi anokiwad, ga-ishkwa-anokiwad dash, endaieg tchi abi-wad? — Kishpin iji-aiawad, beka aiag,

mamoiawamig Debendjiged : mino abinodjiwi-wag odeiwang , ki ga-minonaweigowag.

Kishpin dash anamiassigwa weweni ; kishpin wika eta wi-webinigewad, hawin gaie gjitaidi-sossiwag ; kishpin ijassigwa anamiang; kishpin minwenimassigwa mekateokonaien ; bekish gaie kishpin kitimiwad, kema kishpin min-wendansigwa endaieg tchi widabiminegwa ;... mi iwapi ged-iji-kikenimegwa eji matchide-ewad : gimodj ganage matchi-ijiwebisiwag ; gimodj o kitchi gagwedibenimigowan matchi-maniton , o ga-nopinanawan dash. — Waiba geget ki ga-wissagendamideeigowag. Angwamisiilog , wewib tchi nanainegwa , kishpin jaigwa osam wika awansinog !

III

TA - OJIBIWA , TA - MASINITCHIGASO NONGOM METCHI - NITAWIGIIND ABINODJI

Apitchi manabaminagosi, Ninidjanissidog, masinitchigan nongom ge-wabandainagog.

Kawin gi-windamawassi gwetch gego wika ondji anamiewin aw ketimagendagosid abinodji epitch agashiid; Kawin gi-kikendamoassi mashi tchi tchibaiatigoniged, gaie tchi ikkitod pagwana “ Nossinan gjigong ebijan ”, gaie “ Kid anamikon Mani ”, ano nanobibonagisid kema ningotwaswi ; kawin o sagitossin tchi anamiad, o sanagendan ; enamiassingin, kema awessinsing kekendansininig gego eshpendag-wak ijiwebisi : awi-niba, onishka, awiwissini ; kawin anamiassi. Pandigedjin anamie-

-wigamigong, dananagidon, bapi, anotch ina-kakeia inabi, ka gego inendansi, kawin weweni otchitchingwanitassi, kawin weweni namada-bissi, niba. Kawin gego o kitchitwawen-dansin. Kawin gaie o manadjassassin mekate-okonaien, mi go eta minik eji-gossad. — Mashkawigijwe, o matchi-wawinan Debendji-genidjin; agawa midassobibonagisi, jaigwa dash iji-batagijwe tibishko neshkadisid kitchi-ininiwish ged-iji-gijwepan.

Anish na? ka na o nanibikimigossin o nigi-igon? Anawi! O nigiigon dash kawin gwetch awashime o babamenimassassin, aiassnipan dash. Odapinaminid eta mitigong o pisindawan at-china; mi dash minawa waiba tchi ojimad gaie tchi bapinodawad.

Potch mojag agwatching aia, mi eta tchi wissinid giwed, mojag misiwe baba-bimibato, baba-pindige, baba-bapi, baba-bibagi, baba-migaso, baba-ombakamigisi, baba-gagibadisi, gajigakin, wenagoshingin, gaie tebikakin. Mojag o widjiwan aianshishan metchi-nitawi-giimindjin win eji-matchi-nitawigiind. Kiki-noamadiwigamig o jingandan, od ojindan

minik eji-gashkitod, anotch gaie ginawishki tchi ijassig, o giwanimotawan kekinoamagenid, o bataman, o kitisman gaie o ginawishkiman.

Ningotchi ijad, ningotchi pindiged, angwami-siiog, gego mijisha kego ta-atessinon gemissawendangiban; ki ga-gimodimigowa, gash-kitod; kego pagidinakegon kinidjanissiwag tchi widjodaminomawad, o ga-miganigowan, waiba o ga-matchi-kokinoamagowan maianadak gijwewin, kema dodamowin. Kinawa dash, ketchi-akiwensiwiieg, ketchi-mindimoiewiieg, dabibabamig, kawin ki ga-manadjigossiwa, ki ga-bapinodagowa.

Kishpin nondamegoban ekkitod, ki da-misk-wingwesim epitch-agatendameg, epitch winad-inig odenaniw. Winadini awashime naningim odee, awashime gaie winadini od ijitchigewin, gimodj, nopiming. Aw abinodji maminadisi, mashkawindibe, matchidee.

Mi dash nongom tchi abinodjiwissig keiabi, oshkinawewi nongom! oshkinigikwewi! Geget minwendam tchi ojimod, wassa tchi ijad. Anokit-age! Gashkitchiged gego, wabamig: jashag-wandjige, sagaswa, minikwe, nimi. Ojoniami

nongom ! Nijtana , nanimidana dasswabik od aian, agawa dash nanwabik minik o ga - bidon endad ondji pakwejigan , midjim . Ossan , ogin , oshimeian jashaginisidewan . Anish ! Potch gaie winawa , kawin o babamenimasssin ! Win dash o gi - gishpinamadison kakina gego wenijishing . Ketchitwawisingin ijinagosi bemossedjin onde - nang . Ka na o da - gi - ishkonomawasssin o nig - igon oshimeian gaie gego tchi gikadjissininid bebong ? Win nange ! kawin ki kikenimassiwa - wa mashi ! “ Nin na , inenindiso , nin ga ganawenimag kitchi anishinabeg ! kawin sa ! ”


Ki kitimagendagosim kinawa , wenidjanis - sidog gekaieg ! Geget anawi kid indowiniwa iweiwebak ! Wegenen ga - ondji - pagidineg aw metchideed , aw weodeessig , tchi inendang : “ kakina gego nin kitisimag inendagosiwag tchi jawenimiwad , nin dash ka gego nin inenda - gosissi tchi minagwa , tchi jawenimagwa... ” Gi - gagibingwemagad ki sagiiwewiniwa . Wegenen vendji , pabige ga - gashkitod aw matchi aiaawishens tchi nissitotang gego , wegenen ga - ondji - windamawassiweg weweni : “ Ate gijig ge - minindwa menodeedjig , ate anamakamig

ishkote ge-daji-tchagisowad metchideedjig beba-menimassigog o-nigiigowan?"

Aw weshkinigid ga-matchi nitawigiind, o banadendamian o kitisman, o banasomigon dash bemadisinidjin; o dibakonigon, gaie o banasomigon jaigwa Debendjigenidjin. Sanagad dash, kitchi sanagad tchi anwenindisod, tchi nanaidisod.



Jesus babamitage gaie anoki.



IV

TA-MASINITCHIGASO WINTAM WIN MENO-NITAWIGHND ABINODJI

Aw abinodjins kawin mashi gigitossi, jaigwa dash anawi od anamikawan Jesusan, kitchitwa Manian, kigijeb gaie onagoshig; minwendam tchi odjimad anamie - masinitchiganan, gaie tchi tchibaiatigonamagod o mamaian ossan gaie; gonima pabige weshki - gigitod o gawawinan Jesusan, jaigwa o sagian, ano agawa kikenimad.

Nongom dash weweni gigito, bimibato gaie endad. Wi anamia, anamiewinensan wi - kiki - noamawa, od aionan gaie mojag; gweshkosidjin, "bojo" od inan od Anjeniman genawenimig - odjin; wa - wissinidjin anamia, wa - nibadjin

anamia. — Gi windamawa naningim eji gana-wabamigod Kije-Maniton misiwe gaie mojag. Kawin o wanenimassín, o wi-minonawean dash. — Gego wenijishinsinog wa-ijitchiged-jin : “ Angwamisin, od igon ogin, ki gakashkendamideea Kije-Manito,” mi dash tchi bonitod. — Gego senagendang o ininaamigon ogin tchibaiatigonsan. “ Nibwakan, ninidjanis-sens, iw dodan ondji Jesus ga-nissind epitch sagiik.” Kema od igon : “ Mino ijitchigeian iw senagak, ki ga-minigo gego tchi awi-jawenimad ketimagisid awiia, kema ki ga-madjinin ana-miewigamigong wi-mawadissang kitchitwa Mani.” Mi dash mino abinodji eji-wikwatchi-tod tchi mino-dodang.

Mamakadakamig eji-sagiigosid aw abinod-jins, eji sagiad gaie o kitisman, mojag eji-batamitawad! Ningoting pangi gi-manjiwi, o gi-wabaman gaie o mamaian keshkendami-nidjin; mi dash ga-iji-migoshkadjideed, o gi-nasikawan, “ Bonigidetawishin” o gi-inan, “ kawin wika minawa, mama, ki wi-kash-kendamideeissinon.” Od odjiman gaie wewe-ni. — Kawin memwetch ta-kotagiassi; potch

kawin wika ondjita matchi-ijitchigessi ; mino-dee ; da-mawi odeeing gaie , kikendangiban gi - pitchi - manjissegwen . Ondjita o nanda-wandan eta wenijishing .

Kawin nishkadisissi ; o minweniman kakina widjabinodjiian , kawin o gikamassin , kawin o batamassin , o mino widjiwan meno-ijiwebisi-nidjin ; maianjiwinidjin dash kawin o wissokawasssin , kawin dash anawi o jingenimassin , o gagano damawan , o kitimageniman . “ Geget , inendam , kitimagisiwag igiw ; kawin o mik-wenimassiwawan Kije-Maniton , o mawiawan od anjenimiwan ; Jesus saiagiiang ninaw-ind ebinodjiiwiiang , jawenim , bonigidetaw gaie . ”

Minwendam gaie win tchi odaminod , minik dash eta anawi eji-pagidinigod o kitisiman . — Ningotchi da-ija , kishpin dash eta inenda-minid . Kawin gimodj gego o ga-dodansin , potch o kikendan eji-kasotawassigobanen wika od anjeniman genawenimigodjin gaie Kije-Maniton . — Mi dash gaie eji-giwanimossig wika ; mojag debwe . Wegenen gaie gedondji-ginawishkipan ? Mojag wi-mino-ijiwe-

-bisi; osam gaie da-agatchi giwanimopan, ka-win keiabi o da-gashkitossin mijisha tchi ganawabamad ogin oshkinjigoning; osam geget da-agatenindiso.

Eji-mino-inendang, eji-minodeed, mi gaie bekish eji-mino-gijwed. Kawin ganage wika batagijwessi. Mino-anjeniwan o nondagon, o minotagon gaie; wenijishing, enabadak, men-wendagwak gaie o dibadodan. Eji-mino-sagiad kakina anishinaben, mi eji-mino-ganonad, eji-mino-dajimad, eji-wi-minonawead. Eji-binideed, mi gaie eji-binadinig odenaniw. Kego gaie gego maianadak dibadjimokegon enassamid, pabige da-miskwanowe epitch agatendang. Kego wika banadjitokegon iw gwanatch wabi-gonens maiadjiging Debendjiged o kitiganensing!

Nindawatch weweni mindjiminidiso, kawin nanisanisiidisossi, ejitchigewad ketimishkidjig. Ganawabamig eji-minwendang wi-anokid. Agawa bimosse, jaigwa dash o wi-widokawan o mamaian, pangi nibi o bidon, missensan o pindigadonan, gego o sagakissiton eji-ki-kendang. Gego enonindjin, eta tchi nagad-

-jitod anokiwin, wewib, weweni gaie ano-ki. Tchi ajidemad dash enonigodjin ! kawin wika !

Waiba ta-mashkawisi eshkam, mi dash ossan tchi widjiwad eji-pagidinigod, mi tchi widoka-wad weweni. Aw sa abinodji nebwakad meno-deed gaie, migwetch od ineniman o kitisman bemiigodjin, mi wendji sagiad, mi wendji babamitawad ; gaie dash inendam : “ Apegish gaie nin meshkwat gashkitoian tchi anokita-wagwa ! O ! ged-iji-bapinenimoian nindeing gego tchi minagwa ge-gi-gashkitchigeian nin, nin tibinave ! ” Mi dash gaie iw ged-ijitchiged api geshkitod, mojag gaie minik ge-wabamad o nigiigon aking.

Aw abinodji-meno-nitawigiind kavin awiia o bapinodawassin, o manadjian kakina bemadi-sinidjin, memindage dash naganisinidjin gaie gekanidjin, gaie dash ketimagisinidjin. “ Nind ~~inendagos~~ sa, inendam, tchi ishpenimagwa naganisidjig, tchi babamitawagwa gaie ondji iw ga-iji-minigowad Debendjigenidjin gash-kiewisiwin tchi ogimakandagewad, o nabish-kawawan sa oma aking; gekadjig dash nin

gad-apitenimag ondji iw ga-iji-bimadisiwad ginwenj, gaie kikendamowad nibiwa gego neb-wakadendamowin kekendansiwan, gaie dash gi-anokiwad ginwenj tchi widokawawad widjanishinabewan; gaie dash nongom jagwiwiwag, kawin keiabi o gashitossinawa tchi widoka-sowad; bekish nin ga-jawenimag, gaie nin gamanadjia. Winawa dash ketimagisidjig nin wi-sagiag, nin wi-mino-babamenimag gaie : mi sa winawa saiagiigowad Jesusan awashime, mi sa winawa enendagosidjig tchi kitchitwa-wisiwad gjigong awashime.”

Epich-nandawendang gego wenijishing tchi gashitod ningoting, wi-inabidisi sa go, min-wendam tchi kikinoamagosid. Osagian kekino-amagodjin, weweni o pisindawan, migwetch od ineniman; kawin kitimissi, kawin manjini-niwagisissi tibishko nibiwa minawa anind abinodjiiag. Ejadjin kekinoamading, kema wagiwedjin, kawin ningotchi ombakamigisissi, bisan abi, gwaiak bimosse enassaminid Kije-Maniton.

Wenagoshingin pindig aia, o widabiman o kitisman, o windainawan weweni kakina gego

ga-ijiwebisid kabe-gijig, odamino pangı, pangı keiabi anoki, kikinoamadiso, anamia weweni, awi niba dash.


Enamiegijigakin anamiang ija, weweni otchi-tchingwanita, beka namadabi, wi-ganonad Jesusan, gaie kitchitwa Manian. Kishpin gaie wawenabamind tchi anokitaged Anamiewigami-gong, ano tabassenindisod, gaie “ kawin nin de apitendagosissi ” inendang, anawi kitchi jawendagosi tchi pagidinind besho tchi nasikang Ketchitwawendagwak. O kitchi-ishpeniman gaie mekateokonaien, o sagian, o babamitawan. Mi sa aw, inendam, ga-assind oma tchi nabishkawad Jesusan, mi aw kekinoamonang enendagwak tchi debwetamang, gaie tchi ijitchigeiang, mi aw genaweniminang eji-otchit-chagoiang, mi aw maninang kitchitwa Sacramania, mi aw geganodamonang, mi aw maiama-wi-mino-dodonang, maiamawi sagiinang. — “ Nosse ” od inan, kawin gaie anisha, mi sa geget epitenimad.

Geget, geget, Ninidjanissidod, sagiigosi aw abinodji meno-nitawigiind. Besho, apitchi besho o kikinowabaman Jesusan.

Mi dash ged iji - aiawad kinidjanissiwag kish -
-pin wi-nitawigiegwa eji-windamagoieg nongom
manda - masinaiganing , eji - gagikimigoieg gaie
mojag anamiewigamigong. Apegish iji-nibwak -
-aieg !

KEGO

MATCHI-MINIKWEKEGON!



KEGO

MATCHI - MINIKWEKEGON!



ANISSADISIIOG, SAIAGIINAGOG NINIDJANISSIDOG !

Kishpin awiia anjeni gijigong ondji bi-ijapan tchi iji-ganonineg : Anishinabedog, nin ki-kandan eji-kitimagisiieg, nin kikandan ejiwebak kid odenawiwang : anind eji-kitchi-bakadewad, anind eji-akosiwad, anind gaie eji-nonde-nibowad. "... Kishpin keiabi ikkitopan : " Nin kikandan anind eji-kitimagendagosiawad o widigemaganiwan onidjanissiwan gaie : kawin minwendansiwag endawad tchi abiwad, mi dash eji-baba-ijawad, eji-matchi-dajindiwad, eji-gikandiwad, eji-migadiwad, eji-jingenindi-

-wad, anind gaie eji nissidiwad!" Ninidjanis-sidog! Kishpin ininegoban iw aw anjeni, anin ged-iji-nakwetawegoban? Kawin na debwessi? Debwe sa go, kashkendagwad iw eji-debwed.

Win dash kawin mashi bonwewidansi. "Nin kikendan, kid igowa, eji-matchi-kopadjiinegwa nibiwa waiabishkiwedjig, abinodjiing kid apite-nimigowag; nin kikendan eji-matchi-dodoneg-wa, anind eji-waiejiminegwa!..." Ninidjanissid-og saiagiinagog! nondameg iw, kawin ki min-wendansim, gega gonima ki nishkenimim. Geget go sanagad, da-agatendam gaie awiia tchi iji-dodawind. Anawi dash, anin enen-dameg? Ka na debwessi aw anjeni? Geget sa go debwe! — Nongom dash inenimig aw anjeni tchi gi-minind gashkiewisiwin tchi agindang iw masinaigan ima wejibiiigadenig bemadisidjig o batanowiniwan, kakina gaie minik enenda-gosiwad tchi ondji kotagiindwa ogidakamig kema gaie kagige-ishkoteng,... mi minawa enitagosid: "Anishinabedog, niningisegisiog, mawig gaie apitchi, gi-kitchi-bata-ijiwebisiieg osam nibiwa dassing! Kin, kin, kin gaie ketchi-bata-diian, kin wendji-mawiwad ki widigema-

-agan, kinidjanissag, enamiadjig, anjeniwag gaie, ojibiigade oma kid anosowin, anamakamig tchi wissagakisoian kishpin anwenindisossi-wan. Niningisegisiog : ajegwa nin wabama wedi ishkoteng matchi-manito menawanigosid ojissitod od anokasowinan tchi kotagiineg.".... Ninidjanissidog, anin ekkitoieg? anin enenda-meg? Nin, nin kashkendam epitch sagiinagog, gega gaie nin maw waiabandaman eji-kitimagi-siieg, eji-otchitchagoieg gaie dash eji-owiia-wiieg. Kakina kid owikanissimininim : kawin bakanisissi win Weossimag, win gaie Weossi-meg, Kije-Manito sa baiejigod kid oossimanan: mi dash ged-ondji-nandawendamamban apitchi tchi mino-aiaieg, eji - gashkitong oma aking, tchi mino inenimigoieg, tchi mino-dodonegwa bemadisidjig, memindage dash tchi gashkitama-soieg minawanigosiwini-bimadisiwin gjigong: Anawi nin wabandan eji-kotagisiieg, eji-kiti-magisiieg, eji - bata-diieg : mi wendji - kash-kendaman.

Ki kashkendam gaie kinawa, ondjita gaie ki tabassenindisom. — Anawi [dash, Ninidjanissidog, kego banadenindisokegon, pagosse-

-nimig dash Kije-Manito tchi widokoneg, tchi kikinoamoneg ged-iji-gashkitoieg tchi nanaissitoieg nibiwa maianadak; songan gaie gjendamog tchi ijitchigeieg kakina ged-iji-nissitotamanoineg tchi ondji mino-bimadisiiieg, tchi jajawenindiieg, tchi apiteniminegwa kakina bemadisidjig gaie anjeniwag, win dash gaie Debendjiged tchi jawendami-ganawabamineg.

Mi nongom, Ninidjanissidog, enenimid Kije-Manito tchi wi-anokijan tchi windamonagog weweni bejig wendjibamagak nibiwa-dassing iw eji-kitimagisiieg. Kitchi nibiwa anishinabeg naningim bakadewag, nibagwewag, pingwas-hagidiwig; kitimagisiwig sa go, wegonen wendji? — Matchi minikwewag sa. —

Kitchi nibiwa anishinabeg akosiwig, nonde-nibowag; wegonen wendji? — Matchi minik-wewag sa. —

Nibiwa anishinabeg o kitimagiawan o widigemaganiwan, onidjanissiwan gaie; wegonen wendji? — Matchi minikwewag sa. —

Nibiwa anishinabeg gikandiwig, migadiwig, naningotinong gaie nissidiwig; we-

-gonen wendji? — Matchi minikwewag. —

Anishinabeg kopadjiaiwag, abinodjiung apit enimawag, waiejimawag; wegonen wendji?
— Matchi minikwewag. —

Nibiwa Anishinabeg o nishkiawan Kijemaniton, kitchi-bata-dodamog, gashkitamasowag gaie anamakamig tchi apaginindwa, wegonen wendji? — Matchi minikwewag.

Matchi minikwewin, giwashkwebiwin : mi iw, Ninidjanissidog saiagiinagog, mi bejig wendji-kitchi-kitimagisiieg. Kego agonwetawishikegon, nondawishig dash weweni, ki gamissabandininim iw. Nitam dash anamiada, pagossénimada Jesus ga-nibagwed tchibaia-tigong, ka gego dash, mi eta winsop jiwabo gaie ga-odapinang, tchi jawenimineg matchi minikwéwin eji-manadak tchi nissitotameg, tchi webinameg gaie ondjitta.

Mani, wegimik Jesus, wegiminan gaie, wido-kawishin tchi gashkitoian weweni tchi windamawagwa ogow anishinabeg saiagiadwa, saiagiagwa gaie nin, ged-ijiwebisiwad nongom tchi nodjimoindwa, mi sa tchi jingendamowad tchi ojindamowad gaie matchi minikwewin.

I

Nitam, Ninidjanissidog, nind ikkit; kitchi nibiwa anishinabeg naningim bakadewag, ping-washagidiwag, kitimagisiwag sa : wegonen wendji? Naningim ondji minikwewin. Pisinda-wishig weweni.

Nijwaiagisiwag anishinabeg ningotchi wede-todjig : meshkawisidjig, nenamisidjig gaie ; mi sa ininiwag, oshkinaweg gaie meno-bima-disidjig,... minawa dash gekadjig ininiwag, ikwewag, abinodjiiag, kakina gaie aiakosidjig. Sasagwana dash, endanakiwad anishinabeg, meshkawisidjig kitimagisiwag ondji gi-minik-wewad ; neninamisidjig dash iw ondji, wido-kagossigwa iniw meshkawisinidjin neta-minikwenidjin, enendagosinipan tchi widok-agowad.

Anishinabe meno-bimadisid, meshkawisid gaie, tchi kitimagisissig, nijwaiagad eji-deb-isseg, enendagwak gaie : nitam o da-gash-kiton tchi anokitasod, kema gaie tchi ano-kitaged, eko nijing dash inendagwad tchi wi-nansikang iw anokiwin ga-mikang.

Nongom dash, anin ejiwébak? Eji-kikenda-mowad winawa nebvakadjig, tchi minosse-magak anokiwin wegötogwen, kema kitigewin, abidekamig aw enokid o ga-nandakikendan od anokiwin, o kitigan : kema oma o ga-nitawigian mandaminan, kema opinin, kema gaie pak-wejiganiminan ; inendagosi gaie tchi babamendang weweni anin, anin api gaie ged-oni-jishing tchi bigwakamigibidjiged, tchi pagidi-nigeg, tchi pashkwashkijiged, anotch gaie gego dinon. O gashkiton na dash neta-minik-weshkid tchi babamendang iw weweni ? ka-win. Win, neta-minikweshkid, awessiing ijiwebisi ka gego kekendansininid ; mi go gaie api gawashkwebissig, pangi eta nissitotam.

Mi ekkidot bejig kitchi mekateokonaie, ga-apitchi-nibwakad, kitchitwa John Chrysostome : “ ka gego nawatch banadjiiwe-

-magassinon, eji-banadjiiwemagak minikwesh-kiwin ; iw ondji sa wiiassimang inabaminagwia otchitchagoma, apitchi gaie gagibingweā, ka gego o gashkitossin tchi de-nissitotang. ” Mi ga-ikkidot maba kitchi-mekateokonaie. — Anin dash ekkitomagadinig Kije-Manito o masinaigan ? “ Anishinabe gi-inabaminagwia awessiing gego nessitotansininid. ” Awenen dash kinawa endashiieg, Ninidjanissidog, ged-iji-maminadisid tchi agonwetawad Kije-Maniton ? — Geget go neta-minikwed, gaie go epitch giwashkwebissig, pangi eta od inenda-mowin o dibandan.

Pisindawishig : ki ga-windamoninim iw, awetchigan nin gad-aion. Madwewetchigan kakina ki kikendanawa enabadjitchigadeg ana-miewigamigong tchi nagamong. Makak eni-wek metchamagak ; pindjai dash atewan kitchi nibiwa nepagakin ozawabikonsan ; mi dash ozawabikonsan eji-sagakissing tchi mad-wewemagak weweni kishpin awiia bodadjiged wi-nagamod. Ki gagwedjimininim dash non-gom : “ tchi madwessing, anin enendagwak tchi dodaming ? ” — Ki nakwetawim : “ tchi boda-

-djiged awiia ozawabikonsing." — "Wewe-ni.... Kishpin dash bigoshkagin ozawabi-konsan, ta-madwessinon na?" — "Ka bapish." — "Minawa,... Kawin bigoshka-magassinson ozawabikonsan, banadadon eta, ta-madwessinon na!" — "Gonima sa, anawi dash pangi, gaie ta-kitchi-jingitagwadon."

Ninidjanissidog, ejiwebak matchi madwe-wetchigan, mi ejiwebisid neta-minikwed. Ki-kendamowin sa go, mi tibishko madwewetchige-win. Otchitchagoma tchi inendang, abideka-mig inendagosi (megwa aking bemadisid) tchi aiod wiiawima. Wiawima dash, memindage oshtingwanima, mi tibishko makakons-ima etenig nepagabikagin ozawabikonsan; od-atissiwagomag dash oshtigwanimang eiadjig, mi tibishko medwewegin biwabikonsan. Nong-om dash : kishpin awiia akosid odatissiwan kawin o gashkitossin weweni tchi kikendang gego, eji-gashkitossig awiia tchi madwewet-chiged weweni kishpin banadjitchigademaga-kin nepagabikonsan.

Kitchi babamendagwadini geget, eji-wabanda-meg, Ninidjanissidog, awiia tchi banadjitossig

odatissiwan , kishpin wi-kikendang gego , kish-pin wi - dibendang od inendamowin. Neta-minikwed dash o kitchi-banadjitonan odatis-siwan.

Kakina mashkikwininiwag ki kikinoamago-nanig iw : “ Kishpin awiia, ikkitowag, odapi-nang ishkotewabo , nitam tanassag od ombaji-kagon iw minikwewin , waiba dash o mojiton tchi madji-giwashkwed , kakina gaie wiiawing nishiwanadakamagadini : oshkinjigon o waieji-migonan : kakina bimiskokamagad , inendam ; otawaganan gaie manjissemagadon ; kakina go odatissiwan banadjitchigadewan , memindage onow ged-aiopan tchi kikendang , epitch gag-disid nokisid gaie ima. ” — Mi ekkitowad mashkikiwininiwag ; mi gaie wendji awessi-ing ijiwebisid gawashkwebid : kawin o gash-kitossin sa go tchi kikendang gego ; mi go gaie api gawashkwebissig apitchi , mojag od aksin odatissiwan ; kawin gaie gwetch wika o gakikendansin gego , binish tchi nodjimod , kawin dash ta - nodjimossi kishpin keiabi neta-minik-wed ishkotewabo .

Mi , Ninidjanissidog , ga-ondji-ikkitoian :

neta-minikwed kawin o nitawitossin weweni tchi anokitasod.

Awia dash wa-anokid weweni, kawin iji debissessininini tchi kikendang eniwek nibiwa gego; inendagosi gaie bekish tchi mashkawisid, tchi songideed. Kitchi sanagad sa ningoting anokiwin. Win dash neta-minikwed kawin bapish songideessi; kawin gego od ojindansin eji-ojindang sanagisiwin, anokiwin; bejigwan eta nendawendang mojag, jowendamowin; jagodee sa go... Gonima, tchi bwa minikwed, gi-mashkawisi; anawi, ged-iji-windamonagog panima nagatch, eshkam eshkam ta-pangi-shewagadini iw geshkiewisid epitch minikwed; waiba gaie ta-ninamisi wawinge, aiakosingin ta-jagwiwi. Anin dash ged-iji-anokipan! Anin dash ged-iji-gashkitopan wegotogwen tchi wikwatchitamasopan, tchi bakadessig, tchi kitimagisissig? Anindi ged-ondinangiban mid-jim, agwiwin, kakina go gego eji-manesid? Ta-bakade, ta-pingwashagidi, ta-kitimagisi; od indowin, od indowin eta.

Ganabatchi o gad-anokitawan awiia ged anonigodjin, mi dash tchi dibaamagod? Kid

inenimawa na, Ninidjanissidog, nebwakad awiia tchi minwendang wi-anonad gawashk--webinidjin? Kawin ganage. Kishpin iji gash--kitod, kawin o gad-anonassin; anonad dash, pang o ga-dibaamawan, kema waiba o ga-giwenajawan.

Gi-onijishinini dash, nind inendam, ga-iji-dibaamawind. Mino-ijiwebisipan o da-ganawe-niman o joniaman; neta-minikwed dash anin ejiwebisid? Pabige pindige signigewi-gamigong, minikwe gaie, o gishpinadonan gaie omodaian tchi minikwed endad. O nasika-wan widjikiweian, o minaan, waiba kakina gega o joniaman o gi-tchagiminikwadan. — Gonima gaie nibiwa gegibadisidjig mawand-jiidiwag, ishkotewabo dash signigade; mini-kwewag, dananagidonog, bapiwag, eshkam eshkam minikwewag, waiba dash kawin bejig jomnakens od aiainsinawa... Ga-ishkwa anoki-wad, ga-ishkwa-aiekosiidisowad wi-ondina-mowad gego midjim kema gego bakan, wabamig ejinagosiwad ani-giwewad. Awashime ganabatch, awashime nongom kitimagisiwag, epitchi dash maiadjawad. Agatendagwad, geget

go apitchi kashkendagwad ! Gi-minikwewag, nongom dash bakadewag ; gi-jowendamog, gi-bapiwag, wabang dash ta-mawiwag !.... Kawin dash winawa eta !.... Oh ! matchi aiawishidog ! Kinawa neta - minikweieg, geget ki matchi-deem !

Mikwendamog : api ga-madjaieg wi-anoki-ieeg, endaieg ki gi-naganawag ikwewag, ki widigemaganiwag, abinodjiag gaie, kinidjan-issiwag ; gonima ki gi-naganawag akiwen-siag, mindimoieiag, aiakosidjig, gekadjig, mi sa kossiwag, kigiwag gaie. Kitimagisiwag, ninamisiwag, kawin gashkitossiwag tchi anokiwad ; kiiawiwan eta od apenimonawan. “ Nin kitimagi-gisimin , nin bakademin , inendamog ; anawi nin widigemaganinanig, ningwissinanig gi-awianokiwag, waiba dash ta-bi-giwewag , nin gad-ashamigonanig , nin gad-agwiigonanig . ”

— “ Kego mawiken , od inan wegimind onidjanissan , kego mawiken bakadeian , ninidjaniss ; nongom onagoshig koss ta-aia endai-ang , o ga-bidon dash wenijishing midjim . ”

— Abinodji dash boni-mawi ; wegimind win od agoskanan ; mamidawendam tchi giwenid

wewib o widigemaganan. O bian.... Kawin dagwishinsiwan... mi eta kitchi wika, tebikak. Abinodjiiag dash, aw gaie wegimind o nasika-wawan, od anamikawawan, gego midjim gaie o nandotamawawan. — Gego dash od ashami-gowan na? kawin! bapinodawawag, pakitewa-wag,..... mawiwag, bakadewag!... Win dash ga-minikwed, metchideed, jingishin, niba : wabang dash, gaie win, ta-bakade.

Gonima, Ninidjanissidog, ki gad-ijim : “ kishpin awiia pangi eta minikwed, kawin o tchaginassin kakina o joniaman.” Kawin kid agonwetossinoninim, megwa pangi minikwed ; anawi kid ininim : gega mojag awegwen maiadjii-minikwegwen, nitam pangi eta od odapinan, eshkam eshkam dash nibiwa o gad-odapinan, waiba kitchi nibiwa : gegapi gaie ta-giwashkwebi. Mi gega mojag !

Nongom dash. Ninidjanissidog, nakweta-wishig. Nin gi-debwe na ikkitoian : nibiwa anishinabeg bakadewag, kitimagisiwag gaie ondji minikwewin ? Geget go nin gi-debwe. —

Mi dash ged-iji debissegiban iw ka wika

minawa tchi nansikansiweg ishkotewabo. Anawi kitchi-nibiwa gego minawa ki ga-windamoni-nim panima nagatch tchi wi-ojindameg apine mojag.

Anamiag dash enigok, tchi nissitotamoineg weweni Kije-Manito iw eji-gagikimigoieg non-gom, tchi takwendameg dash, tchi babamen-dameg, tchi gjendameg gaie ka wika minawa tchi tanginansiweg iw ged-ondji-kitchi kitima-gisiieg oban : ishkotewabo !

II

Ajegwa, Ninidjanissidog, ki gi-missabann-daininim eji-kitimagisiwad nibiwa anishinabeg ondji nita-minikwewad; nongom dash nind ikkit: kitchi nibiwa anishinabeg akosiwag, nondenibowag matchi-minikwewin ondji.

Manda dash weweni tchi nissitotameg, ki ga-windamoninim nakawe anin nita ojitchigademagak Kitchi-mokoman-aking, oma gaie Moniang inakakeia iw ishkotewabo neta-minikweieg. Kitchi-onijishinodog, kid inendam ganabatch, iw wendji ojitong? Kawin sa dash! Pisindamog weweni iw ekkitowad winawa ininiwag ga-anokiwad nibiwa dasso bibon tchi ishkotewabokewad.

Ikkitowag; “Ga-ishkwa-onswawad enokidjig pakwejiganiminan, o pindigewebinanawan.... wegonen? kisibigaigan, pijikimiskwi, wababi-

-gan, pingwiwabo, minawa bejig nibowini - pitchibowin couperoze edaming, minawa dash nibiwa iw matchi-nibish eiowad wi-ningabiki - samowad ozawabik. Kawin wika da-ijiwebas - sinon tchi ganandawisiwad wedapinangig iw minikwewin ; nin pakakendamin gaie ka wika gego wenijishing tchi ondinigadessinog." Mi sa winawa ekkitowad neta - ojitodjig iw ishkotewabo, api wa-debwewad.

Geget anawi, ondjita - ishkotewabo, jominabo gaie bakan ondinigade ; osam dash da - sanaga - ginde, kawin gaie o da-gashkitossinawa neta - danissigog tchi gishpinadowad ; mi eta ketchi - danidjig geshkitowad tchi minikwewad ondjita ishkotewabo : mi wendji - atawewad signige - wininiwag iw matchi nibish ga - dibadodaman nongom, kinawa dash ga - minikweieg. — Kawin kid - inendansimwaban iw, anishinabedog.

Geget dagomagad wenijishing jominabo , kawin dash oma odenang , kawin oma Ontario , kawin gwetch Moniang , kawin gwetch Kitchi - mokoman - aking : mi eta kitchi agaming endan - akiwad Wemitigojiwag gaie minawa anind Eshpaiowag kema gaie Italiag. Wedi weweni o

nitawigitonawan jominatigon, jominabokewag gaie weweni. Onijishin gaie iw minikwewin, kishpin awiia pangi eta aiod; kitchi nanisanad dash, kishpin osam nibiwa.

Nongom dash anin enendamowad mashkiki-wininiwag? — “ Ka gego dagossinon, nind apitchi-kikendamin, ikkitowag, nawatch ged-inabadendagwakiban tchi ondji-mino-bimadisi-wapan anishinabeg, tchi ondji-angwanagwa-kiban gaie nibiwa akosiwin, ged-iji-inaba-dakiban dash ka wika tchi minikwessingiban gego gawashk ebishkagemagak.” Awenenag dash winawa iw ekkitodjig? Mi sa Alexander Jackson, kitchi-ogima o mashkikiwininiman, John Crampton ga-kikinoamawad wa-mash-kikiwininiwinidjin, nimidama gaie bekani-sidjig kitchi mashkikiwininiwag Jaganashi-aking endanakidjig. — Minawa anind : ‘ Nina-wind wa-atoiang nind anosowinininan oma, songan nind ikkitomin : ishkotewabo jominabo gaie kawin ganage inabadassinon, gego weni-jishing tchi minokagowad meno-bimadisidjig : nind inendamin dash, gega mojag ta-banadjiiwe-

-magadini. Apegish angwanagwak matchi-mi-nikwewin tchi mino-bimadisiwad anishinabeg, gwaiak tchi ijiwebisiwad, tchi minwendagosiwad gaie. Ninawind sa, meshkikiwininiwiiang. "Nijtana dash anosowinan atewan.

Tetibishko gi-ojibiigewag nijtana-ashi-niswi mashkikiwininiwag Brighton eiadjig, midaswi-ashi-nij Bradford eiadjig, nissimidana-ashi-nij Worcester eiadjig, nijtana-ashi-nij Lincoln eiadjig, kitchi nibiwa gaie minawa. Kakina dash inendamog iw ga-ikkidot mamba kitchi-mashkikiwinini, Sir Astley Cooper: "Gashkito-wapan ketimagendagosidjig anishinabeg tchi wabandamowapan, nin eji-wabandaman, okonimang enapineng, eji missidjing, eji-akosing odatissiwagomang, naita iw ondji gi-gondaming matchi nibish, geget go nibowini-pitchibowi-ning o da-apitendanawa ishkotewabo."

Mi sa ekkitowad maiamawi kikendassodjid : meno-bimadisingin kawin inabadassinon tchi-minikweng gawashkwebishkagemagak minik-wewin ; gega mojag dash od inigaigon wedapi-nang, mi go gaie naningim api wedapinang apitchi pang.

Geget, Ninidjanissidog, oma nakakeia, non-dagwad sasagwana : jominabo, ishkotewabo gaie inabadadon naningotinong, kishpin pangi odapinigadeg. — Mano, mashkiking ta-apiten-dagwad, mashkiki dash iw nanisanendagwad; angwamisiilog tchi waiejimigossiweg. Ni-biwa bemadisidjig ga-ininegwa mano pangi tchi minikweieg anisha tchi minokagoieg, kawin washime gego o kikendansinawa epitch dash kinawa. Gonima gaie iw gi-ondji-ikkitowag, wi-minikwewad gaie winawa, mi dash ejia-waiejindisowad ondjita ; kawin bapish nibwa-kassiwag, kego babamenimakegon; debwetawig dash maiamawi-kikendangig meno-ijiwebisid-jig kitchi mashkikiwininiwag.

Keiabi gego tchi kikendameg ejii-nishiwi-magak matchi minikwewin. Bejig Jaganash ga-assindiban tchi ganawendjigadeg mino-ijiwebisiwin, kitchi odenang Quebec, ga-dibakoni-gewininiwid gaie, inendagosiban tchi awi-ganawabamad kakina sesika ga-nibonidjin kitchi odenang tchi godji-kikendang iw ga-on-djinened. Gi-ojibiige dash : “ Kashkendagwad iw wa-mijishawissitoian nongom : gega kakina

bemadisidjig atchitchikana nebodjig, nessidis-
-odjig gaie, iw ondjinewag, gi matchi-minik-
-wewad. Sasagwana ikkitom : aw ininiwban
gi-ondji-nibo, o mishkwim osam sesika gi-
pindigemagak winindibing, kema gi-miniwa-
-pine, kema kitchi nibiwa miskwi o gi-jashi-
-gagowadan, anotch gaie minawa gego iw dino.
Waiejindisom dash ekkitongin. Aw inini sa
gi - nissidiso gi-minikwed : kishpin ganawa-
-bandjigadenig wiiaw, tchi gwaiakwendamo-
-wad mashkikiwininiwag namandj ga-inapi-
-negwen, mijisha nagwad matchi minikwewin
tchi gi-ondji-nibod."

"Nomaia, ikkito keiabi mamba dibakoni-
-gewinini ga-inotaweg nongom, nomaia nin
gi-nandomigo tchi nagatawabandamawag bejig
akiwensi ga-nibopan pitchinag wiiaw. Mamba
akiwensi, kiwen, mojag minikweban. Enas-
-samian dash, mashkikiwinini o gi bakinawan.
Nin gi-kitchi-mamakadendamin dash iw ga-
-wabandamang : kakina okon tchagideniban.
Mi dash geget enanokimagak ishkotewabo ! "

Mi ge-iji debisseg nongom, Nin idjanissidog,
tchi nanisanendameg kakina gego matchi nibish

gawashkwebishkagemak. Akosiwin ki jingen-danawa; nibowin gaie minik eji-gashkitong ginwenj ki wi-ojindanawa: pisindamog dash iw ekkitowad kekendassodjig meno-inendangig; nibwakaiog gaie, kego minawa gondankegon matchi minikwewin!

Minawa gego oma nanagatawendamog. Ki-nidjanissiwag ketchi-sagiegwa sasagwana non-de-nibowag gaie winawa; kema ninamisiwig, mojag akosiwig; wegonen dash wendji ijiwe-bak? kawin bejigwansirion eta iw; mi bejig anawi: ki gi-nita-minikwenawa ishkotewabo naita bwa mashi aiawad igiw kinidjanissiwag.

Iw ikkitowag mashkikiwininiwig. Mi gaie ekkitomagak ketchitwawendagwak masinaigan, “Mino mitig ondji-nitawiginon wenijishingin wiiagiminan; matchi mitig dash ondji-nitawigi-non matchi wiiagiminan. Wenijishid mitig kawin wika da-ondji-nitawiginsinon matchi wiiagiminan, matchi mitig dash kawin wika ta-ondji-nitawiginsinon wenijishingin wiiagi-minan” Mi tibishko, Ninidjanissidog; matchi wenidjanissidjig kawin wika o ga-nitawigias-

-siawan wenijishinidjin abinodjiian ; wenid-
-janissidjig aiakosidjig odjitawang, eji-nita-
-akosiwad menikwedjig, anin ged-iji gashkito-
-wapan tchi ondadisiawad meno-bimadisinidjin
abinodjiian? Mamakadendagwad nange tchi mi-
-nindwa igiw abinodjiag, bwa mashi nigiwad,
gego maianadadinig ged-ondji-akosiwad apine
kema gaie ged-ondji-nibowad waiba.

Nanagatawenindisoioig, kinawa wenidjanis-
-siieg, nakwetamog gaie kideiwang. Wagonen
ganəbatch ga-ondji-akosid mamba kigwissiwa,
kidanissiwa saiagieg? Wagonen ga-ondji-nibod?

— Kid indowiniwa ganabatch ; kid indowiniwa
geget, kishpin nita-minikweieg !

Ambe ! Ninidjanissidog, kid inenimininim
nongom tchi wi-tanginansiweg ganage iw ne-
-shiiwemagak ishkotewabo wendji-kitimagisiieg,
ga-ondji-akosiieg, ga-ondji-nonde-nibowad
nibiwa ; iw wendji-kitimagis:wad kinidjanis-
-siwig, wendji-ninamisiwad, wendji nibowad !
Apegish iji-jawenimineg Kije-Manito tchi iji-
-gijendameg enigokodeeieg ; apegish gaie songi-
-deeshkoneg tchi ijiwebisiieg eji-nandawenda-
-meg nongom !

III

Nibiwa anishinabeg o kitimagiawan o widige-
- maganiwan onidjanissiwan gaie : wegonen
wendji ? Matchi - minikwewag sa.

Pisindamog weweni , Ninidjanissidog, ga-iji-
- webak níngoting. Gonima anind jaigwa o gi-
wabandanawa endawad wassagendagwak iw
dino. Mi sa :

Ningoting , Mani-gijigadoban , kitchi-niska-
- dadogoban. Ikwe bejig namadabigoban keti-
- magak wigiwaming. Ano kitchi-pakakadosod ,
gaie ketchi-kitimagisingin ijinagosid , weweni
keiabi nagwad gi - gwanatchiwigobanen waiesh-
- kat. Nagamo sibiskadj , kashkendagwad gaie
eji - nagamod wi - abisiwimad abinodjiian ketchi-
mawinid.... Besho aia bejig ikwesens genawa-
- bamad ogin gego wi - pagossenimad tchi wis -



Gawashkwebid o kitimagian o widigemaganan.



-sinid. Aw weginind odee moshkineni ossita - -wendamowin: o wikkwachiton anawi pangitchi jomingweawad onidjanissan. Tchi kasod ejisasisibingwed, ikkito naegatch: "Saiagiinan nindarissens, waiba ta-bi-giwe... mi dash nin mino ikwesensim tchi-onagoshi-midjid gego wenijishing".....

Waiba dash geget bejig kwiwisens o pakanishkwandem, pindige dash. Gwanatchiwi gaie win: wiiagad anawi ejikitimagadinig wiiagassiman ga-bisikang. Mawi, ogin ganawabamad, od inan dash "Mama! kawin awiia ki gi-wi-awiigossinan gego. Koss, ikkitowag kakina, koss mojag minikwe! iji tchi anissadisid, mi dash tchi dibaamönang minik jaigwa mesi-naiged."... Aw dash ketimagendagosid kwiwisens kawin awashime gego gashkitossi tchi gitod, sasasisibingwe...

Aw weginind iwapi wi-banadendam, osam agatchi, osam wissagendamidee.... Tchibaia-tigon egodjinid gibikiniganing o ganawabaman ginwenj...; pangit o mashkawisiigon minawa, od inan dash ogwissan. "Ambe, Edouard, kego banadenindisossida. Nandomada Debendjiged;

ki ga-kitimagenimigonan, ganage pakwejigan minik eioiang endassogijigak. Minawa ki ga-madja. Wabang ta-anamiegijigad; geget go ki ga-gawanandamin, ijassiwan minawa non-gom endawad kid inawemaganinanig, tchi nandotamawadwa wa-midjiang. Kikenimi-nangwaban eji-kitimagisiiang, ki da-wi-jawenimigonanig. Ambe! Edouard, songideen!...”

Mino kwiwisens o wikwatchiton tchi kadod eji-kotagendang iw eji-gagwedjimigod ogin: onowan dash waiba miskwiwan epitch anokid wi-jagodjiidisod. “Taia, mama, od inan, anin iw eji nandawenimiiian? kawin wika! kawin nin de-gashkitossi! awashime nin da-minwendam tchi bakadeian, tchi gawanandaman. Mama, ki pagossenimin, kego bapijimishiken minawa tchi baba-nandotamageian!” Megwa dash gigitod, gibingweidiso, epitch agatchid, epitch gaie gibendang!....

Ginwenj! Kawin awiia wigwaming, kawin awiia gigitossi, binish dash win bekaded ikwe-sens tchi pagossenimad ogin: “Mama, od inan, kid gad-ashamin, kid ijinaban, bi-giwed Edouard; nin bakade, mama, ashamishin pang

pakwejigan. Nin gi - matchi - dodamidog na , mama ? mi na wendji mijissiwan gego midjim nongom gijigak ? Mama , nind akos !.... We - goneen dash wendji - mawiiian ? ” Aw wegimind od ajodinan onidjanissan o kakiganang , kawin o nakwetawassin , kitchi mawid.

Mi dash nongom Edouard ga - iji - datagikwenid.... wabingwenagosi neiab :... mi pitchinag atchina ga - iji - migoshkasitagosid : nongom min - jinawesi ... mashkawendum , o nasikawan ogin , o gwashkwanodawan okweganining , od odjiman gaie : “ Mama saiagiinan , od inan , bonigide - tawishin eji - pagosse niminam kawin nin kikendansinaban ekkitoiamban. Kego mawiken Mono , nongom nin wi - madja , nind awi - baba - nandomatage ; kawin awashime nin ga - matchi - dodagossi , iw dash ga - iji - matchi - dodagoian jaigwa pitchinag. Ning ! Ning ! Songideen , abisiwisin ! gagano damawishin dash nongom , nind awi - nadin pakwejigan . ”

Mi dash eji - wissagendam ideed aw wegimind , eji - ajodinad ogwissan okakiganang , ikkito gaie . “ Edouard ningwiss , nin da - minwendam tchi pagidinaman nin bimadisiwin tchi ikonamawag

kotagendamowin ningwissensim ga-babamita-wid mojag, ga-kitchi-sagiid gaie.... Anawi (iwapi od inoamawan oshimeini) anawi, winawa ondji ki gad-ija, keiabi ningoting, nciab gaie ki gwabandaiwen eji-minodeeian." — Gi-bonwewi-dam; ... O ganawabaman dash ogwissan.... Mi dash eji-madjad mino-kwiwisens...

Win dash aw ketimagisid ikwe otchitching-wanigabawi, anamia gaie. "Mijishinam non-gom gijigak nin pakwejiganiminan" ikkito... Kawin awiia o da-gashkitossin tchi nissitotang eji-migoshkadjideenid ikwewan, eji-mami-dawendaminid gaie iwapi.... Sasagwana basi-gwi, o pakakonan ishkwandem wi akawabid : kawin sa dash; kashkitibikad. O nandawaton kakina gego nwandang...

Gegapi o nissitawinawan saiagiadjin ogwissan badassamossenid. Edouard bi-pindige; mi dash nongom eji-bidot gego midjim. Anawi kawin o windamawassin ogin, ga-iji-kitchi-manenimind, ga-iji-kitchibissomind; kawin dibadjimossi iw ga-inind; osam agatendam." Kawin inendag-wassinton, gi-ina, awiia ga-anokid wi-gash-kitod o bimadisiwin, gawashwebinid tchi ash-

-amad onidjanissini gaie." Kawin dibadjimossi mino kwiwisens ga-iji-otchitchingwanigabawi-tawad iniw waiebinigodjin, gi-nandota/nawad gigisibingwai gego tchi minigod wa-ashamad ogin gaie oshimeian bekadenidjin.

Kawin ikkitossi iw; anawi ga-apitch-wikwat-chitod wi-jagodjiidisod aw ketimagisid gega genawanandang kwiwisens, neshiiwemagak kijisowin o gi-pagamishkagon. Iji-miskwa-nowe, iji-kitchi-abweso, tchi de-nissitotaminid ogin ga-iji-wissagendang gi-baba-nandotama-ged.... Anish! mi sa nongom ekwiwid Ed-ouard, wanimikawi gaie, ogin onikaning od odapinigon. [Bibagi dash aw wegimind, epitch kitchi-kashkendang. "Edouard, ningwissens! Debendjigeian, kitimagenimishinam!" mi dash eji-ganawabamad ginwenj, mawi gaie beka....

Gegapi abisiwisi Edouard. "Mama, ikkito, takonan ninindj, aton gaie kideing.... Wegonen wendji-mawiian? mi na iw ondji: nongom kig-wiss ogidakamig hemadisid, wabang gjigong ta-pindige? Kego mawiken! nin wi-nagadan iw aki endaji-kotagitong, kitchi gwanatch giji-gong tchi pindigeian, sasagwana ga-iji-

dibadjimotawiiān.... Mama , nin mojiton iw : beshowad nongom tchi niboian.... Widjiwishin, mama, waiba nōpinajishin....” Pangi gego keiabi gi-gigito , kawin dash ogin gi-gashkitossiwan tchi nissitotaminid ekkitogwen.... Anish mi sa, eji-nawagikwenid ogin inakakeia , ikwanamo... keiabi nondagosi : “ Jesus ! Jesus ! bonigidetaw nin papa , jawenim nin mama !.... Jesus ! Jesus ! ki pagidinamon nin tchitchag ! ” — Mi ishk-watch. Nibo.

Aw ikwe dash pangishin , eji-jagwiwid , gaie wanimikawi epitch wissagendang.

Mi jaigwa nengo dibaigneg ga-ako-ijiwebak iw ga-nondameg. — Kawin mashi gi-abisi-shinsi ketimagisid ikwe: keiabi ogwissan jingi-shinon onikang,... nebongin ijinagosi gaie win. Gonima gi-ishkwa-bimadisiwidog , gi-ishkwa-kotagitowidog

Sesika , kitchi ondwewemagad agwatching. Pakakonigade ishkwandem. Bejig ininiwish gawashkwebid bi-pindige ; nogigabawi , giwi-tawabi , kawin o nissitawinansin tibiidog eiag-wen. Ganawabamig : Nagamo, bapi, gagwanis-sagakamig gaie eji bapid,... matchi-awessiing

ijinagosi. Gegapi o wabaman o widigemaganan, o gwashkwanodawan, o saginikenan, o wawi-kobinan....

Mi dash eji-ikwanamod ikwe, abisiwisi. Pabi-ge o nissitawinawan od ininiwishiman : mash-kawisi minawa epitch nishkadendang, basikwi, o ganonan dash matchi aiaawishan, inoamawad ogwissan : “ Ki waba na na , bibagi ? Ki nissita-winawa na ? Metchi-aiaawishiwiian ! ki kikenima na aw ga-nissad abinodjiian, ga-apitch sanga-gisiad, ga-apitch-kashkendamiad ? Nakweta-wishin : Awenen ga-siginamawad nibowini-pitch-chibowin ? Awenenan ga-nissigodjin Edouard ningwiss, kigwiss gaie ? — Nin ga-wawina na kin enassamiiian ?.... Ki kikenima na aw ga-jabwenawad ajaweshk mino kwiwisensan ode-ing ? Ki wi-kikendamoin. Mi sa bejig netaminikwed weossimind. Kin , metchideeian , kin ki gi-banadjitamawa o bimadisiwin , ki gi-apagina tchibegamigong ; kin ki makam ninind-janis ; wissagendumowin ki gi-moshkinesh-kawa odeing aw ikwe ningoting ki wi-sagiin , ki wi-mino-widjiwin , ga-inadiban ! ”.... Bon-wewidam gaie inawi.

Awdash weoßsimind gibendamishkawa, nebo-wingin iji-aia epitch segendang, epitch agate-nindisod. — Kawin keiabi giwashkwebis-si : kakina ga-ijiwebak o nissitotan, apitchi kitchi inigawagendam ; gibingwenidiso ; aga-tchi.

Ninidjanissidog, anin enendameg gi-ijitchi-ged? Ta-andji-bimadisi na, o gad-otchitchin-gwanigabawitawan na o widigemaganan tchi bonigidetagod? — Kawin! osam awakaning iji-aia, Kakinä tchi wanendang, wissagendamo-win tchi ojindang, besho eteg signigewiga-migong pindige, minikwe, gaie giwashkwebi ondjita.

Wabang ta-bi-giwe. Ta-niho dash gaie win ikwe. Mewija bakadeban ; mewija kashkenda-moban ; nongom dash gi-iji-kitchi-gibendam tchi gi-otchibinigogwen, mi dash gi-mikawissig wiwa.

Mi enanokimagak matchi minikwewin. Kego dash agonwetawishikegon! kego, kawin ki debwessi, ikkitokegon. Tchi nakwetonagog, nin da-nandoman anind endashiieg o widigemaga-

- niwan ; mi dash winawa tchi dibadjimowad
ga - iji - kotagiindwa , ga - iji - kitimagiindwa ;
- awashime nind ikkit , ga-iji-pakiteogowad , ga-
iji - sagidjinajaogowad , winawa , onidjanissiwan
gaie , matchi ininiwan neta - minikwenidjin ,
gawashkwebinidjin .

Kinawa dash pepangi eta menikweieg , saia-
- giegwa gaie ki widigemaganiwag gaie kinidja-
- nissiwag , nanagatawendamog weweni iw :
Menikweshkid , waieshkat pepangi eta gi - mini-
- kwe ; kawin gaie wika gi - inendansi tchi
giwashkwebid , tchi matchideed , tchi wissagen-
- damiad wiwan gaie onidjanissan ; gi - nanda -
- wendam eta tchi modjigibid pangi ... " Kawin
nin ga - de - minikwessi tchi wanendaman , "
inendamoban . Anawi , eshkam eshkam o gi-
nagadjiton minikwewin , ishkotewabo o gi-jago-
- djiigon , o gi - awakanigon gaie gegapi . —
Mi ged - ijiwebisiieg kinawa pangi menikweieg
nongom , kishpin angwamisissiweg .

Kishpin dash debweieg , ikkitoieg " Nin sagiag
nin widigemagan , ninidjanissag gaie , bonitoiog
minikwewin ; bonitossiweg dash ta - ikkitom :
Aw anishinabe , awashime o sagiton ishkotewabo

o missad gaie epitch dash sagiad o widigema -
- ganan gaie onidjanissan. Kawin ganage awes-
- sling de-apitendagosissi ; awessi o nadamawan
od aiansom ; aw dash o kotagian, mano o
ga-nissan ; ondjita sa wi-minikwe.

IV

Ninidjanissidog, kitchi nibiwa maianadak jaigwa ki gi-kikendamoininim wendjibamagak ishkotewabong. Kid inenimininim dash nongom tchi wi-nanagatawendameg atchina eji-minos-semagak, eji-minwendagwak ningotchi odenang, kishpin mino-ijiwebisiwad kakina wedetodjig ima, kishpin sa kakina gego ijiwebak, enendang Kije-Manito. Weweni pisindamog.

Kije-Manito o gi-ineniman anishinaben mamawi tchi bimadisinid. O kikenimabanin sa eji-manesinid anotch gego eji-owiiawinid, eji-otchitchagonid gaie. Nijke kawin awiia o da-gashkitossin tchi ondinamasod ged-ondji-mino-aiapan aking, kawin gaie iw ged-ondji-wikwatchitamasopan minawanigosiwin gjigong

gi-nibod aking. Mi sa iw ga-ondji-inendagosiwad anishinabeg mamawi tchi bimadisiwad.

Ta-widokodadiwag sa , ta-sagiidiwig, ta-jaja-wenindiwig, endasso bebejig gaie ta - anoki eji-kikendang eji-gashkitod gaie tchi ondinama-wad bekanisinidjin gego wenijishing. Anind ta-niganisiwag tchi akawabandomawad mino-bimadisiwin gaie mino - ijiwebisiwin ; weweni gaie o ga-nanagatawendanawa iw ged - inako-nigewad tchi minossenid kakina odenang eianidjin , memindage dash Kije - Manito tchi babamitawind.

Kawin gaie ta-sanagisissiwag igiw naganisid-jig tchi mino - ganawenimawad bekanisinidjin ; kakina sa mino inawendiwig , wi-mino - doda-mog. Kishpin naningotinong awiia awashime kitimagisid , wewib o jawenimigon widjikiweian ; awiia bakaded, ashama ; awiia nibagwed, minaa ; awiia pingwashagidid, agwia ; awiia akosid, mawadissa , mina mashkiki ; awiia kashkendang , gagisoma , abisiwima .

Kawin gaie iw eta. Eji-ninamisiwad kakina anishinabeg oma aking , ta ijiwebad ningoting tchi - batadodamowad anind ; atchipa o ga-wane-

- nimawan Debendjigenidjin, o ga-nishkiawan, widjikiweian gaie. Iwapi endassō-bebejig iw ta-ondji-kashkendamidee, kawin awiia ta-in-endansi tchi matchi-dajimad ga-batadiginidjin, tchi bapinodawad, kema tchi batamad : kawin gaie awiia ta-minwendansi tchi nondang iw ga-matchi-dodaminid. — Kishtpin dash awiia kitchi-mino-ijitchiged, kitchi-jawendagosid, nibiwa gashkitchiged, kakina ta-ondji-min-wendamog. Geget, Ninidjanissidog, da-min-wendagwad danakiwin anishinabenang kishtpin ijiwebakiban !

Anawi, kamamanda ! kawin ijiwebassanon. Kitimagendagwad eji-jingenindiwad naningim anishinabeg, anind eji-matchi-dodadiwad, eji-matchi-dajindiwad, eji ginawishkiwad wi-ba-tandiwad, eji mamijindiwad, eji-migadiwad gaie naningotinong. Mi apine ejiwebak anam-akamig, matchi manitog mi eji-deewad matchi-ishkoteng endanakisowad. Mi-wendji-gagwed-jindisod naningotinong bejig mekatewikwanaie: “Anish? Anishinabewiwag na ogow ga-sagiagwa-binish nongom, ga-gagikimagwa tchi wi-anokita-tawawad Kije-Maniton; anishinabewiwag na

enendagosidjig tchi aiawad ningoting ishpiming
gijigong? Anishinabewiwag na? gonima gaie
matchi-manitog awidogenag idog, matchi-mani-
-tog anishinabeng ejinagwiodjig, waiba neiab
ged - apaginindwagwen anamakamig?" —
Anawi kawin sa! ki kikeniminiminim, Ninidjan-
-issidog, ga-ano-kitchi matchi-dodameg, nin
pagossendam tchi sagiineg keiabi Debenimi-
-nang, tchi wi-mino-inenimindeg. Mojag geget
Win ki ga-kitchi-sagiigowa, ki wi-widokagowa
tchi anwenindisoieg, binish iw tchi ishkwa-
bimadisiieg. Kawin sa ki matchi-deessim ond-
-jita, kid ineniminiminim, kawin gaie ondjita kid
inendansim tchi iji-batadiieg, tchi anokitaweg
jangenimineg matchi-manito, kejewadisid dash
ki Manitominan tchi nishkieg! Kawin! Anawi
dash, wegonen iw wendji-iji-manjisseeieg?
Anindi gaie wendjibamagak kitchi nibiwa ki
matchi-ijiwebisiwiniwa? Mi sa minawa manda
neshiiwemagak nibish, ishkotewabo ejinikadeg!

Awija menikwedjin, waiba o waniton nib-
-wakawin, gaie win gawashkwebissig, o ba-
-nadjiton od inendamowin. Anotch dibadjimo,
kawin dash o babamendansin tchi debwed,

kawin gaie tchi kashkendamiassig widjanishi-naben ; anotch gagibadisi, kakina gego o bapiton, o bapinotawan gaie kakina waiabamadjin ; kishpin dash agonwetawind, pabige nishkadisi, iwapi dash kitchi nanisanisi, waiba ta-migaso, ningoting dash ta-nishiiwe.

Ki ga-dibadjimotoninim nongom gego gajiwebak bejig anishinabe-odenang. Nij anishinabeg ga-kikenimagwa weweni, ningoting gi-ijawag mamawi popiming wi-manissewad. Ginwenj weweni gi-wissokodadiwag ; gi-minoinawendiwag sa. Anawi kawin gi-nibwakasiwag ; ga-ishkwa-anokiwad pang, abwesowag, bejig dash od odapinan omödai, ishkotewabo ateban omodaing, minikwe win abiding, o minaan dash widjikiweian.... Neiab anokiwag ; neiab gaie minikwewag. Waiba bejig anisha nishkadisi, o bapinodagon bekanisinidjin ; anish mi sa eji-gikandiwad, gegapi gaie migadiwag.... Waiabang dash bonenindiwag ; ginwenj gaie gi-mino-widjikiweindiwag, binish minawa mamawi odenang tchi ijawad. Iwedj minawa giwashkwebiwag, gagibadisiwag kabegijig.

Onagoshig dash ani giwewag. Bisan eniwek nitam bitnossewag. Sesika dash mi eji-matchi-bissomad bejig wadjaiaadjin, bekish o bassin-gwewan, o kitchi-pakiteawan oshtigwanining, gega gaie o nissan. Mi dash ekkitod matchi aiaawish. "Nin mikwendan gá-iji-pakiteowiiian mewija nopiming: kid ajita-dodago nongom." Ojimo dash, naganad widjikiweian jangishini-nid ishkote-odabani-mikanang....! Mi keiabi enanokimagak ishkotewabo!

Ki kikenimim weweni, Ninidjanissidog, eji ginawishkimissinonagog. Kishpin gaie inenda-mamban tchi dibadjimoian ga - ijiwebak nomaia minawa bejig odenang, ki da-nissito-tam awashime weweni eji - bata - dodagema-gak ishkotewabo. Gawashkwebidjig pindige-wag wigiwaming, matchi gijwewag, gikandi-wag, migadiwag, o nishkiawan dash de-bendaminidjin wigiwam, sagidjiwebinawag;... minawa kitchi migadiwin,... nongom dash goni-ma kejabi wabaminagwad mikanang miskwi-ga-siginamowad ga-migadidjig.

Mi sa, Ninidjanissidog, ejiwebisiwad osam nibiwa-dassing anishinabeg od odenawiwang;

mi sa wendji-batinak matchi-dajindiwin, gi-kandiwin, jingenindiwin, migasowin : mi sa wendji-inendamowad jaigwa anind: Osam jingendagwad danakiwin odenang! Apegish gash-kitoiang wassa tchi madjaiang! Mi sa gaie wendji-kashkendamowad mino Anjeniwag, mekateoikoanaieg gaie ga-anonigowad Kijemaniton tchi ganaweniminegwa gaie tchi sagi-inegwa.

Kawin na gaie kinawa ki ga-kashkendans-im? Ka na ki ga-gijendansim tchi andjitoieg kid ijiwebisiwiniwa? Ambe, Ninidjanissidog, mi nongom tchi ishkwa-gagibadisiieg, tchi winibwakaieg dash, tchi webinameg iw ga-ondji-matchi dodameg, iw ga-ondji-kitimagiidisoieg, ga-ondji-akosiieg; iw ga-ondji-nonde-nibowad kinidjanissiwag, iw ga-ondji-wissa-gendamideeindwa ki widigemaganiwag, iw sa wendji-jingendagwak naningotinong danisiwin odenang : mi nongom tchi bonitoieg ishkot-ewabo!

V

Eji-mikwendameg weweni, Ninidjanissidog ; waieshkat gi-madji-gagikwenodaman anissadi-siwin, nin gi-inendam tchi nondawagiban aw Anjeni genawenimad anishinaben. Aw Angeni, nin gi-ikkit, gi-mina gashkiewisiwin tchi agindang iw masinaigan ima-wejibiigade-nig bemadisidjig o batadowiniwan , kakina gaie minik enendagosiwad tchi kotagiindwa oma aking, kema gaie kagige ishkoteng anama-kamig. Mi dash gaie eji-ganonineg : “ Anishinabedog, niningisegisiog, mawiog gaie eji-kitchi-bata-ijiwebisiieg. Anind, anind gaie minawa... Kin, kin, kin gaie ketchi - bata-ijitchigeian, kin wendji-mawiwad ki widigema-gan, kinidjanissag , enamiadjig , anjeniwag gaie ishpiming , ojibiigadewan kid anosowini-

-iniwa, kagigekamig tchi wissagakisoieg kish-pin anwenindisossiweg. Niningisegisisicg : jai-gwa nin wabama wedi anamakamig ishkoteng matchi-manito menawanigosid tchi ojissitod od anokasowinan tchi kotagiineg. Minawa, anishinabedog, kid inininim, niningisegisiog, andjitoiog ki bimadisiwiniwa ! ”

Minawa nin gi-ikkit : Nibiwa anishinabeg o gi-nishkiawan Debendjigenidjin, gi-gashki-tamasowag gaie anamakamig tchi apaginindwa; wegonen wendji? Ondji matchi-minikwewin sa!

Geget, Ninidjanissidog, apitchi kashkendagwad eji-kitimagisiwad anishinabeg eji-owi-jawiwad, eji-bimadisiwad gaie oma aking, ondji minikweshkiwin; anawi kakina iw kotagito-win ningoting ta-ishkwa-aiamagad. Atema-gad dash bekañak kotagitowin wika ged-ishkwa-aiamagassinog wendinamasowad nibiwa anishinabeg matchi minikwewin ondji; mi sa kagine-ishkoteng danakisowin.

Mikwendamog, Ninidjanissidog, iw wejibi-igadegeg Kije-Manito o masinaiganing : “ Mi ged - ijiwebak ishkwa - akiwang : Anishinabe-

Ogwissan, Jesus, o ga-mawandjian kakina metchi-iji:webisinidjin, o gad-apaginan dash ishkoteng ge-daji-mawing, ge-daji-mamad-weiabideshing gaie." Ojibiiagade gaie iw ged-ikkidotod Jesus iwapi ge-dibakoniged : Awass ijag, matchi-aiaawishidog, kagine ishkoteng matchi-manito ga-ondji-ojitchigadeg, kakina gaie enokitagodjin!"

Kitchi batadowin ; mi sa iw, anishinabedog, wendji-kotagitong anamakamig. Kakina dash ga-windamonagog jaigwa kid ondji nissitotam eji-batinak batadowin endaji-batinak ishkote-wabo.

Anawi minawa nanagatawendamog Kije-Manito o ganasongewinan, wabandamog gaie eji-babamendansig anishinabe Debendjigenid-jin od ikkitowini, menikweshkidjin.

Nitam kawin o sagiassin Kije-Maniton awashime kakina dash ejiwebak; awashime sa o sagiton iskhotewabo; o kikendan: "Minikweian, nin ga-nishkia Debenimid," potch minikwe.

Kikendagwad gaie eji-matchi-wawinawad iko Kije-Maniton neta-minikwedjig.

Anamiegijigad, kitchitwagijigad gaie o ban-

-adjitonawa ; kawin geget anokissiwag iwapi ; mi dash eji-mawandjiidiwad tchi minikwewad, tchi ombakamigisiwad.

Neta-minikwed kawin o kikenimassín ossan, ogín, wiwan, onidjaníssan, kawin o babaniénimassín, kawin o ganawenimassín, o kash-kendamian mojag.

Neta-minikwed kawin o sagiassín widj-anishinaben, o matchi-ganonan, o nishkian, o gikaman, o miganaa, naningotinong o nissan.

Neta-minikwed mojag bishigwadj-inendam, winitagosi mojag, mojag matchi missawendam ; nin da-ikkit gaie gega mojag awessiing ijiwe-bisi.

Mi sa geget, Ninidjanissidog, ejitchigewad iko wedapinangig ishkotewabo ; nibiwa batado-wining pangishinog ; dassing gaie baiatado-wadjin, o wikwatchitamasonawa, neiab gaie neiab, kagine kotagitowin. Mi sa ga-ikkidotod win tibinawe Kije-Manito, mi eji-debwetamo-wad kakina enamiadjig ; kinawa gaie geget mi eji debwetameg !

Nongom dash, kakina kinawa, waiabanda-meg iw masinaigan, kakina endashiieg ga-

minikweieg, ki gagwedjimininim : “ kid inendam na kagigekamig tchi kotagiigoieg anamakamig ? ” — Nakwetawishig kideiwang. Kishpin dash awiia de - giwanadisid tchi ine - nindisod : “ Mano nin ga - widjidakiwemag matchi - aiaawishag anamakamig. ” — “ Mano , nin , nin gad - ina , minikwen , odapinan ishko - tewabo : api ge - moshkinebiian wawinge , wawinge gaie ki ga - tchagis ! ” Anawi kawin bejig ta - iji - nakwetansi. “ Kawin sa , kid inendam , kawin wika nin wi - danakisossimin matchi ishkoteng ! ” — Weneni , Ninidjanis - sidog , ki nibwakam. — Kego dash minikweke - - gon !

Neiab dash ki gagwedjimininim : “ Kid iji - deem na tchi wi - ijitchigeieg kakina gego enendagwak tchi ojindameg kagine tchagiso - win ? ” Kishpin minawa nakwetawieg : “ Kaki - na nin wi - ijitchige : kakina nin matchi - ijiwebisiwin nin wi - webinan , memindage neshiiwemagak minikwewin , ga - ondji - bata - diian sasagwana.... ” Ah ! Ninidjanissidog , kishpin iw nakwetameg , weweni ! Ki jawen - - dagosim ! Iw ondji onanigwendamog mino

Anjeniwag, iw ondji minwendam Jesus Eg-washinged! — Kishpin dash ijideessig ganage bejig, kishpin keiabi wi-minikwed, o mashka-wideewin ondji kashkendamog Anjeniwag, onanigwendamog dash manitog jangenimigo-djin. Apegish aw benadjiidisod anishinabe pisindang iw wa-dibadodaman nongom; mano ta-nissitotam eji-giwanadisid.

Nisswi ininiwag mamawi gi-akosiwag, Pierre, Paul gaie John, apitchi sa gi-jashagosideshko-sowag, binish tchi kitchi-nanisanisiwad. O nandomawan mashkikiwiniwan. Od igowan dash: “ Waiba ki ga-nibom kishpin odapi-nansieweg iw [nin mashkikim; aioieg dash ki gad-animism geget atchina, anawi ki ga-nod-jimom; aiossiweg, abidekamig ki gad-ishkwa-bimadisim.” Mi ga-ikkidot mashkikiwinini. Od igon dash Pierran: “ Kawin nin wi-nibossi, nodjimoishin; anawi ka gego mashkiki nin wi odapinansin.” Gi-madja-mashkikiwinini, Pierre dash waiba gi-nibo, gawanadisingin gi-ijiwe-bisid.

Paul gaie gega gi-iji-giwanadisi. “ Apitchi

nind inendam, ikkito, tchi nodjimoian ; mashkiki, mano gaie senagak, nin gad-aion ; iw dash wa-mijiian eta kawin." — " Anawi, iw eta ki ga-minokagon." — " Ah ! mano, kawin nin wi-aiansin." — Madja mashkikiwinini. Paul dash od aionan nibiwa mashkikiwan, iw dash ga-inind tchi aiod, kawin : mi dash ejinibod gaie win.

John dash win gi-nibwaka : " Kavin nin wi-nibossi, gi-ikkito, kishpin gaie inendagwak tchi kishkisidejwiiān, kishkisidejwishin." John dash waiba gi-mino-aia.

Nongom dash, Ninidjanissidog, nakweta-wishig. " Ki da-iji-gagibadisim na, winawa Pierre gaie Paul ga-iji-gagibadisiwad, gi-wiaiossigwa wenijishing mashkiki ? Kawin ! Ki wi-ojindanawa kagige-nibowin, kid inapinem dash nongom tchi nanisanisiieg tchi banadisiieg. Minikweshkiwin sa kid ondji banadjitonawa iw bimadisiwin gegishkameg kideiwang, gaminineg gaie Kije-Manito tchi anokitaweg, tchi babamitaweg aking, gaie tchi minawani-gosiieg gijigong. Kishpin dash webinansiweg matchi minikweshkiwin, odapinansiweg gaie

anissadisiwin, mi waiba tchi niboieg, kaginig gaie tchi kotagiigoieg. Nibwakag, gjendamog gaie wika tchi minikwessiweg.

Kishpin gaie inenuameg : Ta-kitchi-sanaga tchi minikwessiwan ; mikwendamog epitenda-gwak minawanigosiwin gjigong ge-wanitoin-egoban, kishpin boni-minikwessiweg ; mikwendamog eji-gotamigwendagwak kotagitowin anamakamig ge-wikwatchitamascieg kishpin boni-minikwessiweg ; mikwendamog ga-iji-bata-dodameg osam nibiwa dassing, gi-minik-weieg ; gjendamog gaie tchi kotagiidisoieg ; — nanagatawendamog gaie ged-iji-minwendameg kinawa tibinawe api ge-wabandameg endaieg mino-aiawin, mino-bimadisiwin, mino-ijiwe-bisiwin, minawanigosiwin gaie. Geget de-api-tendagwad iw tchi kotagiidisoieg pang, tchi minikwessiweg.

Nanagatawendamog ged-iji-minwendameg tchi wanakideeieg, tchi jawendamiganawabaini-neg dash Kije-Manito ; kinawa gaie wadigeieg, wenidjanissiieg, ka na ki gad-apitchi-minwendansim tchi jawendagosiegwa winawa saiag-iegwa ?


Ka na de apitendagwassinnon iw, pangtchi sanagisiieg wi-minikwessiweg? Odenang endanakiieg, tchi sagiidiwad anishinabeg, tchi awenindiwad, tchi wanakiwad, ka na de-apitendagwassinnon tchi kotagiidisoieg, tchi minikwessiweg?

Ah! Ninidjanissidog! Osam ki minodeem kejabi tchi nissitotawissiweg! Osam ki minodeem tchi gijendansiweg : kakina nin wi-ijitchigemin nongom tchi nanaitoiang ga-bata-dodamang, ga-nanagatawendansiwang dash mashi -wesiweni!

Nongom sa! Nongom! ta-madjamagad kakina maianadak, nongom ta-madja matchi-manito; meshkwat dash ta-pindigemagad odenang, ta-pindigemagad endaieg, ta-pindigemagad kideiwang mino-ijiwebisiwin, anissadisiwin! ta-pindigewag Anjeniwag; ta-pindige, tchi ogimakandoneg, Kije-Manito Debeniminang! Mi-geing!

KEGO

GIWANIMOKEGON!



KEGO

GIWANIMOKEGON!



Ki giwanim na , ninidjaniss? — “ E! Nange ka nin giwanim ! Awenen dash gawanimoossig ? Kakina awiia giwanimo. ” — Mi na enendaman? Geget go ki kitchi - mamakasiton ; kishpin dash ijiwebisiwad anishinabeg iw ekki-toian , kishpin iji - nita - giwanimowad , kawin keiabi nin da - mamakadendansin ejii - tabasseni - migowad nibiwa waiabishkiwenidjin . “ Kego pisindawaken , kego debwetawaken anishinabe , nin gi - igo naningim , kawin sa gwetch bejig ta - mikawassi mojag ge - wi - debwed ; anotch anishinabe dibadjimo wedissigod od inendamowining , kishpin eta inabadendang , ano debewinagassinog . ”

Debwewag na iw ekkitodjig ; kema giwani-mowag na gaie winawa ? — Nakwetamog ki-nawa , anishinabedog , eji kikenindiieg ; kawin nongom inabadassinon tchi waiejindisoieg !

Ki ga-gagikimigom oma tchi giwanimossi-weg wika . Kishpin sa kakina anishinabeg giwanimossigwa , ganage nibiwa ijiwebisiwag ; osam pang o gotanawa iw batadowin ; weni-panadj gaie , eji-gondaming nibi nebagwen-gin , od ojitonawa ginawishkiwin .

Awenenag dash memindage igiw ejiwebisid-jig ? Ki ga-windamoninim : mi sa abinodjiiag ga-matchi-nitawigiindjig , gaie dash pegwana-wisidjig tebassendagosidjig kitchi-anishinabeg . Winawa nitam metchi-nitawigiindjg abinodjii-ag kawin gego o babamendansinawa mi eta ejimatchideeigowad genawishkinidjin maniton ; winawa dash pegwanawisidjig kitchi-anishi-nabeg kawin gego od apitendansinawa , mi eta tchi wissiniwad , tchi minikwewad , tchi modjigendamowad : kawin sa o kikendan-sinawa gego nawatch eshpendagwadinig .

Win dash bemadisid nebvakad , wa-mino-ijiwebisid gaie , memindage enamiad , o kitchi

agatendan, o jingendant giwanimowin, od ojindan gaie apitchi. Geget sa go manendagwad iw bata-ijiwebisiwin, agatendagos i gaie neta-ginawishkid. Mi go iw apegish ged-inendameg kakina kinawa endashjieg minik ged-agin-dameg iw masinaigan.

Niganendagwad dash tchi nissitotameg we-weni ejiwebak giwanimowin. Anind sa, me-gwa anishinabeg, inendamog naningotinong : “ mi ima giwanimowin ; gi-ginawishki aw ; ” kawin dash giwanimowin awansinon, kawin aw gi-ginawishkissi.

Nissitotamog : Awiiā gego ki gagwedjimigo-wa. — “ Geget nin kikendan iw : ” kid ine-nindisom. — Eji-kikendameg dash, gwaiak kid iji-nakwetawawa aw genonineg. Anawi, ki wanishinom, nind inendam ; kawin dash ond-jita ; mi dash aw genoneg tchi wanishing non-gom gaie wiñ. — Ki gi-ginawishkimawa na dash ? Kawin ; gwaiak sa, ga-iji-debweienda-meg, ki gi-gigitom. Gonima da-gi-onijishin tchi gi-nanagatawendamegoban awashime bwa nakwetameg ; kawin dash ki gi-giwanimossim. Potch kakina awiiā aking bemadisid naningo-

-tinong wanishin, eji-takwamagadinig o gash-kiewisiwin gego tchi kikendang. Win eta Kije-Manito kawin wanishinsi wika, win gaie katolik Anamiewigamig kawin wika wanishi-nomagassinton. Mi dash iw anishinabe ged-oncji - inenimassig pabige widjikiweian tchi waiejimigod. Gi-wanishin eta nidji-bimadisid, eji-wanishinan gaie nin sasagwana, o gad-ineniman, o ga-bonigidetawan dash wewib.

Minawa : ki nasikawawag kidj' anishinab-miwag tchi widokonegwa. " E ! ikkitowag : ki ga-widokagom, kishpiñ wi-wawindamawi-iang iw anokiwin meskwat tchi ojitamawiiang nagatch. " — Nin gad-ojitolin, kid inendam ; mi dash gwaiak eji-wawindamageieg. Panima nagatch dash, mi eji-pagamishkagoieg akosi-win, ki bwanawitonawa gaie iw ga-gijenda-megoban, — Ki gi-waiejingem na ? Ki gi-ginawiskimawag na kidj'anishinabemiwag ? Kawin ; kid anishinabewim sa ; anishinabeng gaie kid ijibebisim kitwen. Kawin awia ne-bwakad ki da-inenimigossiwa gego. Ged-iji-gashkitoieg dash, meshkwat ki ga-mino-doda-wawag igiw ga-widokonegwa kidji'bimadisi-

-miwag. Kawin ki gi-ginawishkimassiwawag : gwaiak sa ki gi-gijendamwaban tchi wi-debis-satoieg iw ga-wawindamageieg.

Minawa : tchi nissitotamoinagog gego, adis-sokan nin dibadodan, nind awetchige sa, Jesus endodang minwadjimowining. Iw ejj-di-badjimotonagog kawin gi-ijiwebassinon goni-ma ; iw dash wa-nissitotamoinagog, iw gaie nessitotawiieg, debwewinagad. Kawin nin gi-giwanimossi. Kawin nin gi-inendansi sa tchi debweiendamawiieg nind awetchigan ; “ nin kikinoamagewin eta ga-gwaiakossing nin gad-dapinamagog : ” mi ga-ineniminagog ; mi gaie kinawa, ejj-nibwakaieg, iw ga-debweienda-mawiieg. Kawin ki gi-ginawishkimissino-ninim.

Wegonen dash iw ondjita giwanimowin, kema ginawishkiwin edaming, jangendagwak gaie egatendagwak ?

Mi sa giwanimowin : kishpin awiia anokid tchi debweiendamoad widj'anishinaben gego, ano kikendang : kawin debwewinagassinson.

Ki kikendan debwewin, hawin dash kid inenimassi kidji'bimadisi tchi kikendang gaie win, mi dash eji-kadamawad ondjita, tchi wanishing; kema gaie kid inenima tchi debwe-iendang gego daiebwewinagassinog, gego sa tchi inenimik ged-inenimigossigoban, gego tchi ijitchiged ged-ijitchigessigoban kishpin kikendangiban debwewin. Kawin bejigwan-sinon iw enendaman gaie iw kekendama-wiiweian. Bejig ki kikendan, bakan dash ki dibadjim, gaie, apegish wanishing nidj-anishinabe, kid inendam. Mi giwanimo-win !

Babamendamog keiabi oma ejiwebisid na-ningim neta-giwanimod. Kawin pijishig gi-wanimowin o dibadodansin. Abita debwe, abita kawin debwessi. Iw ekkitod gi-ijiwebad geget, anawi go gi-ijiwebad bakan : kema o mitchaton, kema od agassaton; osam nibiwa ikkito, kema osam pang. Mi dash eji-waiejimindwa nwandangig.

Aw anishinabe matchi-bimadisi, kid ikkit,

mojag nin miganig ; kawin dash kid ikkitossi ejii-nita-miganad gaie kin nitam.

Aw inini, kid ikkit, kawin gwaiakosseSSI, nin gi-gimodimig ; kawin dash kid ikkitossi ejii-masinaamawadibAn nibiwa mewija, nanin-gim dash gi-wi-kijikawa, kawin dash ki gi-dibaamawassi.

Nin widigemagan kawin nin pisindagossi, matchi-ikwewi kid ikkit ; kawin dash ki di-badjimossi, ejii nita-minikweian, ejii-gagibadak iw nendotamawad, mi dash tchi inendagosissig iwapi tchi pisindok.

Kema matchi-abinodji wa-ijassig kikino-amading dibadjimo : “ Abiding gi-bapiian, nin gi-kitchi-bashanjeogo. ” Kawin dash ik-kitossi ga-iji-manjininiwagisid, ga-iji-mash-kawindibed, ga-iji-nita-agonwetaged, ga-iji-kitimid apine ; mi dash ga-iji-wikwatchi-tamasod tchi kitchi-animisid.

Kakina iw giwanimowiniwan, aiano gego dagonigadeG daiebwewinagak. Waiejindisovag kitchi-nibiwa bemadisidjig, enendangig tchi ginawishkissigva, kishpin eta ganage pangidagonamowad debwewin. Ginawishkiwag sa,

kishpin ganage pangí gego ondjita kadowad,
wendji-andjinagwak iw debadodamowad.

Wegonen dash iw wendji-nita-giwanimowad
kitchi nibiwa anishinabeg? — O wi-ondina-
-masonawa gego sa ga-de-wikwatchitamasos-
-sigwa; — atawewad gego, wi-gashkitchi-
-gewag awashime iw dash epitendagwak od
anokadjiganiwan; — o wi-ikonamadisonawa
agatchiigowin gonima gaie kotagiigowin ga-
-wikwatchitamasowad, gi-matchi-dodamowad;
— anind wi-mino-ijiwebisikasowag; — mina-
-wa anind o wi ondjiawan widjikiweiwan tchi
minosseßinid awashime epitchi dash winawa
minossewed: gagawendjigewag sa; — keiabi
anind o wi-ajidawamawan iniw ga-waiejii-
-migowadjin; — anind dash minawa, nibiwa
gaie, anisha, biniska giwanimowag, wi-bapi-
-wad, wi-mamakasitagosiwad.

Pangishewagisiwag nange geginawishkidjig;
kitchi nibiwa sa gi-matchi-nitawigia wag wesh-
-kinigidjig, batinowag gaie pegwanawisingin
ejiwebisidjig. — Pangishewagisiwag dash ge-
-get go egatendansigog gaginawishkiwin; gi-
-modj eta, minik ejii-gashkitowad, giwanimo-

-wag, binish tchi iji nagatendamowad, gego agatchiwin keiabi tchi kikendansigwa, epitch manadadong mijakissewad.

Kego dash, anishinabedog, kego iji-agaten-dagosiidisokegon, sagitoig debwewin, kego giwanimokegon. Apitchi sa kitchi banadjiiwe-magad giwanimowin. O nishkiigon Kije-Manito, od inigaigonawa kakina bemadisidjig eji-widjindiwad, kema odenang, kema gaie neningotodeng; od inigaigon gaie win tibinawe anishinabe gawanimod. Weweni nanagata-wendamog kakina iw : mi dash tchi wi-ojin-dameg mojag.

I

Giwanimowin o nishkiigon Debeniminang.
— Iw tchi nissitotameg weweni, mikwendamog manda : ga-iji-awiinang sa Kije-Manito kakina ki gashkiewisiwininanin eji-owiiawiang gaie eji-otchitchagoiang. Win kid ojiggonan, ki dibenimigonan wawinge, O dibendan gaie kakina go gego minik eiaiang gaie minik eiamang. Kawin wika gego ki da-inabadjitossimin, mi eta Win Debeniminang ejiminwendang. Mi dash iw wendji-ikkitong : mino-ijiwebisi aw endodang enenimigod Debendjigendijin; matchi-ijiwebisi dash aw endodansig enenimigod Debendjigenidjin.

Anin dash enenimad Kije-Manito anishinaben tchi aionid gijwewin? — Kije-Manito ki mingonan gijwewin tchi mijishatoiang kid inen-

-damowininanin tchi kikendamoangwa kidji-bimadisiminanig enendamang, ejideeiang gaie.

Enishinabewiiang, kawin kid ijiwebisissimin anjening wewiawissig, tchi kikendamadiiang enendamang bwa ganonidiiang. Abadjitchigan-ing apitendagwad gijwewin, abadjitchiganing manigoiang tchi kikendamiiweiang kid inenda-mowininanin, kawin dash kid iji-minigossi-min tchi kadoiang enendamang. Agonwetawa geget Debeniminang dassing enabadjitchigadegein gijwewin tchi kadjigadege enendamang. — Kema kego ta - gitossi anishinabe, kema iw eta enendang ejideed gaie ta - ikkito.


Wabmotchitchagwaning apitendagwad gij-wewin : mi ima ge-wabandaming enendang anishinabe odeing. Mi iw ga-ilakoniged Debendjiged; kishpin dash gego bekanak ima nagwak, manedad wabmotchitchagwan, ma-nedad ikkitowin, agonwetawa Debendjiged.

Ojibiigade kitchitwa masinaiganing ged - iji-dibakonindwa bemadisidjig ondji bejig anisha ikkitowin, ondji ikkitowin enabadassinog. Gwa-iak gaie ijiwebad, onijishin tchi ijiwebak. Kakina sa gego debendang Kije-Manito, minik

gaie ga-awiiad od anokitaganan, da-inabadjitz-chigade tchi anokitagod. Kishpin dash inendagwak tchi dibakonind anishinabe ondji ikkitowin maianadassinog, enabadassinog dash, anin ejinagwak, kid inendam, giwanimowin? Anin gaie ge-dibakonind awiia geginawishkid? Kawin pijishig anisha ikkitowin awansinon, matchi-ikkitowin awan. Mi dash tchi animisid anishinabe abidekamig kishpin giwanimod.

Geget animisi geginawishkid; o bashanjeogon Debendjigenidjin. Kishpin nongom epitch bimadisid bashanjeogossig, abidekamig api gedishkwa-bimadisid ta-kotagia. Dibadjimowin ate Kije-Manito o masinaiganing ged-agindamowan-pan geginawishkidjig : o ga-kikinoamagonawa ged-iji-apitendamowapan iw batadowin ega-tendagwak. Mi sa manda wejibiigadeg :

“ Bejig inini, Ananias ga inind, (o widige-maganan dash Saphira gi-ijinikasowan) “ o gi-atawen o kitigan, o gi-ishkonan dash “ anind joniian, Saphiran gaie o gi-kiken-damagon iw ejitchiged ; anind eta o gi-



“ Ananias , Kije-Manito ki gi-gaginawishkima ! ”



“ binan ·joniiān , o gi - bi - minan dash kikino-
“ - amaganan . Pierre dash o gi - inan : “ Ananias ,
“ wegonen wendji - pisindawad matchi - manito ,
“ tchi gaginiawishkimad Wenijishid - Manito ,
“ ishkonaman anind ga - inagindeg kitigan ? ka
“ na kin ki dibendansināban iw ? Api dash
“ ga - atawelian , ka na kin ki gi - dibenimassi aw
“ joniiā ? Wegonen wendji - inendaman kideing
“ tchi gaginiawishkiiān ? Kawin bemadisid aking
“ ki gi - gaginiawishkimassi , Kije - Manito sa ki
“ gi - gaginiawishkima . ” — Ananias dash ga -
“ nondang iw gigitowin , gi - pangishin , mi dash
“ gi - nibod . — Kakina dash gi - kitchi - segisiwag ,
“ ga - nondangig iw . Anind dash oshkinaweg
“ gi - basigwiwag , o gi - mamawan gi - sagisiawad ,
“ gi - pagidenimawad . — Nagatch dash , nisso
“ dibaigan minik , o widigemaganan gi - pindige -
“ - wan , kawin dash o kikendansin aw ikwe
“ ga - ijiwebadinig . Pierre dash od inan : “ Ikwe
“ windamawishin , mi na iw minik ga - inagindeg
“ kitigan ? ” Gi - ikkito dash aw ikwe : “ E , mi
“ go iw minik . ” — Pierre dash o gi - inan : “ Anin
“ iw ejj - widokodadiieg gagwedibenimeg Weni -
“ - jishid - Manito ? Iwedi ishkwan deming niba -

“ - wiwag igiw ga - pagidenimadjig ki widige-
“ - maganan ; gaie kin dash ki ga - sagisiigog. ”
“ — Pabige dash gi-pangishin aw ikwe, gi-nibod.
“ Gi - pindigewag dash oshkinaweg, gi-sagisi-
“ - awad, gi - pagidenimawad. — Kakina dash
“ enamiadjig gi - kitchi - segisiwig , kakina gaie
“ ga - nondangig iw gi - kitchi - segendamog. ”

Gi - giwanimowad , mi ga - ondji - nissigowad Debendjigenidjin igiw nj enamiadjig. Kawin iw ondji nonde - nibossiwag , gi - migiwessigwa ka - kina joniia ga - ondinawad gi - atawewad kitigan ; winawa sa o dibendanawaban kitigan , joniian gaie o dibenimawabanin ; o gi - gaginiawishki - mawan dash Kije - Maniton mi ga - ondji - nani - bikimigowad kitchitwa Pierran , mi ga - ondji - bashanjeondwa.

Iw dash minik ga - iji - jingendang giwanimo - win Debendjiged waieshkat , mi minik eji - jin - gendang keiabi nongom ; mojag tibishko iji - webad giwanimowin ; mojag gaie epitendagwak od apitandan maiamawi - nibwakad gaie kaia - gige - debwed Manito. — Abiding dash , api sa

ga-madjissemagak aking od ijitwawin ketchi-twawendagwadinig, o gi-wi-wabandaan bema-disinidjin mijisha eji-dibakoniged. Apegish dash babamendamowad apine iw kakina ani-shinabeg, mi dash tchi gotamowad giwanimo-win.

Nakawe minawa nanagatawendamog iw : Endasso-gijigak, gaie nibiwa dassing ningo gjig, o manesin anishinabe jawendjigewin. Eji-owiiawid, eji-otchitchagod gaie, anotch nondesse; mi dash eji-pagossenimad kakina Debendaminidjin misi gego netawitonidjin tchi widokagod. Kishpin dash minigossig eji-pa-gossenimad, kawin minwendansi, o minda-mawan dash. Geget gagibadisi anishinabe : ondji giwanimowin jingitagosi, o gagwanissa-wenimigon gaie Debendjigenidjin; anin dash ged-iji-pisindagopan? Nitam da-anoki tchi giwanimossig wika, mi dash tchi minotagod Kije-Maniton. Kego wika wanendankegon iw, anishinabedog : Debendjiged o gagwanissagen-damawan gegginawishkinidjin odonini.

II

Keiabi iw od ondji nishkiigon giwanimowin Debendjiged, migadimagak sa manda weniji-shing widjindiwin ga-inakoniged waieshkatzhi daji-wodokodadiwad anishinabeg.

Kawin geget gi-ijiassiwag anishinabeg tchi bimadisiwad nijke bebejig. Nibiwa mamawita-mawandjiidiwag, mi dash mamawi tchi ato-wad iw bebakan eji-gashkiewisiwad ; iw tchi-de-mino-ajawad oma aking.

Pepangi bebejig o kikendan : pepangi bebejig o gashkiton ; pangit nange anawi inendagwad tchi aiamowad kikendassowin bemadisidjig ; pangiwagad nange gaie iw ge-nitawitowapan tchi mino-ajawad.

Kishpin gwaiak ijiwebak, gwaiak gaie kishpin anokitadiwad anishinabeg, kakina awiia ano ninamisid eji-nijike-ajad, anawi mashkawisi eji-widjiiwed. Iw minik kekendang bejig o windimawan widjikiweian, nibiwa gaie win o windamagon; iw minik eji-gashkitod bejig od iji-widokawan widjikiweian, nibiwa gaie win o widokagon. Kawin win eta tibinawe wiiaw od apenimossin anishinabe, od apenimonan gaie widj'anishinaben. Onijishin iw: mi sa gainakoniged Debeniminang epitch nibwakad, — Kawin dash ta-ijiwebassilonon kishpin ginawish-
-king.

Kishpin ginawishkiwad anishinabeg, mojag bewitadiwag, giwadenindiwag mojag, "Nin waiejimigomidog" inendamog; mi dash bisantchi abissigwa wika; mi tchi dadibahandiwad apine; mi minawa bebejig eji-nimamisid, eji-bwanawitod apine gego, mi eji-kitimagisid. Kitwen inendagositchi nansikawad widj'anishinaben tchi ganonad; kitwen inendagosiwag anishinabeg tchi wawindamadiwad gego tchi widokodadiwad; apine dash segisiwag tchi ginawishkindiwad.

Panima dash aw bejig ga-waiejinged, ga-giwanimod, jagwenimo tchi nakweshkawad iniw ga-ginawishkimadjin, mi dash tchi igod : “ Ki gi-ginawishkim.” Win dash ga-waiejimind o nishkeniman iniw ga-ginawishkimigodjin.... Mi jingenindiwin, mi gikandiwin ondji giwa-nimowin.

Debwewan mojag bemadisidjig, da-mino-inawendiwig, da-mino-widokodadiwig ; gego gaie pagamishkagowapan senagadinig, ka gego da-inenindissiwag. “ Kawin nin gi-wi-waiei-jimigossi nikaniss ; anisha gi-wanishin nin eji-wanishinan sasagwana ; ” da-inendamog ; mi dash tchi bonigidetadiwad kakina gego.

Neta-gaginawishkidjig dash gego maianadak ijiwebisiwad, pabige batandiwig, kawin gaie wika weweni ta-nanaitchigadessinon iw ga-matchi-ijiwebak, kawin sa debwetamadissiwag gego minawa tchi wawindamadiwad. Anotch sa go od inigaigon giwanimowin anishinabe enendagosid wadjindingin tchi bimadisid.

III

Memindage neningotodeng eji-widjindiwad anish nabeg, o kitchi-inigaigonawa giwanimo-win.

Ima inendagosiwag nitam abinodjiag tchi pisindawawad o nigiigowan mojag tchi debwetawawad. Kishpin dash igiw wenidjanissidjig giwanimowad, abinodji kawin o ga-gashkitossin tchi manadjiad. O kikendan sa win ajegwa, o nissitotan gaie odeing, eji-manadak, eji-tabassendagwak giwanimowin. Anin dash ged-apitenimad o kitisman endodaminidjin? Anin ged-iji-gashkitopan keiabi tchi debwetawawad? Ano wikkwatchitod tchi babamendamawassig o

matchi-ijiwebisiwini, kitwen ta-gagwedibenima tchi tabassenimad.

Ima, neningotodeng, inini ikwe gaie inendagosiwag tchi bejigwendamowad tchi kitchi-apenindiwad, kakina gego gwaiak tchi windamadiwad, tchi debwetadiwad; kawin gego ta-kasotadissiwag: eji-bejigowad ta-widokoda-diwag. Kishpin dash giwanimowad, kawin keiabi ta-ijiwebassinson. Mojag ta-giwadenindi-wag, ta-monenindiwag. Anin dash ged-iji-sagiidiwapan? Anin ged-iji-minwendamowan, inendamowad mojag: “Gonima nin giwanimig nin widigemagan, gimodj gonima nin waiejimig?” Gego matchi-ijiwebak, ta-gikandiwag; anin dash ge-nanaitchigadegiban iw? Kawin o ga-debwetansinawa iw ge-dibad-jimotadiwad, kawin gaie iw ge-wawindama-diwad. Waiba geget ta-ishkwa-sagiidim, ta-ishkwa-mino-wissokodadim, ima ge-madji-ga-ginawishkinding.

Abinodjiag dash gegginawishkidjig geget go

kitchi-sanagisiwag, gaie jingendagosiwag. O wabandaiwenawa ajegwa iw ga-iji-matchi-nitawigiindwa. Kishpin nanainassiwindwa we-wib, wanisid awakan eji-minwendang tchi ashandise ajishkikang, mi winawa anotch batadowining ged-iji-apagisowad.

Daiebwed abinodji o kikinoamagon iw Kije-Maniton pesindawadjin; minodee, abidik gaie ta-mino-ijiwebisi; mi gaie gwaiak iw wendji-debwed : mino-ijiwebisi sa : kawin gego gekadopan. — Aw dash geginawishkid abinodji o kikinoamagon iw kaiagige-giwanimonidjin maniton; o pisindawan sa, mi tchi ijiwinigod anotch manadadong. Mojag kaso; gimodj kakina gego wi-ijitchige; eji-kadod enendang mi eji-wi-kadod-endodang. Ta-gagibadisi, ta-kitimi, ta-gimodishki; kakina iw gimodj, eji-kikinoa-magod ewakanigodjin maniton. “Nin ga-kadon kakina iw;” inendam.

Neta-gaginawishkid geget go kawin keiabi de-apitendagosissi anishinabeng tchi apiteni-mind; awashime matchi aiaawishing anama-kamig kashkitibikadong wendjibad ki da-ine-nimawa.

IV

Wegonen dash wendji-ginawishking? Inendam na bemadisid, geginawishkidjin, gego wenijishing tchi ondinamasod? Nanagatawenden-danda iw endodasod.

Nitam o waniton Kije-Maniton o jawendjigewini, kema anind, kema gaie kakina; minawa wikwatchitamaso tchi bashanjeond kema ogidakamig, kema gassiakisowining, kema gaie anamakamig; minawa agatendagosiidiso, o tabassenimigon sa widj'anishinaben; win gaie geget agatenindiso; tanassag ojibiigade okatig-wang eji-agatenindisod; kawin sa gwaiak inabissi, kawin ijideessi tchi ganawabamad genonigodjin oshkinjigoning, mojag segisi "kawin

ki debwessi", tchi inind; minawa kawin o de-apitenimigossin widjikiweian tchi apenimonid wiiaw; kawin o debwetagossin, o manenimigon. Mi iw wendinamadisod neta-ginawishkid.

Wegonen dash wendji-giwanimowad anawi nibiwa bemadisidjig? Anotch sa go o waieji-migowan jangendjigenidjin maniton, waiejin-disowag gaie. Pisindawadanig dash nakawe:

Nind anokiwin nind ondji-inendagos tchi giwanimoian; tchi minosseian sa, nawatch nibina tchi gashkitchigeian. Gego ataweiān, pangī eta nin ga-dibaamago kishpin eta iw minik epitendagwak nind aim dibadjimoiam-ban; potch gaie winawa geshpinadodjig, ki-shpin debwetawiwad. Enokitagedjig enonag-wa, kawin da-bi-anokissiwag, kishpin wa-windamawassiwagwa nawatch nibina iw dash enendaman tchi minagwa. — Ijiwebad nind anokiwin tchi debissessinog iw wendinaman, kishpin iji-giwanimossiwan. Potch tchi giwa-nimoian! — Mi ekkitod bejig.

Nin ga-nakwetawa: kishpin iw ijiwebak kid

anokiwin, ki da-nagadan. Debendjiged sa o jingendant, o gagwanissagandan iw anokiwin. Kawin ki gi-minigossi bimadisiwin tchi wai-ejimadwa kidj'anishinabeg; tchi widokawad-wa, ki gi-minigo. Angwamisin : kishpin gi-ginawishkiian iw tchi ondji minossemagak kid anokiwin, nibina ogidakamig tchi gashki-tchigeian,.... geget go bekish nibina, kitchi nibina gaie, kid ondinamadison, nendawen-dansiwan dash : mi sa kitchi - kotagitowin ishkwa-bimadisiian. Mano iji-anokin : agon-wetaw nongom kaiagige-debwed ki Kije-Ma-nitominan : mi dash tchi nopinanad matchi ishkoteng geginawishkid manito !

Minawa bejig ikkito : Tchi kadoian iw ga-matchi-dodaman, abidekamig nin da-giwa-nim : giwanimossiwan, nin ga-animis.

Geget sa go, nikaniss, ki gi-matchi-ijitchi-gemidog; metchi-ijiwebisidjig sa eta nita-ginawishkiwag.... Bekish dash kawin ganage iji ki nibwakassi nongom : ki da-nanaiton ki ma-tchi-ijitchigewin; kawin dash : minawa abiding-

ki matchi-ijitchige. Gagibadendagwad iw! Aninged - inenimadiban anishinabe ga - wiiagitod wenijishing wabishkigin, kishpin ajishkikang apagidopan, wi-binitod? “ Giwanadisi, ” ki da-inenima. Mi kin endodaman. Ki gi-wi-jagishkawa ki tchitchag, gi-matchi-dodaman; mi dash minawa tchi apaginad batadowining. Geget nanaiton ki bata - ijiwebisiwin; kego dash giwanimoken tchi kadoian. Kawin anawi inendagwassinton tchi mijishatoian anisha, ka-win gaie anisha tchi windamawad awiia; kishpin dash gego ikkitoian, debwen. Gaie iw kikendan : nebwakad anishinabe o bonigide-tawan wewib ga-batadinidjin gwaiakwadjin-disonidjin, eshkam dash o nishkeniman gegi-nawishkinidjin.

Keiabi bejig inendam. Apitchi nind inendagos tchi giwanimoian naningotinong. Kishpin sa onijishing tchi gwaiakwadjimoian iw ga-iji - manjissewanen, anawi kawin wika nin-da-dibadodansi iw ga-matchi-ijiwebisid nidj' anishinabe. Abidik nin ga-kadon.

Mano, nikaniss, kadon iw : kego anisha dibadodangen ; kitchi - manabad sa dajindiwin ; manabad dash gaie giwanimowin. “ Kego giwanimoken ” kid ig Debeniminang.

Aw ga - matchi - ijiwebisid kawin keiabi me - no - ijiwebisingin apitendagosissi ; kego anawi ta - makamassi ondjiita iw eji - mino - wawina - winden ; kishpin dash gagwedjimigoian gego , inendagosiiian gaie tchi nakwetaman , mano debwen. Aw sa genonik kawin ta - ginawish - kimassi , tchi nadamawad bekanisid ga - ma - tchi - ijitchiged , ga - iji - wikwatchitamasod dash tchi apitenimind eta epitendagwadinig iw eji - webisid. “ Ta - animisi dash , ” kid inenima. Mano ta - animisi , mi dash tchi nanaitod ajegwa nongom iw ga - matchi - ijitchiged , kishpin be - kadendang ; kin dash , ondji win , kawin ki ga - bashanjeogossi. Kishpin dash ginawish - kiian , kin tibinawe ki ga - kotagiigo : ki nish - kia sa Debendjiged ga - minik gjewin tchi debweian .

“ Anawi , kid ikkit , kawin nin wi - matchi - dodawassi nidj'anishinabe ! ” Ki nakweton : nitam kid inendagos tchi matchi - dodawassiwad

ki Kije-Manitom ; ki matchi-dodawa dash , ki nishkia sa , kid agonwetawa , giwanishkiian ! Win dash kidj' anishinabe kawin kin ki ma-tchi-dodawassi , win tibinawe gi-matchi-do-daso gi-matchi-dodang . Kitimagenim , gaga-nodamaw : Kego giwanimoken !

Oma gaie nin gad-aton iw ekkitowad ke-tchitwawendagosidjig kekendangig eji-mana-dak giwanimowin . Mi sa iw ekkitowad : Gash-kitopan awiia tchi agwashimad kakina anishi-naben matchi ishkoteng , pang i eta giwani-mopan , kawin da-pagidinassi tchi ijitchiged . Mano apine ta-wissaginesiwag anamakamig baiatadidjig , ga-iji-wikwatchitamasowad , ka-win dash ta-agonwetawassi eshpendagosid Kije-Manito , kawin ta-ginawishkissim !

Pisindawada minawa bejig : “ Kawin nin da-wi-giwanimoossi , ikkito ; anawi tchi ondi-namawagwa ninidjanissag kema gaie nidjiki-weiag wenijishing anokiwin , inendagwad tchi

mino-wawinagwa, gaie tchi kadamawagwa iw eji-manjissewad. Debimagwaban eta, kawin da-odapinassiwig. ”

Ta nakwetawa aw : ki matchi - ijitchige, giwanimoian. Kego batamaken kinidjanissag, gaie kego dajindamawaken kidjikiwe o matchi-ijiwebisiwin anisha ; bekish dash, awashime gaie, kego waiejimaken awiia, kitwen tchi anonindwa igiw ano apitendagosissigwa.

Iji-giwanimoian, ki matchi dodawa aw eno-nad enokitagenidjin : ki waiejima sa, mi dash tchi matchi anokitawind ; — ki matchi dodawag gaie bekanisidjig neta-mino-anokita-gedjig ge-gi-anonindwapan, enonassiwindwa dash ; — ki matchi dodawag gaie kinidjanissag gaie kidjikiweiag : kawin sa od inenimi-gossiwan Debendjigenidjin tchi iji-assindwa ano wikwatchitamasossigwa, kawin o ga-wi-dokagossiwan ima iw tchi ondji minosse-wad.

Manjiwiwad kinidjanissag, ki da-nanainag ; enigok anokin tchi ikonamawadwa kakina maia-nadak ijiwebisiwin ; kego dash, ningotchi tchi assadwa, kego giwanimoken.

Ishkwatch, keiabi bejig ikkito : “ Potch go naningotinong tchi widokawagwa nidji'bima-disig nin ga-giwanim ! ”

Gagibadisi mamba : tchi mino - dodawad widj'anishinaben bejig, minawa bejig o wi-matchi-dodawan, o wi-waiejiman : mi o mi-nodeewin ! Enamiekasoian ! nanagatawenda iw nakawe : wegötogwen ged - ondinamawa-den kidji - bimadisi aioian batadowin kema giwanimowin, kid ondinamawa iw matchi-maniton inakakeia, o gad - inikagon abidik ; kishpin wi-jawenimad kidj'anishinabe, Kije-Maniton inakakeia widokaw : widokaw tchi mino - dodang ; kin dash gaie mino - dodam, kego giwanimoken.

“ Nindawatch kawin kitchi-batadowin awan-sinon giwanimowin, batadowinens eta ! ” Mi enendamowad, mi ekkitowad anind. Anin dash

ejiwebak? Mi sa : mojag batadowiniwan gi-vanimowin, naningim batadowinens eta, wa-wika nange gaie kitchi-batadowin.

Enamiad dash, kishpin geget enamiangin wi-ijiwebisid, o jingendan kakina gego ma-ianadak, kakina gego o gotan ged-ondjinishkiapan Debendjigenidjin ; bekish o sagian Jesusan ga-agwashimigodjin, o wi-nopinanana, o wi-pisindawan, o wi-minonawean ; mi dash eji-segisid tchi agonwetawad ganage pangi ; kawin iji-matchideessi tchi wi-mino-dodang iwapi eta saiegimigodjin kagige ishkoteng tchi apaginigod ; kawin ijideessi tchi inendang : “ Kawin nin babamenimassi Kije-Manito ge-go enenimid, kishpin eta kagige-bashanjeos-sig ! ” — “ Apegish ijitchigeian, inendam, apegish iji-dodaman, apegish iji-gijweian ejinandawenimid Aw weossimag gjigong gaminod-dodawid ! ” — Mi dash eji-ojindang batadowinensan kakina, minik eji-gashkitod.

Bekish mikwendang iw kotagitowin eteg gas-siakisowining : “ Nin da-kitchi-gagibadis, inendam, nin da-kitchi-matchi-sagiidis gaie,

kishpin, anisha tchi bapiian nongom, kema tchi aiawigossiwan nongom, kema pang i gego tchi minigoian,... kishpin wanitoiamban Kije-Manito o jawendjigewin, kishpin gaie wikwa-tchitamasioban ginwenj tchi wissagenda-miigoian gassiakisowining. Osam gaie nin da - giwanadis iji - nanisanisiidisoiamban tchi pangishinan kitchi - batadowining, mi dash tchi kagige-banadisiian. Gi-ikkito sa Debendjiged “ Anishinabe bebamendansig batado-winensan, waiba ta-kitchi-bata-dodam.”

Mi-iw nitam ge-nakwetawindwa igiw “ ka-win kitchi-batadowin awansinon giwanimo-win ” ekkitodjig. — Keiabi dash ta-inawag : ano kitchi batadowin awansinog mojag giwanimowin, anawi iji-manedad tchi gagwanis-sagendagwak; Debendjiged sa o gagwanissa-gendamawan geginawishkinidjin odonini. Mi dash tchi gashkitossigwa geginawishkidjig tchi pisindagowad Kije-Maniton pegossemimawa-djin gego, gaie iw ano kitchi batadodansigwa bakan. Kakina awiia anawi o kikendan ejimaneshid apine tchi pisindagod gaie tchi wido-kagod Debendjigenidjin. Mi dash enendagos-

-wad wa-pisindawindjig, meno-sagiidisodjig
gaie : tchi giwanimossigwa sa go.

Mi nongom iw ishkwatch ged-inindwa igiw
bemadisidjig tebinag anamiawad gotansigwa
gaie batadowinensan. Angwamisiioig; naningim
kitchi-batadowiniwan giwanimowin. Dassing
sa ketchi-banadjiiwemagakin, iwapi gaie ki-
-tchi-batadowiniwan.

Bejig bi-webinige; epitch webiniged dash
giwanimo. Ga-ishkwa-batandisod anind bata-
-dowinan : “ Mi na minik-mekwenindisoian ? ”
gagwedjima; — “ E ! mi minik : ” ikkito.
Anawi keiabi gego o kadon wa-dibadjimossig,
epitch manadak, epitch gaie agatendang.

“ Ki kashkendam na gi-kitchi-batadoda-
-man ; ki jingandan na gaie ? ” — “ E ! ”
ikkito ; kawin dash ijideessi. “ Ki wi-nanaiton
na ? Neiab na ki wi-migiwen iw ga-gimodijan ?
Ki bonigetage na ? Ki wi ojindan na iw nen-
-sanendagwak ged-onji bata-dodamamban
minawa ? ” — “ E ! ” kawin dash iji-gijen-
-dansi. Aw apitchi-kitchi-matchi-dodam. O

giwanishkiman Kije-Maniton, o banadjiton webinigewin. — Api ge-wi-gassiamawind, ta-inendagosi tchi iji-batandisod, “ nin gi-iji-giwanim ga-apitch-webinigeiamban, tchi gi-banadjitoian webinigewin. ”

Minawa bejig ikkito, epitch inendang tchi debwetawind ano debwessig : “ Kawin, nibiwa eji-ginawishkiwad, nind iji-ginawishkissi; nin kikendan sa eji-manadak giwanimowin. Nin kikenimig Kije-Manito ginawishkissiwan. ” — Mi dash potch eji-giwanimod. Aw kitchi-bata-dodam ano kitchi babamendagwassino iw de-badodang. O banadjiton sa Debeniminangon od anosowini tchi wi-mashkawitod o giwanimowin. — Wa-webiniged, ta-ikkito : “ Nin gi-giwanim gi-mashkawigijweian, gaie gi-aio-ian Kije-Manito od anosowin. ”

Minawa bejigo nandomigon dibakonigewinini-wan enassamabinid tchi dibadodang gego, tchi dibakonindwa dash bemədisidjig. — Giwanimo iwapi; kitchi-bata-dodam; kishpin gaie awiia matchi dibakonind, kotagiind, kema joniia ma-kamind, win ga-giwanimod inendagosi tchi wi-nanaitod iw, joniia gaie tchi wi-dibaiged;

tchi bwa gassiamawind o batadowinan. — Waiebinigedjin kawin iji debisssessinini tchi ikkitod : “ Nin gi-giwanim ; ” ta ikkito : “ enassamabid dibakonigewinini nin gi-giwanim , gaie bejig nin giwanimowin gi-ondji kotagia , kema gi-makama joniia. ”

Oma gego babamendamog , anishinabedog egindameg manda masinaigan. Geget kid inendagosim tchi debweieg dassing gego ekki-toiegon : kakina gaie gego minik ekkitoieg da-debwewinagad.... Kawin dash mojag kid inendagosissim tchi iji-nakwetneg tchi ki-kendang aw gegwedjimineg , gego enenda-gwak tchi kikendansigoban. Iwapi wawin-gesiog gaie iji-gigitoiog tchi debwewinagak iw ekkitoieg , anawi dash tchi windamawas-siwind iw enendagosid tchi kikendansig ; go-nima gaie iji-nissitotagosiog tchi wi-ojitos-siweg debwewin.

Minawa kishpin enassamabid dibakonigewi-nini gagwedjimigoieg gego ged-ondji-dibako-nindwapan kitchi-besho kid inawemaganiwag , kawin iwapi kitwen kid inendagosissim tchi

nakwetameg. Kego dash anawi giwanimo-kegon. Ikkitoiog eta : “Kitchi-besho nind inawema aw wa-dibakonind, mi dash gego tchi nakwetansiwan.” Ki ga-pagidinigom dash.

Bejig minawa giwanimo eji-batamad vidj' anishinaben batadowin kema matchi-ijiwebi-siwin, wi-ondjiiwed tchi minassiwimind gego aiapitchi - nandawendang win tibinawe. Aw kitchi-batadodam; inendagosi gaie tchi na-naitod iw minik ga-ondjiad widj'anishinaben tchi minassiwimind. Gi-giwanimo sa geget gaie bekish gimodiwining gi-apitendagwadini o giwanimowin.

V

Anishinabedog ga-agindameg manda masi-naigan, ki gi-nissitotanawa nongom eji-ma-nadak, eji-agatendagwak gaie gaginiawishki-win. Keiabi anawi agindamog iw ga-ojibiang kitchitwa kossinan Augustin. "Awegwen gewa-
" -nimogwen, ikkito, o kadon enendang. Anawi
" anishinabeg gi-minawag gigitowin tchi win-
" -damadiwad enendamowad, kawin dash tchi
" kadadiwad. Endodamowad, geget bata-ijiwebi-
" -siwag. Kawin ta-inendansi awiia : inabadad
" tchi giwanimoian tchi widokawag nidj'anishi-
" -nabe, kawin ta-manadassinon. — Nin da-
" ina : da-onijishin na, kid inendam, tchi
" gimodiminan ki joniiam wi-jawenimag beka-
" -nisid awiia? — Ningoting na kawin keiabi
" ta-manadassinon giwanimowin? Ningoting na

“ ta - onijishin ? Kawin sa ! Mi enendang Deben-
“ -djiged : “ Ta - banadisiwag winawa genawi-
“ -shkidjig , Kije - Manito o gagwanissageniman
“ metchi - ijiwebisinidjin ; o ga - banadjian gegi-
“ -nawishkinidjin . ” Ps. v, 7. — Kakina gegi-
“ -nawishkidjig oma dajimawag , kawin eta
“ anind.

“ Geget go kakina gaginiawishkiwin ki da-
“ jingendamin , eji - agonwetamomagak debwe-
“ -win. Eji migadimagak gjig gaie tibik , ana-
“ -miewin gaie matchi - ijiwebisiwin , mino aia-
“ -win gaie akosiwin , bimadisiwin gaienibowin ,
“ mi gaie go debwewin gaie giwanimowin.
“ Minik eji - sagitoiang debwewin , mi minik
“ ged - iji - jingendamang giwanimowin . ” Mi
ckkitod kitchitwa Augustin.

Gaie win kitchitwa Ephrem ikkito : “ Jawen-
“ -dagosi aw wa - nopoladang mojag debwewin ;
“ od inawan Kije - Maniton daiebwewiniwinid.
“ O mino ganawabamigon Debendjigenidjin
“ gaie dash anishinaben. Mojag o widjiwigon
“ debwewin , mi dash iw tchi ondji - sagiigosid.
“ Win dash geginawishkid , od inawan matchi-

“ maniton ga - oshki - ojitonid giwanimowin.
“ Kawin keiabi debwetagosissi, jingenima ish-
“ -piming gaie aking. Dadibabama , ashownina ;
“ wegotogwen gaie ekkitogwen , monenima ,
“ anamenima ;.... anotch ijinagwiidiso , anisha
“ dash , misiwe gaie mojag gagwanissagenima
“ kema bapinodawa. ” Mi kitchitwa Ephrem
ekkitod.

Keiabi bejig ikkitowin. Kije-Manito iji kagi-
-nig debwe eji kaginig aiad.


Eji-wassesid gisiss naiawakwegin ketchi-
mino-gijigakin , mi Kije-Manito gijigong eji-
wasseiasid : O wasseiasiwin dash , mi debwe-
-win.

Eji-tibikassinog , eji-mijisha-nagwak dash
kakina gego ima egodjing gisiss o kitchiwawi-
-siwining , mi eji-kadjigadessinog debwewin ,
mi eji-mijisha nagwak Debiniminang od ogi-
-mawiwining ; Debewewiniwi Kije-Manito , o
wasseiendamian kakina bemadisinidjin.

Aia dash bejig kashkitibikadong anamakamig bemadisid ; aia bejig aiagonwetang debwewin epitch matchi - ijiwebisid ; aia bejig ga - ojited nitam giwanimowin ; aia bejig jangenimad kaiagige - debwewinidjin Maniton ; aia bejig wa - tibikadendamiad , wa - waiejimad anishina - ben ; mi sa aw wenidjanissimad geginawish - kinidjin , mi matchi manito .


Anishinabedog , wabandaiweiog iw wendji - baieg , awenen gaie wa - oosimeg : aw sa weni - jishid daibwed gaie mojag Manito , gonima aw jangendagosid geginawishkid anamakamig daji - aiawish ? Kego wika - giwanimokegon !

L. J. C.




KEGO KITIMIKEGON!

NOTE: ALL INFORMATION CONTAINED



Debendjiged o. gi - pagidinan anishinaben aking
tchi anokitaminid,



KEGO

KITIMIKEGON!



Awetchigan Kije-Manito o masinaiganing ate,
ge-babamendamowapan kakina bemadisidjig,
memindage dash anind anishinabeg neta-gagwe-
-dibenimigowadjin ketimishkinidjin maniton.

Mi dash ejissing. “ Ogimawiwin gijigong
“ tibishko ijinagwad inining wewigiwamid, ga-
“ ani - sagaang kigijeb wi - anonad ininiwan
“ ged - anokinidjin o jomini - kitiganing. Api
“ dash ga - wawindamawad anokiwininiwan
“ bebejig joniansan tchi maminad ningogijig,
“ o gi - ijinajawan o jomini - kitiganing. Nesso
“ dibaiganenig dash (bwa nawakwenig) mina-
“ - wa gi-ani-sagaam, o gi-wabaman anind

“ anisha nanibawinid endaji-atanding, o gi-
“ inan dash : “ Ijag gaie kinawa nin jomini-
“ kitiganing ; gwaiak dash minik ged-apitenda-
“ -gwadogwen ki ga-minininim.” Mi dash ga-
“ iji-madjawad. Minawa dash gi-ani-sagaam
“ nengotwasso-dibaiganenig (naiawakwenig),
“ jaiangasso-dibaiganenig gaie (gi-ishkwa-na-
“ -wakwenig) ; tibishko dash gi-ijitchige (eno-
“ -kissinigon mashi gi-anonad). Medasswi-
“ ashi-ningo dibaiganenig dash minawa gi-ani-
“ sagaam (gega pengishimonig) ; gi-mikawad
“ dash anind nabawinidjin, od inan : “ Anish-
“ -win kabe-gijig oma anisha nanibawiieg ? ” Od
“ igon dash : “ Kawin sa awiia nind anonigos-
“ -sinan.” Od inan dash : “ Ijag gaie kinawa
“ nin jomini-kitiganing.” — Wenagoshininig
“ dash, debendang jomini-kitigan od inan o
“ mijinaweman : “ Nandom anokiwininiwag,
“ mij dash o dibaamagowiniwa.”

Kije-Manito o dibendan iw aki ga-ojitod mi
sa tanassag o kitigan. Ima o pagidinan anishi-
-naben tchi anokitagod ; o wawindamawan dash

tchi wi-mino-dibaamawad ningoting kakige mi-nawanigosiwin.

Bebakan o wi-anokian, o wi-anokian dash kakina. Ishpiming ondji wabamad enokissinid, ketiminid : “ Anishwin, od ineniman, kabe-gijig oma anisha nanibawiwad ! Kakina ta-anokiwag nin kitiganing.” — Enokidjig dash kakina, wenagoshininig, mi sa ishkwa-bimadisi-wad ogidakamig, nandomawag tchi minindwa o dibaamagowiniwa. Winawa sa geget ta mino-dibaamawawag, ta-onanigwendamog gaie ; ketimidjig dash kawin, ta-madjinajawawag, ta-kitchi-minjinawesiwag gaie.

Gijigong ta-pindiganawag ge-gi-mino-anokidjig, ketimidjig dash kawin, mi dash winawa tchi kitchi-mawiwad.

I

Ningoting, tashkibodjiganing gi-anonawag ininiwag kakina minik ga-minwendangig tchi anokiwad. Ga-gijitchigadenig dash anokiwin, gi-odjitchisse dibaamadiwini-gijigad. Kakina ga-anokiwad gi-maminawag iw ga-wikwatchi-tamasowad.

Anind dash gagibadisidjig anishinabeg keti-magisidjig, ga-baba-odaminowad apine epitch anokingiban, o ganawabamawan nongom iniw ga-anokinidjin eji-bapinenimonid ojoniiaminid.
“ Ambe ! ikkitowag, ijada gaie kinawind diba-amagewinini, gonima gaie kinawind, ki ga-maminigominadog pepangi joniia.”

Mi dash geget eji-nansikawawad, pagosseni-mawad tchi jawenimigowad ganage bebejig-wabik. “ Awenenag aiawiieg, o gagwedjim-

-gowan ; ki gi-bi-anokim na gaie kinawa ? ” —
“ Kawin , ” od inawan . — “ Anishwin dash
bi-ijaieg nongom ? Ki gi-nandomigom tchi-wi-
bi-anokiieg mamawi kakina bekanisidjig ; kawin
dash ki gi-bi-ijassim . Kawin da-onijishissinon
nongom kinawa ketimishkiieg , ga-baba-oda-
-minoieg , ningot ga-inabadisissiweg , tibishko
mino ininiwag tchi iji-jawenimigoieg . Mad-
-jag ! ”

Gi-madjawag dash gego gi-minassiwindwa.
Mi gaie gwaiak.

Mi sa geget , anishinabedog , Debendjiged od
inakonigewin : kakina awiia pegidinind oma
aking , ta-anoki ; aia sa go tchi anokid ; kawin
kakina tetibishko ta-anokissiweg , potch kakina
ta-anokiwag bemadisidjig : ininiwag ikwewag
gaie , kitchi-anishinabeg weshkinigidjig gaie ,
ketimagisidjig gaie ketchitwewisidjig .

Anisha bimadisi anishinabe wa-anokissig ; o
nishkian Debenimigodjin Kije-Maniton ; kawin
dash anisha iw ta-ijiwebisissi : ta-bashanjewa
sa abidekamig .

Kego awiia ta - inendansi : agatendagwad anokiwin , tabassendagosiwag gaie enokidjig !

Kije-Manito , aw Maiamawi - ishpendedagosid gi-anoki , ga-ano-anokissig enanokjiang kina - wind enishinabewiiang ; nijwassogwan gi - anoki wi - ojitet gijig aki gaie , kakina gaie gego gijigong aking gaie endagomagadinig . Od ano - kiwin dash kid ondji kikendamawanan . Od ishpendedagosiwin , O gashkiewisiwin , O nibwa - kawin , Od onijishiwin , kakina go O mino - ijiwebisiwinan .

Kije-Manito dash o gi-ineniman anishinaben ga - ojiadjin tchi kikinowabamigod . O gi - ijian gaie ej - owiiawinid gaie ej - otchitchagonid tchi gashkitonid anokiwin , tchi anokinid dash . We - nijishing kitiganing ga - gwanatchitamawad , o gi - assan tchi anokitaminid .

Wieshkat kawin mashi gi - batadodansiwig geget ; minotch anokibanig , minwendamobanig gaie tchi anokiwad , tchi aiowad sa wenijishingin gashkiewisiwinan ga - minigowad Debendjigeni - djin ; gi-minosseni dash kakina ga - ijitchigewad ,

mi dash apine, eshkam gaie, ga-iji-kitchitwa-wenimawad Iniw ga-minigowad kakina gego; mi mojag ga-ondji mamojawagenimawad.

Geget go iwapi kawin gi-sanagissinini od anokiwiniwa: gi-onijishinini apitchi wiiawiwan, kawin wika gi-aiekosissiwag; gi-wenipanad aki, kakina gego gi-minogin; potch dash gi-anokiwag.

Anin dash enendamowad nongom neta-kiti-midjig, epitch jagodeewad? “Apegish nongom keiabi ijiwebisiiang ga-ijiwebisiwad waieshkat anishinabeg mino kitiganing! kawin gi-anokisiwag;” mi enendamowad.

Geget apegish ijiwebak keiabi nongom, tibish-ko waieshkat ejiwebakiban! Iwapi anishinabeg o sagiawabanin, o babamitawawabanin Kije-Maniton, gaie ejii-minodeewad, o mino anokitawawabanin; potch anokibanig, o sagitonawaban dash anokiwin. Kawin mashi ginatchi-ijiwebisissibanig, kawin mashi o givikwatchitamasossinawaban iw tchi sanaganig od anokiwiniwa; mi dash iw ge-kiki-

-nowabandamawindwa, o mino -ijiwebisiwi-
-niwa sa.

Apegish geget ijiwebak nongom iw ga-ijiwe-
-bak iwapi : apegish iji - mino - dodamowad
anishinabeg, apegish iji - minwewisiwad tchi
anokitawawad Debendjigenidjin !

Ta - mino -ijiwebisiwag bemadisidjig, mi tchi
iji - sanagassininig anokiwin, mi tchi minwen-
-damowad anokiwad. Kije-Manito sa ga - ojiad
anishinaben, o gi - ineniman tchi anokinid, mi
sa gawaiak tchi aionid anotchi wenijishingin
gashkiewisiwinan ga - minad tchi mino ijiwe-
-bisinid, gaie bekish tchi mino - bimadisinid,
eji gashkitong aking.

Ga - ishkwa - bata - dodang dash anishinabe ni-
-tam, gawaiak debakonigenidjin Manitou o gi
dibakonigon, gi - igod : “ Iw gi - dodaman ga - gi-
“ - naamonamban, mi ge - ondji - manadak non-
“ - gom ow aki; ta - bi - sagakiwag sa minessa-
“ - gawanjig gaie missanashkog kin ondji ; ki

‘ ga-kitchi-anoki tchi wi-ondji-bimadisiiian ,
‘ ki gad-abwes ki katigwang tchi bwa amwad
‘ pakwejigan.’ Geget dash gi-ijiwebadini iw
ga-igod Kije-Maniton. Minessagawanjig gaie
missanashkog misiwe gi-sagakiwag aking.

Mi apine keiabi nongom ejiwebak : kawin iw
eta ondji inendagosissiwag bemadisidjig tchi
anokiwad; anishinabewiwad sa jewendagosidjig
tchi abadjitowad anotch wenijishingin gashkie-
-wisiwinan ga - awiigowad Debendjigenidjin ,
tchi anokitawawad ;... bekish bashanjeogowi-
-ning apitendagwadini anokiwin ; gi-batadowad
sa , mi wendji iji - bashanjeondwa.

Kakina bemadisidjig oma aking ningotodeng
tanassag dibendagosiwag ; Adaman dash gaie
Evan od onidjanissimigowan ga-batadodamini-
-djin , gaie winawa tibinawe naningim batado-
-damog : mi iw wendji kakina tibishko bashan-
-jeondwa anokiwin.

Kema minwendamowad , kema minwendan-
-sigwa bemadisidjig, potch ta - anokiwag kakina
endashiwad. Kishpin dash ondjita wi-kitimiwad,
kawin da - ashamassiwag , kawin da - aiassiwag
ogidakamig , gaie api ge-nibowad aking gagwa-

-nissagakamig ta-anokiawag ajida-bimadisiwi-
-ning anamakamig.

Ketimid anishinabé od agonwetawan Kije-Maniton debenimigodjin, od agonwetawan gaie ga-dibakonigodjin. Nijwaiagad eji-ma-tchi-dodang, bapinodang nitam od inendago-siwin eji-dibendagosid, gaie dash dibakoni-gowin ga-wikwatchitamasod gi-bata-iji vebi-sid; iw najwaiagak gaie ta-ondji-kitchi-bashanjewa kaginig kishpin anwenindisossig.

Anisha nange bapinodawa Debendjiged! Anishinabeg ga-inenimigowad tchi anokiwad, ta-anokiwag abidik : nongom epitch minindwa tchi dibenindisowad, eji-minodeewad ta-anokiwag tchi gashkitamasowad kagige dibaama-gowin; kishpin dash wi-kitimiwad, potch kitwen ta-anokiwag ningoting, ta-kitchi-anokiawag gaie anamakamig mamawi matchi-maniton; ganage ketchi-kosigwang anokiwi-ning ta-apitendagwadini iw ged-iji-dodawind-wa iwedi.

Winawa dash nongom megwa bimadisiwad

menwendangig tchi mino-anokiwad tchi baba-mitawawad Kije-Maniton, wenibik eta anoki-wag, minik sa ogidakamig aiawad, mi dash minawanigosiwining tchi dibaamawindwa an-webiwin ga-wawindamawindwa.

Aw dash ketimid geget ta-kitchi-abweso, ta-kitchi-mawi bekish. Nongom ganabatch baba-bapishki; **Ta-mino-bapi dash aw ishkwatch ge-bapid.** Neta-anokid weweni, mi aw ishkwatch gijigak ge-mino-bapid; ketimid dash iwapi ta-mawi, ta-mamadwei-abideshin gaie.

Mi iw ged-inendang anishinabe ketimid, kishpin ganage nibwakad, missawa gaie gwa-iak ijitwassig, kishpin eta anishinabeng apit-enindisod. Win dash gawaiak enamiad, na-watch wenijishing o ga-nanagatawenda.

Aw sa inendagosi tchi kikinowabamad Kije-Maniton Ogwissini. Aw dash Kije-Manito Wegwissimind, Jesus sa, ga-apitch-aiad oma aking, od ikkitowin o gi-aion, o dodamowin gaie, tchi wabandaad anishinaben ged-iji

bimadisinid gaie winawa ogidakamig, tchi aniwidjiminawanigosimanid gijigong kakinik.

Mi sa geget ged-iji-ishpendagwadinig anish-inabe od ijiwebisiwin : Kije-Manitong sa, Jesusing nin da-ikkit, da-ijiwebisi ! Anin dash ga-ijiwebisid Jesus ? Apine sa gi-anoki ; gi-anoki gaie eji anoking kotagiidisowining, bas-hanjeogowining ga-ako-matchi-dodaming aking ; gi-sanagadini sa od anokiwin.

Ga-ako-bi-nigid Jesus Bethleheming binish tchi nibod Jerusaleming, apitchi gi-anoki. Abinodjens binish de-mashkawisid, binish de-kikendang gego, binish sa go gega nijwassobi-bonagisid, kawin gego anokissi. Ajegwa dash win Jesus anokiban. Ajegwa o kikendanaban kakina gego, Kije-Manito eji-kikendang : ajegwa kakina gego o nitawitonaban : anokiban dash tchi mindjiminidisod, tchi aiod o gashkiewisiwinan minik eta enenimigopan Wegwissmigodjin Debendjigenidjin, Geget tchi mindjiminang o gashkiewisiwin, tchi kadod iw ge-gi-gashkitopan, enenimigosig dash Os-san tchi dodang, anokiban iwapi Jesus.

Panima nagatch, nitam kitchitwa Manian,

ogin, o gi-widokawan : od anonigobanin nibi tchi nadid, missan tchi bidod; tchigataigeban, bodaweban, sagaskinigeban. Waiba dash ki-tchitwa Josephan o gi-widjiwan, o gi-widji-mokodassoman binish tchi nibonid.

Iwapi nijike gi-anoki tchi bamiad ogin. Ganissimidana dasso bibonagisid, o gi-apitchi-nagadan endad, bebakan gaie gi-ani-anoki : o gi-baba-gagikwenodan sa od ijitwawin ketchitwawendagwadinig, katolik anamiewin.

Ishkwatch gaie, beshowadinig tchi nibod memindage, gi-kitchi anoki tchi agwashimi-nang kagige banadisiwining, binish o misk-wim gi-abwesod kakina wiiawing, o bimadisi-win dash gi-pagidinang tchibaiatigong.

Anishinabedog enamiaieg, mi Aw ge-gana-wabamegoban weweni, mi Aw enendagosiiieg tchi kikinowabameg, kishpin wi-bimadisiieg ishpiming kaginig. Ga-ijiwebisid gi-kitchi-anokid, ijiwebisig.

Kinawa dash ketimiieg, neningisegisiog, andjitoiog ki bimadisiwiniwa. Agatendamadi-

-soiog ki kitimiwiniwa, kinawa wa-nopina-neg aw Debenimineg ga-iji-kitchi-anokid apine minik ga-bimadisid. Api ge-dibakoni-neg : “ Anishwin kabe-gijig gi-anokissiweg ? ki gad-igowa. Awass ijag kinawa ningot ga-inabadissiweg ! ” O gad-inan dash anjeniwan bemitagodjin : “ Apaginig igiw ketimishkidjig kashkitibikadong agwatching ge-daji-mawing, ge-daji mamadweiabideshing gaie ! ”

II

Ketimid aiishinabe kawin eta Kije-Maniton
Debenimigodjin od agonwetawassin : mi iw
anawi eji-manjiwid awashime ; bekish o ma-
-tchi-dodawan , o banadjian widj'anishinaben.

— “ Anin eji-matchi-dodawad ; kid inen-
-dam , kawin go gego o dodansin ? ” — Mi go iw
maia eji-matchi-dodawad widj'anishinaben :
kawin sa o dodansin iw enendagosipan tchi
dodangiban ; bekish gaie bebakan ki ga-nak-
-wetoninim : kawin inabadisissi , kawin gego
wenijishing o dodansin , potch gego o dodan
minik bemadisid : iw dash manadad , nita-
kitchi-manadad gaie . Nissitotawishig .

O gi-ijian anishinaben aking Debendjiged ,

tchi bwanawitonid nibina gego eji-manesinid, nijikewisinid; tchi gashkitonid dash kakina iw wenipadj widokodadinid. Gi-inakanige dash tchi iji-widjindiwad anishinabeg.

Neta-anokid, kawin eta widokasossi win tibinawe, bekish, gaie aiano babamendansig iw, od ondinamawan widji'bimadisin nibiwa gego wenijishing. Mi go iw meno-ijiwebisidjig waiebishiwedjig wendji wenipanisiwad; ma-wandjiidiwag sa, atandiwag iw wejitowad, meshkwatonamadiwag, kawin gego nondesses-sinini.

Ketimid dash anishinabe, wadokasossig, wa-dokawassig gaie widjanishinaben, kawin de-apitendagosissi tchi widokagod; ta kitimagisi, ta-manendagosi, ta-jingenima. "Anisha bi-madisi aw," ta-inenima. Ano inenimigod Debendjigenidjin gego tchi anokitang ogida-kamig, iw tchi ondji-widokawad widji'bimadisin, minotch kawin ningot wi-inabadisissi. Mi dash eji-makamad widj'anishinaben iw enendagosipan tchi widokawad.

Iw gaie eji-widokagod, kawin o wikkwatchi-tamasossin, anisha od odapinamawan. Inining

ijiwebisi ged-aiopan bekanisinidjin od aimini, ge-dibaamawassigoban dash, keina gaie inining ged-anokitagöpan widjikiweian, gego dash meshkwat ge-wi-minassigoban. Geget matchi-ijitchige ketimid anishinabe gego enabadisissig.

Jesus Debenimirang o gi-aion ningoting bejig awetchigan, ged-inabadak nongom tchi kikendaming enenimigowad Kije-Maniton eno-kissigog bemadisidjig.

Mi sa endajindang : “ Bejig inini wassa ga-“ ijad, nakawe o gi-nandoman o bamitaga-“ -nan, gi-ganawendaad o tibinawewisiwin : “ ... bejig dash midasswak dasswabik o gi-“ ganawendaan. Aw dash bamitagan gi-madja “ giawiwaniked aking, mi dash ima gi-ka-“ -damawad debenisnigodjin o joniiamini... “ Panima dash wika gi-dagwishin aw ogima, “ wi-kijikagod o bamitaganan iw gi-inano-“ -kinid... Aw dash ikkito : “ Debendjigeian, “ ki kikenimin sanagisiian, pashkwashkijige-“ -ian ima gi-kitigessiwan, mawandonigeian “ gaie ima ga-saswewe biginigessiwan. Nin-

“ gi-gotadj dash , mi dash ga-onjji-kanagwa
“ anamakamig ki joniiamag ; manda kid
“ aiim . ” — Debenimigodjin od igon : “ Me-
“ -tchi-anokitagetewininiwiian , ketimishkiiian ;
“ ki-da-gi-awiag igiw maieshkwatonigedjig nin
“ joniiaman ; degwishinan dash nin da-gi-
“ aian nind aiim , nawatch gaie nibiwa nin
“ da-gi-aian... Apaginig aw anokitagetewinini
“ ningot enabadisissig kashkitibikadong agwa-
“ -tching ge-daji-mawing , ge-daji-mamad-
“ weiabideshing gaie . ”

Aw hamitagan kawin dibadjimassi gego ma-
-ianadadinig tchi gi-dodang , mi eta ningot
gi-abadisissig , gi-anokissig : mi dash ga-
ondji-apaginind kashkitibikadong. Mi nassab
ge-dodawindwa kakina ketimishkidjig ano ge-
-go maianadadinig bekanak ijiwebisissigwa.

Anawi kego inenimakegon gego tchi ijiwe-
-bisissig bakan maianadak aw-ketimid ! Abide-
-kamig ta-matchi-ijiwebisi. Kawin gego weni-
-jishing o wi-dodansin ; kawin dash apine ta-
nibassi ,... ta-goshkosi naningotinong ! , mi

dash ged-inendagosid iwapi : gego sa tchi inendang, gego tchi ikkitod, onindjin gaie tchi aiod. Osam dash jagwiwi, osam jagodee tchi migadang gagwedibendjigewinan eji-pagamish-kagod ; kawin gaie, ejideed, o widokagossin Debendjigenidjin ; o ga-jagotchiigon dash ma-tchi-maniton, o ga-matchi-inendamoigon, mi dash gaie tchi bata-gijwed gaie tchi bata-ijiwebisid.

Ketimid ogidakamig jimaganishing apiten-dagosi wa-bisikansig od ashwiwin megwa migading, epagidang gaie o pashkisigan, "osam nind aiekosiigon" enendang, mi dash eji-namadabid genawabamad magasonidjin. Anin ged-ijiwebisid, kid inenimawa ? Ta-nissa, kema ta-takona. — **Migadiwiniwan bimadisi-win** aking : kishpin nitossiwan maianadak, ki-ga-nissigon. Ta-kitchi-anoki dash awiia tchi migadang gaie tchi jagotchitod maianadak; anokissig, kitimid, o ga-jagotchiigon, ta-ma-tchi-dodam, ta-banadisi dash.

Mikwenindisoilog ga-iji-deeieg api ga-ki-

-timishkiieg ; kema ganawabamig ketimish-kidjig : ki gad - ondji - kikendamoigom eji - banadjiiwemagak kitimiwin. Ketimishkid nita-gagibadendam , nita - wini - gijwe , mi dash gegapi - eji - winisig gaie odeing ; ketimishkid nita-baba-dibadjimo , nita-ginawishki gaie tchi dibadjimod nawatch ; anotch dananagidon , o matchi - dajiman widji - bimadisin ; jingenin - diwin , gikandiwin misiwe o sasweshkan. Keti - mid kawin minwendansi wika ; anotch o nan - dawabandanan minawanigosiwinan ;... anisha dash : mi eshkam , kawin minwendansi. Bapi , nimi , giwashkwebi , bekish kashkendam , mi - goshkadendam apine.

Anin dash epitenimeg , kinawa waiabanda - meg iw masinaigan , aw dowa aiawish ? De - apitendagosi na tchi bimadisid ? Ningot na ina - badisi aking ? Gonima sa ; mi eta dash tchi wabandaiwed mijisha eji - manendagosid , eji - tabassendagosiidisod gaie anishinabe bebamita - wassig . Debenimigodjin , egod tchi - anokid , ketimid dash.

Nindawatch apegish bimadisissig awiia keti - mid ; osam sa nanisanisi , osam banadjiiwe.

Matchi akosiwining apitendagwad kitimiwin : ijiwebisid bejig , waiba minawa anind , nibiwa gaie naningotinong , od inigaigonawa. Inakoni- - gade megwe waiabishkiwedjig ondji bejig kitchi manadapinewin ; kitchi omigiwin sa : awegwen ged-inapinegwen , ta-ikonajawa wassa ningotchi ge-daji-gashkitossig minawa wika tchi nasikawad besho bemadisinidjin ; osam segendagwad sa tchi mamigiwewad iw benadjii- -iwemagak akosiwin. Miiw apegish ged-ijiwebak ondji ketimidjig. Apegish ojimindwa , apegish ikonajaondwa ningotchi wassa ge-daji-gashiki- -tossigwa keiabi tchi banadjiawad widj'anishi- - nabewan !

III

Keiabi manda o ga-nanagatawendanawa we-weni anishinabeg. Misiwe sa gega endanaki-wad, manendamog, kitchi ossitawendamog gaie naningotinong, debewagendamowadjin eji-bi-kiti.nagisiwad, eji-bakadewad eshkam eshkam.

Kawin mashi mewija awansinen, iwapi ka-win wika o nondessessinawaban wenijishing midjim; atchina awi-pagidawawaban, kema giossewaban, mi nibiwa gigoiag, mi wiiass, mi gaie biwaian, atawaganan sa tchi ondinamo-wapan anotch gego. Iwapi gaie ininatigog kitchi-nibiwagisiwabanig, nibiwa sisibakwat od ojitonawaban anishinabeg.

Nongom dash kawin bapish ijiwebassinson : gigoiag gaie awessiag gega gi-tchaginanawag,

eshkam eshkam gale pepangishengisiwag weni-jishidjig ininatigog : mi dash eji-bi-kitima-gendagosiwad anishinabeg. O mawindanawa dash gete o bimadisiwiniwa, o batamawan gaie, o nishkenimawan waibishkiwenidjin : “Nin makamigonanig nin tibinawewisiwininanin” ik-kitowag.

Kawin oma inendagwassinton tchi nanagata-wendaming gaie tchi dibakonaming iw ga-bi-iwebisiwad waibishkiwedjig. Kishpin matchi-dodamowad anind, kishpin gimodimawad nishinaben, kishpin waiejimawad, o ga-basanjeogowan Debendjigenidjin.

Inendagwad eta nongom tchi nissitotamoind-va anishinabeg meno-inendangig iw ge-dalamowad tchi mino-widokasowad, mi dash eiab tchi mino-aiawad, tchi jawendagosiwad ie nawatch epitch dash ga-jawendagosinid nishomissiwabanin. Kishpin sa nibiwa maia-adak gi-bidawawad anishinaben waisbishki-wedjig, nibina bekish o wabandaawan weni-shininig, memindage winawa gwaiak enami-

-adjig : anamiewin sa go , gaie anokiwin. Mi iw
ge-kikinowahandamawegwa weweni , kinawa
anishinabedog , kishpin wi-nibwakaieg , kishpin
wi-mino-bimadisiieg gaie.

Eji-anamiad dash gaie eji-nibwakad wa-
-iabishkiwed , ki kikinoamagowa iw ge-do-
-dameg .

Eji-anamiad kid igowa : “ Maiamawi-ish-
-pendagosid o gi-pagidinan aking anishinaben
tchi anokitaminid. Babamitawig ! Anokitamog
aki ; mi iw ged-ondinameg kakina eji-mane-
-siiieg . ”

Eji-nibwakad dash bekish , mi enineg waia-
-bishkiwed : “ Kego kitimikegon ; anokiiog ,
dajikamog kid akimiwa wewen , mi wika tchi
bakadessiweg ” .

Ki gi-ishkonamagom aki kinawa eta ged-
abadjitoieg ; de-mitchamagad dash , de-onijishin
tchi ondinamadisoieg ganage iw minik enenda-
-gwak tchi kitimagisissing ogidakamig . Kego
dash ge~~et~~ t , kego kitimikegon !

Mewija kimishomissiweg o gi-gashkitamaso-

-nawa nibiwa gego anisha , bwa anokitamowad
aki : debwewinagad iw , nind inendam ; anawi,
anotch gego senagak o gi-odissigonawa ga-
ondji-kitimagendagosiwad wassa nawatch epitch
dash kitimagendagosiiieg kinawa : iw sa memin-
-dage gi-pagwanawisiwad , gi-anamiassigwa
gaie.

Geget go kinawa , “ nin jawendagosimin ; ”
ki da-inenindisom ; ki da-migwetchiawag gaie
enikogodeeieg meno-ijiwebisidjig waiabishki-
-wedjig , nigan dash ki mekateokonaiemiwag
ga-kikendamoinegwa katolik anamiewin ena-
-momagak gijigong ; ki gagikimigowag gaie
ged - iji - mino - abadjitoieg iw ga - ojitamagoieg
tanassag oshki - bimadisiwin .

Kego kitimikekon ! anokiio , kitigeio , bekish
mino anamiag , mi iw ged - ondji - mino - aiaieg
oma aking , minik eji - gashkitong .

Kawin keiabi atassowigamigong apitengwas-
-sinon sagaigan , kawin gaie nopiming ijinag-
-wassinton ; ki kitiganiwa , mi iw nongom ged-
iji - apitendagwak kishpin kitimissiweg . Kawin
keiabi ki gad - inendagosissim tchi baba - gabe-
-shiiieg misiwe , gaie tchi babamadisiieg apine

awi-nandawabandameg ge-midjiieg ; mi dash wigwamishing tchi daieg endaji gikadjieeg ; mi dash gaie pegwanawisingin mojag tchi-ijiwebi-siieg, gaie kinidjanissiwag wika gego tchi kikendansigwa.

Anokiiog, anokitamog aki tchi babamitaweg Kije-Manito, kitigeiog ; mi dash baiejigwang aking, ishkoniganing sa, tchi aiawad nibiwa, apine tchi widokodadiwad gaie tchi mino nita-wigiawad onidjanissiwan.

Ki ga-wakaiganikem, mi dash eshkam eshkam tchi onijishitoieg endaieg : mi wedi tchi nigiwad kinidjanissensiwig, iwedi ta-mino ganaweni-mawag, ta-madjigiwig, ta-anokiwig gaie winawa, mi wedi ge-manadjinegwa ; iwedi gaie, wika dash eta, api ge-gikaieg, ki ga-mi-no-bamiigowag, binish iwedi tchi-ondji-nan-domineg Maiamawi-ishpendagosid od ogima-wigamigong ishpiming.

Anamiewigamig gaie ta-ojitchigade tchi daji-kikinoamagoieg weweni endasso anamiegiji-gak iw ge-dodameg, gaie ged-ijiwebisiieg tchi

minwendang Debondjiged, mi dash tchi ja-
-wenimineg tchi minawanigosiineg gaie ka-
-ginig.

Neta-bebamadisidjig dash anishinabeg, anin
ged - iji - kikendamowapan gego wika ? apine
nijikiwe siwag ! kawin awiia ge - kikinoamago-
-wapan ! Kawin enamiangin ta-bimadisissiwag ;
anin dash enamiangin ged - iji - nibowapan ?
Geget kitimagendagosiwag !

Kishpin wi-anokitameg kid akimiwa apine
ima tchi daieg, kikinoamadiwigamig ta-ate,
kishpin gaie de-nibwakaieg tchi ijinajawegwa
kinidjanissiwag weweni endasso gijigak, ta-
nandakikendamoawag kakina iw minik winawa
waiabishkiwedjig kikendamowad, enabadjito-
-wad dash tchi mino-aiawad.

Kego dash ta-kitimissiwag kema wenidjanis-
-sidjig tchi madjinajawawad onidjanissiwan
kikinoamading, kema gaie abinodjiiag tchi pisin-
-dawawad weweni kekinoamagenidjin ; kishpin
sa kitimiwad, apine tchi ijawad gaie tchi baba-
-mitagewad, pepangi eta o ga-kikendanawa.

Ima gaie apitchi-kitchi-banadjiiwemagad kitimiiwin.

Gi-ikkito Debendjiged, ga-iskhwa-bata-dodang Adam : “ Ki gad-abwes, mi dash tchi wissiniian.”

Kakina geget anishinabeg wi-wissiniwag, nibiwa dash kawin wi-abwesossiwag : kitimi-wag. Debendjiged inakonige : ta-anokiwag, ta-abwesowag nitam anishinabeg, mi dash Nin tchi ondinamawagwa midjim.

Wegonen dash iw anokiwin ga-anamietang Debendjiged memindage : mi sa iw, kitigewin. “ O gi-pagidinan sa Kije-Manito anishinaben aking tchi anokitaminid : ” mi sa ekkitomagak kitchitwa Masinaigan. Nitam kimishomissina-banig o gi-debwetawawan Debendjigenidjin, gi-kitchi-kitigewag, gaie o gi-nitawigiawan awakanan ; mi dash ga-iji-mino-bimadisiwad geget.

Anind dash nongom anishinabeg ga-wikwa-

-tchitowad kitigewad, kawin gwetch gi-mi-nossessiwag.

Anin dash enanokiwad? Ketimishkingin go-nima inanokiwag. Osam pangi aki od ojitonawa, naningim gaie osam negawika iw wejitowad.
“ Kawin oma nibiwa otchibikassigon, gi-inen-damog, kawin nibiwa mitigog aiassiwag, tawenipanad tchi binitchigadeq gaie tchi bikobid-jigeng, mi oma ge-kitigeian.”

Minawa, mitchikanikewag geget; bigoshka-magak dash mitchikan, kawin o nanaitossina-wa pabige, mi dash awakanag eji-pindigewad.

Minawa osam gagigitowag anind; osam gin-wenj nibawag, osam wika gaie, binish ishpi-gijigak: osam pangi anokiwag.

Ijiwebad kitigewin tchi nandawendagwak naningotinong kitchi nibiwa anokiwn, kitchi atchina dash ge-dajikaming tchi minossemagak, memindage api ge-mamang. Mino-kitigewinini iwapi nio-dibaiganeg kijigeb kitiganing aia, kawin gaie giwessi tchi bwa tibikak: geget go abweso, ta-wissini dash, nongom, gaie kabebibon.

Anind dash anishinabeg ketimidjig nijwasso-

dibaiganeg keiabi nibawag, jangasso-dibaiga-neg kitiganing ijawag, giwewag nawakwegin, ishkwa-anokiwag ginwenj tchi bwa tibikak : kawin gwetch abwesossiwag.... kawin gaie gwetch ta-wissinissiwag! Winawa dodaso-wag; ta-anwenindisowag, geget ta-minjina-wesiwag.

Mino-kitigewinini bebong anwebi pang, mi dash minawa tchi anokid ; apagandaige sogipog; mino-gijigak dash anotch o dajikan, missan, mitchikan, wakaigan ; kema gaie kishpin gash-kitod, anokitage, joniia tchi gashkiad, mi dash o kitigan tchi gwanatchitod ; gonima gaie abad-jitchiganan o gishpinadonan, nawatch weweni tchi kitiged. Win dash anishinabe ketimid kawin nita-ijiwebisissi. Gashkitod tchi debissi-nid kabe bibon, kabe bibon kawin ta-anokisi ; gonima gaie, kishpin anokid, pabige o tchagi-nan iw minik gashkitchiged.

Anishinadebog! “Apegish mino aiaiang non-gom gaie mojag!” kid inendam.

Nibwakaiog dash ; pisindawig Debendjiged :

weweni babamendamog iw egoieg manda masi-naiganing : mi dash tchi minwendameg.

Kakina ki minigowa Debeniminang eji-debis-seieg tchi mino-bimadisiieg. Angwamisiioeg dash tchi kitimissiweg !

Ki banadjiigonawa sa osam naningim kitimi-win , eji-otchitchagoieg gaie eji-owiiawiieg ; eji-bimadisiieg nongom wenibik ogidakamig , ged-iji-bimadisiieg gaie kaginig .

Pisindawig Debeniminang : Anishinabedog , kego kitimikegon !

L. J. C.



KEGO

GAGAWENDJIGEKEGON!





Kain o gi-nissan Abelan, gi-gagawenimad.



KEGO

GAGAWENDJIGEKEGON!



Kije-Manito Debeniminang apitchi-kitchikijewadisi, apitchi gaie nita-jawendjige.

Waieshkat, bwa mashi atemagak iw aki, kema gaie gijig, win eta aiaban... Kitchitwawiwinning, minawanigosiwining, gaie deosisiwining ondjita aiaban, win, Manito Weoss-imind gaie Wegwissimind gaie Wenijishid-Manito. Aw dash, wika gego awashime ge-mi-nassiwindiban, epitch dibendang ajegwa kakina go gego wenijishininig;... Aw eji-moshkinesh-kagod wawinge-kakina gego jewendagwadinig, wika gego awashime tchi jawendagosiasiassiwindiban;... Aw sa, ki mino ki Manitominan, gi-

gidendam tchi ojiad nitam anjeniwan, panima dash anishinaben,... kawin sa win tibinawe gego tchi ondinamasod anokitagog; — (Anin sa ged-inabadadinigoban Maiamawi-Ishpenda-gosid gego bwaianawitossig, tchi anokitagog tebassendagosinidjin aiaan pingwing epitenda-gosinidjin, gego geshkitossinigon mi eta win tibinawe widokawad?)... Tchi minawanigosiad od ogimawiwining gijigong, tchi jawenimad, tchi kitchitwawisiad, mi ḡ-ondji-ojiad. Geget minodee Debeniminang! Awenenan wika ge-de-kitchitwawinigopan eji sagiiwed, eji-jawend-jiged!

Kije-Manito minwendam ondjita tchi jawend-jiged, gwaiak iw ondji, minodeed; ano gego bakan tibinawe win ondinansig ima menwendagwadinig. Mi sa aw ge-kikinowabamindiban.

Matchi-Manito, gi-matchi-ijiwebisid ishpi-ming gijigong, gi-apagiso anamakamik kagine ishk̄teng. Kawin wika anwenindisossi, kawin wika ta-ishkwa-bashanjewassi. Jingendagos nongom, apine gaie jingendjige, manadadini ondjita od inendamowin. O wabaman dash

anishinaben ejí-pagossendaminid kagige mina-wanigosiwin tchi minimindwa mino-ijiwebi-sinid;... mi dash ejí-GAGA WENIMAD... “ Bi-kotagiindwá kakina anishinabeg oma anamakamik, kawin nin, nawatch pangi iw nin ga-ondji wissaginesissi; kawin ganage gego wenijishing ima nin gad-ondinansin; wegotog-wen ejíwebisiwagwen, nin, kaginig nin gat-chagis...! Potch! nin jingendar iw tchi mino-aiawad megwa nin oma iji-kitchi-kotagitoian. Nindawatch geget nin ga-matchi-dodamoag, nin ga-banadjia! ”

Matchi-Manito minwendam ondjitá tchi banadjiwed; mi go eta iw wendji-dodang, matchi-deed, ano gego tibinawe win ondinansig ima menwendagwadinig. Mi aw kakina gego ge-jingendarawindiban, Manito gegawend-jigel.

I

“ Mino-ijiwebisig, Kossiwa gijigong ebid eji-mino-ijiwebisid.” Mi enindwa enamadjig ga-jawenimindwa, api ga-sigaandasowad, tchi onidjanissimigowad Kije-Maniton. Mi dash enendagosiwad, Debendjiged eji-minodeed tchi minodeewad, eji-sagiowed tchi sagiiwewad, eji-jawendjiged tchi jawendjigewad;... iw eta ondji wi-minotchigewad.

“ Mi iw ge-ondji-kikeniminegwa kakina be-madisidjig, nin kikinoamaganag awiieg, iw sa, sagiidieg.” Mi iw enad Jesus o kikinoamaganan gaie kakina enamianidjin.

Anin dash sagiidiwin enanokimagak? Mino-dodagemagad sa gwaiak iw ondji tchi minododagemagak. Saiagiiwed sa o sagian widj'anis-hinaben eji sagiidisod, awashime gaie nanin-

-gotinong; kakina gego eji-nandawendamadisod wenijishing od iji-nandawendamawan, o wiminan gaie saiagiadjin; kakina dash maianadak wa-ikonamadisod o wi-ikonamawan gaie. Min-wendam waiabamad widjikiweian minossenid, ged-iji-minwendangiban, tibinawe win iji-jawendagosipan. Kotagendam waiabamad widjikiweian sanagisinid, ged-iji-kotagendangiban, tibinawe win iji-sanagisipan. Geget oni-jishinini ode enamiad saiagiiwed; o kitchi-mino-inènimigon gaie Ossan gjigong ebinid-jin; abidekamik gaie o ga-mino-inenimigon bemadisinidjin.

Mi dash iw kitchitwa Jean ga-ondji-inago-banen enamianidjin, binish go gega ningotwak dasso-bibonagisipan, gagikimapan iw ged-ijiwebisinipan : “ Ninidjanissensidog, we-weni sagiidig. ” Mi mojag nassab eji-gigitopan,... binish gegapi anind gi-jigadendamowad bejigwan mojag ekkitonid. “ Wagonen wendji, o gi-inawan ningoting, wagonen wendji mojag tibishko ijiiang : Ninidjanissensidog, we-weni sagiidig? Ka na gego atessinini bekanak Jesus od angwamitagosiwin ge-windama-

-wiiang? ” — Mi dash win keiabi ga-iji-nak-wetawad : “ Ninidjanissensidog, weweni sagiidig! Mi sa Debeniminang o kitchi gana-songewin; awegwen gaie ge-ganawendamog-wen, mi go eji-debissenig; ” e ganawenda bekish kakina gego bakan.

Nitam ga-bi-anamiadjig o gi-minotanawa, o gi-kitchi-babamendanawa gaie iw sagiidiwini-inakonigewin. Apitchi go gi-mino-inenindiwag, gi-mino-dodadiwag, gi-jawenindiwag, gi-wido-kodadiwag. Ketchi-danidjig o gi-atawenawan od inodewisiwiniwan tchi ashamawad ketima-gisinidjin; meno-bimadisidjig o gi-ganaweni-mawan aiakosinidjin; ketchitwawisidjig o gi-kijanawan nawatch tebassendagosinidjin... Mi dash ga-iji-mamakadenimigowad enamiassini-gon neta-matchi-sagiidisonidjin : “ Wabamig enamiadjig, gi-ikkitobanin, eji-sagiidiwad! ” ... Geget gi-bejigodeewag... eji-bejigodeewad keiabi nongom kakina wendjita-apitendagosidjig “ anamiawag ” tchi inindwa.

Kishpin dash iji-maiawendagwak anamie-

sagiidiwin, anin enendagwadinig, kid inendam, win od ijiwebisiwin wendjita-bakan-inadisid?.. Kishpin aw wendjita sagiiwed, aw saiagiad widj'anishinaben eji-sagiidisod, kishpin sa aw kikinowabamad Kije-Maniton; awenenan, kid inendam, kekinowabamad gaie pesindawad aw bemadisid gegawendjiged? Aw sa, mi eji-deed, tchi minwendang wabamad widjikiweian kotagendaminid, kema iw tchi ondji-nitakashkendang wabamad minwendaminid. Ma-tchi aiawishan jangendjigenidjin o kikinowabaman, o pisindawan!... Kishpin ishpiming ondjibamagak, ishpiming gaie kishpin inamomagak gwanatch sagiidiwin; anindi wendjibamagak, anindi gaie enamomagak iw matchijiwebisiwin, gagawendjigewin? — Anamaka-mik sa go ondjibamagad, anamakamik gaie inamomagad!... Anishinabedog angwamisiilog; kego gagawenindikegon!

II

Weweni nongom wikwatchitoiog tchi nissi-totameg ejiwebak gagawenindiwin, mi dash tchi wi-apitchi-ojindameg.

Latinmong ijinikade gagawendjigewin, we-weni gaie, “ invidia , invideo ”. “ Invideo ” dash , (mi eji-kikinoamaged bejig ga-kikendas-sod mekateokonaie. Louis Mehler ga-inind), gwaiak wi-ikkitomagad anishinabemong “ ka-win nin wabandansin ”. Neta-gagawendjiged sa kawin o wi-wabandamawassin widj'anishinaben gego wenijishininig; mi dash Kossinanig ketchitwawendagosidjig ga-iji-dajindamowad gagawenindiwin : Mi satiw gagawendjigewin, kishpin awiia kashkendang, ondjita iw ondji wabamad sa widjibimadisiniid eji-mino-aianid, tanassag igo manjikagod win tibinawe iw

widj'anishinaben eji-minokagonid; kema gaie, nin manendagosiigon, inendam, ondjita iw nikikiwe epitendagosiigod nawatch. Mi dash gaie mabam eji-matchi-ininwendang gego wendji-manendagosinid bekanisinidjin, inendang : iw sa wendji-manjissed nikaniss, mi go wendji-inendagosiian nin nawatch tchi minoseian. Geget go gagibadisi gaie matchidee!

Indiawaking anind binesiwag aiawag, Nibag enindjig; gwaiak dash inādisiwag, neta-gaga-wendjiged anishinabe enadisid. Meno-gijiga-kin, waiasseiasidjin gisiss o kitchitwawisiwi-ning, nebongadisingin wasisswaniwang apine aiawag; neskadakin dash gaie ketchi-gotami-gwakin, iwapi wenanigwendangin baba-bi-missewag masitagosiwad... Mi neta-gagawen-djiged eji-nibongadisid, wassitawendang me-gwa tanassag wasseiandamiigowad bekanisi-djig gego menwendagwadinig; bapinenimo dash gaie onanigwendam, megwa tibishko gis-sadendamowini-tibikadong aianid widjibima-disin.

Anishinabedog! Kid nissitotanawa na non-

-gom iw ejii-gagwanissagendagwak gagawenin-diwin? Nanagatawendamog keiabi mandan.

Kishpin awiia matchi dodawid; kishpin jin-genimid, kishpin migajid, kishpin matchi-dajimid,... kawin anawi nin pagidinigossi tchi ajidawaag, mi dash meshkwat tchi matchi-dodawag, tchi jingenimag. “Saiagiinagog, kego wika ajidawaakegon awiia metchi-dodon-neg, ojindamog nishkadisiwin, ajidaawin:” Mi eninang kitchitwa Paul. Minawa ikkito; “Kego adjidawaakegon awiia ningotano ejii-matchi-dodoneg...” Ijiwebisiiian dash minotch, kawin enamiangin nin ijideessi; enamiassigog epitendagosiwad nind apitendagos, Jesus gaie nind apitchi-agonwetawa. Wi-ajidawaigeian, nin bata-ijiwebis geget;... anawi nissitotagwad iw matchi-ijiwebisiwin; ganage pangi nebwa-kadendagwak dibaamadiwining ijinagwad, ano manadak ondjita; mano gaie awiia ge-gikinoamagossigoban Jesusan gwaiak sagiidi-win, ta-inendam: aw ga-dajinged wikwachitamaso tchi dajimind, aw ga-matchi-dodaged wikwatchitamaso tchi matchi-dodawind, ga-gimodid mano ta-makama gego, aw ga-nissind

mano ta-nissa. Enamiassigog waieshkat, ga-apitch-matchi-nibwakawad, mi ga-inenda-mowad.

Neta-gagawendjiged dash wassa awashime matchi-ijiwebisi. O matchi-ineniman, o nish-keniman, anotch o matchi nandawendamawan widj'anishinaben, ano gi-matchi-dodagossig ganage, ano gaie naningim gi-kitchi-mino-dodagod. Pijishig iw od ondji wassitaweniman, mino-aianid, mino-ijiwebisinid, minossenid awashime epitch dash win.

Kishpin awiaa gego matchi-dodawad widj'-anishinaben, kema gimodimad, kema bata-mad, kema nissad, tchi ondinamasod gego ketchi-nandawendang,... apitchi go matchi-ijitchige; anawi nissitotagwadini iw wendji-dodang gego sa o wi-aian, ged-onijishini-nig, inendam; mi dash tchi matchi-ijitchiged wi-nasikang... Anawi, iw wa-gashkitod oni-jishinodog, ano manadak apitchi iw enanokid tchi gashkitod;... naningim gaie minjinawesi gimodj iw ondji eji-matchi-dodang, kitwen dash dodam, wi-aiang iw saiagitod wenijishing.

Aw dash neta-gagawendjiged kawin gego
o nandawendansin wi-gashkitod wenijishing.
Batange tchi manenimimind iniw baiatama-
-djin; gimodi, banadjitchige tchi sanagisiimind,
tchi banadjiiimind iniw gemodimadjin, baia-
-nadjitamawadjin od aimini. Ondjita iw ondji
matchi-dodam, matchideed.

Inadjimo kitchitwa Antonin, Florence ga-
daji-kitchi-mekateokonaiwid : Nij bamita-
ganag waieshkat od anokitawabanin kitchi-
ogiman Sicily aking. Bejig nita-gagawendji-
-geshkiban, minawa dash bejig sasagisiban
apitchi. Ningoting kitchi-ogima o gi-wi-minan
o jimaganishiman tchi kitchi-bapnid... Enas-
-saminid dash, mi eji-nandomad iniw o bami-
-taganan ; o mino-ganonan dash, o mino-win-
-damawan iw eji-mino-anokitagenid, mi dash
enad : “ Nindawatch, ga-iji-mino-wikwatchi-
-tamasoieg ki wi-mino-dodoninim ; nandotama-
-wishig wegotogwen ge-minwendamowegwen :
ki ga-minigom sa... Bejigwan eta ge-babamen-
-dameg weweni : Aw bejig sa, nitam ge-nan-
-dotamaged, ningoting minik ta-mina iw ge-

nandotang, aw dash minawa bejig nijing iw minik ta-mina... Ambe nongom, ijishig... wegonen wa-aiameg? ” — Neienj dash bami-tagaganag kawin wi-gigitossiwag; kawin bejig win nitam gego o wi-nandotansin... Sesagisishkid inendam “ Kawin nin nitam nin gagigitossi; potch nijing nin gad-aian minik maba ge-minind. ” — Aw dash gegawendjiged : “ Kawin wika da-ijiwebasson, inendam, tchi minindiban maba nawatch nibiwa epitch dash nin. Nindawatch awashime nin da-minwendam gego ganage tchi minigossiwan; kawin go ganage nin da-wi-iji-dodansin nijing win tchi jawenimind iw ningoting eta ge-jawenimigoianban. ”

Kitchi-ogima dash ga-ishkwa-babitod anisha o nakwetamowiniwan, gegapi gi-inakonige : Mano win neta-gagawendjiged nitam ta-gigitotchi nandotamaged enendang... Gi-sanagadini dash! apitchi go geget gi-sanagadini aw gegawendjiged tchi wi-gigitod nitam... “ Wegenen ge-nandotamowanen, inendam, ge-minokagos-sigoban awashime maba jangenimag sesagisishkid? Kishpin wi-minigoian bejig bebejigo-

-gaji, win nij tə-mina; kishpin oejig wigiwam, win nij o gad-aianan!... Kawin ganage tajewebassinon; kawin nin ga-pagidinansin tchi ijiwebak!... Awashime nin minwendam gego kwetagendagwak tchi nandotaman; mi dash win nijing awashime tchi kotagitod. "... Giiji-gijendang : "Nin ga-pagosserima kitchi-ogima, ikkito, tchi inakoniged, nin bejig nish-kinjig tchi banadjitamagoian, mi dash nidji-kiwe oma eiad, neienj oshkinjigon tchi banadjitamawind, wawinge dash tchi gagibing-weind."

Pabige gi-kitchi-bapiwag kakina oma ga-aiadjig jimaganishi-ogimag. Aw dash gegawendjigeshkid gi-kitchi-agatendam, gi-iji-mi-jishatod o matchideewin..... Apegish tetibishko agatenindisowad kakina gegawendjigedjig; api-tchi sa tabassendagosiwag. Ogima-matchi-Maniton o kikinowabamawan, kitchi-banadj-iwewag bekish!

Nanagatawendamog keiabi nongom gego ga-windamonagogoban ajegwa.... Wegonen wendji-ijinagwassinoğ keiabi iw aki, ejinagwa-

-kiban waieshkat, Debendjiged api ga-ojitol? Wegonen wendji-iji-jawendagwassino keiabi bimadisiwin ogidakamik, tibishko iwapi? Wegonen wendji-kitimagendagosiwad apine non-gom bennadisidjig? Wegonen wendji-akosiwad gaie nibowad? Wegonen wendji-batadowad?.... Gagawendjigewin o dodagonawa kakina iw. Gi-gagawenimad matchi-aiawish anishinaben, mi ga-ondji-anokid tchi batadodamoad. Kawin Adam, kawin gaie Eve gego o gi-matchi-dodawassiwawan iniw kagige-ishkote-daji-aia-wishan; kawin gaie nawatch pangi wissagi-nesisssi aw, ano wikkobinad anishinaben ana-makamik. Potch! gagawendjige, ondjita matchidee. Binish ishkwa-akiwang ta-kitimagine-nagwad bimadisiwin aking : mi eji-minwendang!

Kain gaie Abel gi-oshimeindiwag. Abel gi-kitchi-bekadisi, gi-mino-ijiwebisi gaie, o gi-sagiigon dash Kije-Maniton. Kain dash win gi-matchi-inadisi, gi-matchi-sagiidiso gaie..... Ningoting dash neienj gi-pagidjigewag. O pagidjigewini dash Abelan, Debendjiged o gi-

mino-odapinamawan; Kainan dash o pagidji-gewini kawin o gi-wi-babamendamawasssin, ondji o matchi ijiwebisiwini. Ga-wabandang iw Kain, o gi-jingeniman oshimeian Abelan, ano mojag gi-mino-inenimigopan...., o gi-ga-gaweniman sa go. Od inan dash ningoting : “ Ambe kitiganing ijada. ”... Ba-dagwishino-wad dash kitiganing, atchitchikana o nawadi-nan oshimeian, o nissan dash. Mi iw nitam nibowin aking. Gagawendjigewin gi-nishiiwe-magad!

Nin ga-dibadjim oma keiabi endajimind Joseph, Jacob sa ogwissan, gete-dibadjimowing. Gi-kitchi-mino-ijiwebisi Joseph, ossan gaie o gi-kitchi-sagiigon. Ossaieian dash ga-apitch-matchi-ijiwebisinid o gi-gagawenimigon mino oshkinawe. Ningoting dash wassa nin-gotchi gi-ijawag igiw, gi-ganawenimawad manishtanishan. Jacob dash o gi-inan Josephan : “ Ningwiss, madjan; nandawabam kissaieiag; bi-windamawishin dash ejibimadi-siwigwen. ”.... Mi dash ga-iji-madjad Joseph; o gi-mikawan dash ossaieian.... Winawa dash, api waiabamawad Josephan dagwishininid,

pabige gi-matchi-inendamog, gi-iji-ganonidi-wag dash : “ Nashke badassamossed neta-bawadjiged... taga nissada ”..... Iwapi dash o gi-wabamawan atawewininiwan, wassa wendji-banidjin ima bemi-ijanidjin. Besho eianid dash atawewininiwan, o gi-ganonawan igiw.... we-shimeimadjig Josephan; mi dash gi-atawewad oshimeowan. Atawewininiwag dash o gi-ma-djinawan Josephan wassa, mi sa Egypting.... Mi iw ga-matchi-ijiwebisiwad igiw oshkina-wewishag, gi-jingenimawad oshimeowan. We-gonen dash ga-ondji-iji-jingenimawad? Gego nange o gi-matchi-dodagowan. Mino-ijiwebisi-ban, mi dash wendji-kitchi-sagiigopan ossiwan gaie Kije-Maniton, mi gaie nigan ga-ondji-windamagod Debendjigenidjin wenijishininig..... Pijishig gagawendjigewin, mi iw ga-iji-matchi-dodamoigowad oshkinaweswishag.

Ginwenj keiabi, anishinabedog, kawin nin da-boni-ojibiigessi, wi-dibadjimotonagogoban kakina ga-iji-matchi-anokimagak waieshkat mandan egatendagwak gagawenindiwin;... ga-iji-miganindwa meno-ijiwebisidjig, ga-iji-gika-mindwa, ga-iji-batamindwa, gaie ga-iji-maka-

mindwa, mi go eta ondji o mino-dodamowini-wan. Bejig eta keiabi oma nind gad-aton.

Awiiia gi-bi-bimadisi megwe anishinaben sagiapanin. Ossan ondji aiapitchi ishpendago-sinidjin, win tibinawe gaie o kitchi-mino-iji-webisiwin ondji, od apitchi wikwatchitamaso-naban kitchitwawisiwin gaie daniwin aking. Tchi mino-anokitawad dash widj'anishinaben awashime, kakina o gi-nagadan od inodewisi-win; mi dash gi-bi-widjibimadisimad. Mojag o gi-wabandaan o minodeewin o kikendassowin, o gashkiewisiwin. Ketimagisinidjin o gi-widokawan, gaie o gi-abisiwiman; pegwanawi-sinidjin o gi-kikinoamawan; aiakosinidjin gaie nibiwa o gi-jaweniman, gi-aiod o kitchi-kiken-dassowin gaie o gashkiewisiwin tchi nodji-moad... kawin gego wika o gi-wi-odapinansin dibaamagowin ondji kakina iw o minotchitchi-gewin. Nibwakawin, sagiidiwin o gi-gagikwenodan apine; kakina gego maianadak o gi-wikonamawan widjibimadisin... tchi gashkiad wi-mino-ijiwebisinid, tchi wanakideenid ogida-kamik, kaginik dash tchi minawanigosinid.... Anin dash, kid inendam, anin ga-inenimind?...

“ Awiaa nange o gi-matchi-ineniman! Awiaa nange gi-de-matchi-dee tch i matchi-dodawad wika! ”... Ki wanissem, anishinabedog. Nibiwa gi-aiawag ga-jingenimadjig, gaie gwaiak iw ondji, od apitchi-mino-ijiwebisiwin, o kitchi-nibwakawin. Awenenag dash igiw? Mi sa gega-wendjigedjig. “ Awashime nibwaka, awashime gashkiewisi, awashime mino-dodam, epitch dash kinawind, gi-inendamog. Geget gaie o nibwakawin, o gashkiewisiwin maiamakaden-dagwak, ijidee tchi wi-aiod tchi anokitonang gaie kinawind. Mano, anawi ki ga-sagidjinaja-wanan; gashkiassiwang dash, ki ga-nissanan.”.... O gi-nissawan dash geget! Tchibaiati-gong o gi-nissawan Jesusan gegawerdjigedjig Judawiniwiag!

Awiaa gagawendjiged, kawin keiabi o wi-nissitawenimassin widjikiweian, od inawema-ganan, wikanissan, o kitisman; o Kije-Mani-toman gaie kawin! Mano gegibingwengin kakina bemadisinidjin tibishko o ga-jingendama-wan wegotogwen gego wenijishininig, epitch segisid tchi ani-minosseniid awashime win dash.

Ondji gagawendjigewin, awiaa wika ge-gi-

gimodissigobanen, mano o ga-gimodiman, kema o ga-banadjitamawan iniw gegawenimadjin od aimini.

Naningim, ondji gagawendjigewin ketchi - besho-inawendidjig, nitam ga-kitchi-sagiididjig, ta - bakeidiwag , ta - matchi - batandiwag , ta-jin - -genindiwag gegapi.

Gagwanissagakamik geget ejiwebak iw jan - gendagwak gagawendjigewin ! Anawi kitchi nibiwa bemadisidjig, apitchi nibina , kema na - watch pang i gagawendjigewag. Anishinabedog ! Nanagatendamog iw nongom.

III

Nita-gagawendjigewag na anishinabeg?

Kawin kakina ondjeta gagawendjigessiwag anishinabeg anawi; aiawag anind menodeedjig; eniwek nibiwa gaie anishinabeg aiawag neta-sagiadjig widjibimadisiwan eji-sagiidisowad, neta-minwendangig menwendaminidjin, neta-kashkendangig keshkendaminidjin; aiawag anind neta ashamadjig bekadenidjin, neta-mi-naadjig nebagwenidjin, neta-widokawadjig ketimagisinidjin,... kishpin anawi iniw wado-kawadjin tibishko kitimagisinid, winawa tibi-nawe eji-kitimagisiwad, kema kishpin awas-hime nita-kitimagisinid. Geget go anishinabeg anind kitchi-minodeewag: ano kitimagisiwad winawa tibinawe, o jawenimawan minawa anind nawatch ketimagisinidjin.

Pangishevagisiwag nange anawi gegawen-djigedjig anishinabeg. Gaie igiw menodeedjig, winawa gaie od odissigonawadog naningotinong gagawenindiwin. Mamakadakamik sa ejiwebak gagawenindiwin. Ningoting , gegawendjiged mano ta-jawendjige gaie win ; kishpin sa pa-gossendang tchi wi -ondjissininig o jawendji-gewining mino-inenimigowin nawatch , na-watch gaie ishpenimigowin ; kema ganage kishpin nanisanenimassig iniw jewenimadjin tchi minosse ssinid osam.

Potch , gega misiwe anishinabenang mijisha ikkitowag gega kakina , endajimadjig beka-nisinidjin : “ Osam kitchi-gagawenindim oma ; mi wendji - manjisseeiang ; kawin ganage ena-miangin inawendissim ”.... Debewidogenag iw ekkitodjig ! Wegenen dash wendji - nita - kit-chi - agonwetamowad gega kakina , dassing enindwanin : “ Gonima gaie kin kid ijiwebisi-midog ? ”.... Gimodj sa , apitchi gimodj anoki-magad gagawendjigewin ; gaie winawa tibinawe ejideedjig naningotinong agawa kikendamadi-sossiwidogenag iw ejideewad ;... apitchi dash mijisha nagwadini eji-banadjiiwemagak.

Anishinabenang, kishpin kakina tetibishko kitimagisiwad, eniwek pangí mino-inenindiwag eiadjig ; gaie ano-kikendagosid awiia-matchi-ijiwebisid, kishpin memindage migoshkadjiassig widjibimadisin, kawin gego babamendamawassi. Mano ta-winitagosi, ta-gagibadisi, ta-ombakami-gisi, kawin gego ta-inassi... Kishpin dash odissigod gego wenijishininig,.... mi pabige tchi mikwendamawind kakina eji-manjiwid, mi tchi dajimind misiwe, misiwe gaie mi tchi matchi-batamind... Wegonen wendji ijiwebak iw? Kawin awashime nongom matchi-inadi-sissi, kawin awashime nongom migoshkaden-dagosissi,.... kawin geget. Wegonen dash iw wendji-jingenimind nongom? Iw sa eji-minos-sed nongom, mi wendji jingenimind!... Gaga-wenima sa go !

Awia o bi-nasikawan naganisinidjin, kema odenang, kema anamiewigamigong; mi dash eji-webi-dibadjimod anotch gego metchi-inakamigak, win ge-babamendansigoban : “ Joseph, ikkito, apitchi-kitchi-manjiwi, kawin ganage minodeessi; kin nosse, ki da-nanibiki-ma.” — “ Anin dash, nikaniss, gego na ki

gi-dodag?" — "Kawin! Nin jingenimig anawi." — "Anin eji kikenimad jingenimik?" — "Weweni nind iji-kikenima sa go." — "Ki kikendanadog; kawin dash gego ki gashkitossitchi debimad maianadadinig. Ki ga-windamon weweni iw ga-ijiwebak: Joseph nomaia gego o gi-pagamishkagon menwendagwadinig, mi iw wendji gagawenimad. Kawin win ki jingenimi-gossi; kin dash ki jingendamawa iw ejि-mino-bimadisid nongom. Kego ijideeken, nikaniss. Migwetch iji Debendjiged iw gi-jawenimad Josephan...." Maban dash o nishkadisitan iw.... Potch, gagawendjigewin, mi ejиwebak!

Bejig weshkinigid neta-nibwakassig, kitchi agawa gaie neta-pisindang gagikwewin, kijika-bato wi-dagwishing wewib mekateokonaiewi-gamigong. O nandoman mekateokonaien: "Nosse, od inan, Georges apitchi-kitchi-ombakamigisi, gagibadisi, apine nibashka." — "Kin dash, nindaniss, ki kikendanadog ejimanadak iw; kawin na gaie kid ijiwebisissimidog?..." Aw weshkinigid kawin o nakweta-wassin mekateokonaien egod; kawin o dekadossin iw ejи-jingendjiged, ano wikwatchitod;

mi dash ekkidot : : “ Ki ga - kitchi - nanibikima na ? Geget ki da - kotagia.” — “ Gonima , nin gad - ijitchigemigod , kishpin iji - debwewinagak.” — “ Geget , nosse , Nin debwe ! Kitchi - matchi - aia maban . Nin , gi - matchi - ijitchigeian , nin gi - kotagiig ningoting ; win nongom , tibishko ta - dodawa.” — “ Beka , nindaniss ; gego ki gad - inin . Kishpin menodeengin bi - batamad Georges , ki mino - dodam ; anawi ki da - nanda - wendan iw eta tchi anwenindisoind , beka gaie tchi ganonind tchi gashkiind ; kawin ki da - inendansin tchi kotagiind . Inendaman sa , ki wabandaiwen ki matchideewin ; iw gaie kid ondji - kikenimin gagawendjigeian . Ki kitchi - bata - ijiwebis , missawendaman tchi bashanjeond aw Georges . Nindawatch kawin ki wi - debwet - ossinon , osam sa gegawendjigedjig nita - gagi - nawishkiwag . ”

Ningoting nibiwa anishinabeg wewingesidjig gi - nandomawag , wi - anoking ketchitwawendag - wakondji , tchi mino - manadjitong odenang . Kakin eji - bejigowad kitchi - minwendamog tchi bijjawad , wi - wabandaiwewad eji - wawingesiwad . Epitch batinowad , pagossendagwad tchi minos -

-seng, mi dash tchi kitchi-gwanatchiwang iw wa-ojitong.... Tchi bwa madjishkaming dash, bejig gonima nij assawag ininiwag ge-niganisikanda-mowad anokiwin. Ka na iw nibwakadendag-wassinon? Apitchi go geget nibwakadendag-wad.... Anawi!... mi iw wendjissing pabige ossitawendamowin. “ Kawin maban da-gi-as-sassi ; kawin gaie aw,” anind inendamog ; mi ekkitowad gaie mijisha ; gimodj dash inenindi-sowag : “ Kinawind, ki da-gi-wawenabamigo-min.” Mi dash eji-nishkadendamowad, eji-ganonidiwad dash igiw... gegapi mi eji-anijita-mowad ;... giwewag. Gagawendjigewag.

Bekanisidjig, ano nongom nibiwa aiassigwa, wi-minwewisiwag awashime tchi debissewad anawi. Mi dash eji-maminigowad naganisinidjin bebejig od anokiwiniwan. Keabi iw kitchi-nib-wakadendagwad. Minawa dash nongom, mi anind eji-minwendansigwa. “ Wegenen ga-ondji-minind aw bejig iw tchi ojitol ge-nagwa-kiban nawatch? Kinawind ki da-gi-minigomin. Nindawatch, kishpin iji-manenimigoiang, kawin ki ga-widjiiwessimin wi-anokiiang.” Mi sa minawa anind eji-madjawad, gagawendjigewad.

Eshkam eshkam bi-sanagad gego tchi oj-ing.... Kakina anawi odenang eiadjig gi-chi-pagossendamog tchi mino-kitchitwawi-wad ge-kitchitwa-ijiwebak.... Potch, gegapi kina gjitchigade.... kawin dash gwetch awiia djita minwendansi... Osam sa nibina jinge-indiwin, matchi-dajindiwin gi-bi-ondjissin gawendjigewining.

Geget go osam nibiwa nita-dagomagad gaga-endjigewin anishinabenang !

IV

Tchi bwa ishkwataian , manda keiabi nana-gatawendamog , anishinabedog enamiaieg.... Ondjita migadimagadon gagawenindiwin gaie anamie-sagiidiwin ge-ganawendangiban abide-kamik enamiad , kishpin geget wi-jawendagosid kaginik gjigong .

Wendjita-anamie-sagiiwed , ikkito Debendji-ged , kakina bakan ganasongewinan agwito o ganawendanan . Saiagiiwessig dash , kema ge-gawendjiged , win , maiawendagwak ganason-gewin od apitchi-agonwetan ; kitchi nanisanisi tchi kagine-banadisid , epitch gagwanissageni-migod Debendjigenidjin .

Saiagiiwed , mi sa enamiad , bekadendagosi , ikkito kitchitwa Paul , kawin pabige o nishke-nimassin widj'anishinaben , o mino-ineniman

mojag ano manjininiwagisinid ;... aw dash gegawendjiged, kawin ganage o mino-inenimassin ano gaie mino-inadisinid.

Saiagiiwed, mi sa wendjita anamiad, nita-jawendjige ; o nandawendamawan widj'anishi-naben kakina gego wenijishininig, od iji-widokawan gaie ;.... gegawendjiged dash o kash-kendamiigon gego mino pagamishkagonid.

Saiagiiwed, kawin gego o matchi-dodansin , angwamisi gaie wika awiia ningot tchi inigaassig ;... gegawendjiged dash win , ondjita anoki wi-inigaad widjibimadisin.

Saiagiiwed kawin maminadisissi ; kawin od iji-niganendansin wiiaw tchi manenimad widjikiweian ;... gegawendjiged dash ishpenindiso : “ Ejiwebisid aw, kawin nind ijiwebisissi ine-inindiso: mi dash iw geget wendji-onijishinsinog tchi mino-aiad , nin dash tchi kitimagisiian.” Ondjita dash o tabasseniman.

Saiagiiwed, kawin o nandawendansin tchi kitchitwawisid; kawin od iji-babamendansin wiiaw; mi iw wendji-minwendang , minonawead sa widjikiweian. Od iji-kikinowabaman Debendjigenidjin.... Gegawendjiged dash, mo-

-jag win tibinawe mikwenindiso, matchi-sagi-idiso; kashkendamowin gaie sanagisiwin o wi-ojitetawan widjibimadisin. Od iji-kikinowa-baman matchi-Maniton.

Saiagiiwed kawin nita-nishkadisissi. Kishpin anwenimad awiia, mi wendji-dodang, sagiad, nandawenimad tchi mino-ijiwebisinid, wi-mino-aianid gaie.... Gegawendjiged, od anweniman wi-animiad ondjita, kitchi-minwendam gaie osam tchi bashanjewad; kawin od inenimasssin tchi anwenindisonid, mi dash mino-aianid. Kikenimapan tchi wi-iji-minokagonid bashanjeogowin, kawin gonima gego o dainassin.

Saiagiiwed kawin awiia o matchi-inenimas-sin; kakina gego, aiano manjinagwak, o bonnendan; kawin wika : "Matchi-inendamodog nikaniss," od inenimasssin. Mojag dash : "Geget go kawin mino-ijinagwassinin iw ejiwebisid, inendam, potch gonima wanisse eta, nin naningim ej-iwanisseian; mino-inen-damodog "... Gegawendjiged dash, apitchi bakan : "Mino-ijinagwadini iw ejitchiged nikaniss, inendam, anawi od aianadog ge-

-go matchi-inendamowin. Geget go nind iji-kikenima; anamiekaso eta, mino-ijiwebisi-kaso!"

Saiagiiwed kawin o minwendansin matchi-ijiwebisiwin, debwewin dash o minwendan;... gegawendjiged dash kawin o babamendansin debwewin, o minwendan dash gego senagak wegötogwen wedissikagonid widj'anishinaben; iw dash tchi gi-wikwatchitamasonid, kema tchi gi-wikwatchitamasossinig, kawin o baba-mendansin.

Saiagiiwed kakina kotagitowin o mino-oda-pinan;... gegawendjiged kawin gego o mino-odapinansin; potch meno-dodagodjin kawin o mino-odapinamawassin gego;... pabige matchi inendam.

Saiagiiwed kakina gego meno-ijiwebak o debwetan;... gegawendjiged dash wenipadj o debwetan eta gego maianadak.

Ningotodong kakina tchi ikkitong, saiagiiwed o pisindawan kejewadisnidjin Manitou; ogida-kamik o kikinowabaman; ishpiming gjigong gaie o ga-kagige-widjibimadisiman.... Gega-wendjiged hash o dibenimigon jangendjige-

-nidjin Maniton; ogidakamik o kikinowaba-
-man; o ga-kagige-widjikotagitoman anama-
-kamik!

Angwamisiilog, anishinabedog! Kego gaga-
-wendjigekagon!

L. J. C.

27619. — TOURS, IMPRIMERIE MAME.